

62501 / B

MEDICAL SOCIETY
OF LONDON



ACCESSION NUMBER

PRESS MARK

GOELICKE, A.O.

ANDR. OTTOM. GOELICKE,

MEDICINAE DOCTORIS INQUE REGIA

VIADRINA PROFESSORIS PUBLICI

ORDINARIII NEC NON PHYSICI

PROVINCIALIS,

INTRODUCTIO

IN

HISTORIAM
LITTERARIAM

SCRIPTORUM,

QUI

INSTITUTIONES
MEDICINAE

feu

PARTEM

EJUS ELEMENTAREM SCRIPTIS SUIS
ILLUSTRARE CORDI HABUERUNT.

FRANCOFURTI ad VIADRUM,
apud JOH. GODOFREDUM CONRADI,

1735.

THE OLD CHURCH

1871

1872

1873

1874

1875

1876

1877

1878

1879

1880

1881

❁ (3) ❁
INTRODUCTIO
IN
HISTORIAM LITTERARIAM
SCRIPTORUM,
QUI
INSTITUTIONES
MEDICINAE
SCRIPTIS SUIS ILLUSTRARUNT.

§. I.

Recte omnino ac sapienter *Introductione in universam artem medicam* Cap. I. §. I. scripsit *Hermannus Conringius*, ingens quondam *Academiae Juliae* decus atque ornamentum; Philiatrum duo, priusquam studium ipsum adgrediatur, adferre secum oportere, nempe tum magistrorum, qui scientiam illam excoluerunt, tum etiam ipsius artis *προπαιδεια* justam accuratamque cognitionem. Quanquam autem de iis, quae de studio medicinae propaedeutico in scholis communiter traduntur, v. g. de existentia artis ejusque essentia seu constitutione, de origine, definitione, divisione, subjecto, objecto, fine, antiquitate, utilitate, necessitate, sectis variis & auctore medicinae &c. dubitari haud injuria posset, num tantae, quantaе vulgo praedicantur, utilitatis atque necessitatis e-stant: Extra omnem tamen dubitationis aleam positum est, notitia Auctorum, qui scriptis suis scientiam medicam illustrarunt, carere Philiatrum non posse: Quia alias vagabundus oberrabit, &, quos vel imitetur vel fugiat, profundissime ignorabit. Idcirco, ne qua in re Philiatris nostris deesse videamur, operam dabimus, ut singulos, qui rudimenta artis exposuerunt, uno quasi obrutu

ipsis exhibeamus, quidve de illis sentiendum sit, candide simul tamen libere edisseramus. Facimus id eo lubentius, quo magis officii ratio id à nobis expostulat, cum praeter alias artis partes, *institutionum professio* nobis sit demandata.

§. II.

Multae vero dubitandi rationes sunt, num ante *Hippocratis* tempora repertus quisquam fuerit, qui tyrocinia medicinae tradiderit: Quia in artis formam ea tempestate nondum redacta erat. Imo ne ipse quidem *Hippocrates* adcurate & tanquam ex professo hoc negotium ita prosequutus est, ut in una quasi atque continua serie omnia ea, quae ad *εἰσαγωγικά, Φυσιολογικά, παθολογικά, ὑγιεινά, σημειωτικά & θεραπευτικά* ab *Institutionum medicarum* scriptoribus referri hodie solent, in operibus ejus legantur; Quanquam tales consarcinari inde haud difficulter posse, persuasissimum mihi sit.

§. III.

Cujus rei periculum si cui facere allubescat, ipsum tantum fontem consulat necesse est. Ita enim *Isagogica* seu *τεχνικά* in libris, *Hippocrati* ab *Erotiano*, definitionum *Hippocraticarum* Auctore maximam partem vindicatis, nimirum de arte, lege, prisca medicina, de medico, decenti ornatu & praeceptionibus facile reperiet. *Physiologica* ejusdem in libris de natura hominis & genitura, de natura pueri, de carnibus, partu septimestri & octimestri, de corde, glandulis, natura ossium &c. *Pathologica* vero in libro de locis in homine, de morbis, de affectionibus, de virginum affectionibus, de natura muliebri, de superfœtatione, dentitione & morbis mulierum occurrunt. Et sicuti, quae ad *hygieinen & diaeteticen* spectant in libro de aëre, locis & aquis, de flatibus, de salubri victus ratione privatorum, de alimento, de liquidorum usu, de victus ratione sanorum, de insomniis & in libro de diæta in morbis acutis leguntur: Ita *semeiotica* in libris de judicationibus & diebus judicatoriis, prognostico, praedictionibus, Coïcis praenotionibus, & libro de humoribusprehenduntur. *Therapeutica* vero liber *Hippocratis* de morbo sacro,

sacro, de medicamentis purgantibus, de venae sectione &c. subministrat.

§. IV.

Ex quibus omnibus schema *Institutionum Hippocraticarum* quodammodo adumbrare ideo neque inutile neque inconueniens erit, ut, quas mutationes, incrementa vel decrementa successivis temporibus ceperint, perspicui inde liceat. Quod igitur primum *τα εἰσαγωγικά* spectat, notum quidem est, quod *Institutionum* conditores prolixi esse soleant in decantandis laudibus ejus, quam profitentur, artis: Noster vero paucissimis, sed tamen nervose inculcat: (a) Medicinam omnium quidem artium nobilissimam esse, sed propter eorum, qui eandem exercent, ignorantiam, eorumque, qui temere de his judicant, imperitiam omnibus artibus jam longe inferiorem haberi: Unde & histrionibus comparare non dubitat, cum nomine quidem multi, re ipsa autem perpauci sint medici. Ad hanc medicinae scientiam apte comparandam, natura non tantum opus esse, sed & doctrinam, locum studiis aptum, institutionem à puero, industriam atque tempus requiri; Cavendum denique esse, ne haec sacra aliis, quam sacris hominibus demonstrarentur; Profanis vero, priusquam scientiae sacris initiati fuerint, talia demonstrare, omnino nefas esse, judicat.

§. V.

De (b) existentia artis, tanto minus dubitandum esse existimat, cum non solum absurdum sit, esse putare, quod non sit: Sed etiam eorum, quae non existunt, essentiam quis intueri nequeat, vel enunciare, quod sint. Medicinam definit per artem, cujus ope à morbis aegri vindicentur vel eorundem saltem vehementia obtundatur. Ab auctore vero libelli *de flatibus*, quisquis demum ille fuerit, definitur: Quod sit adjectio & detractio, & adjectio quidem deficientium, subtractio vero eorum, quae in corporibus

(a) *Hippocrates Libro de Lege.* (b) *Idem Libr. de arte.*

ribus hominum redundant. De vera ejusdem efficacia sic satis etiam modeste sentit: Unde eandem neque nimium extolli neque nimium deprimi, cuius facile constabit. Neque enim iis, qui à morbo victi sint, manum admoventi esse, prudenter monet, cum id medicinam praestare non posse, probe constet. Neque tamen ideo artem ipsam in reprehensionem incurrere debere: Esse enim criminationem vulgi, morbis detentos, quique eos evaserunt, FORTUNAE, non ARTIS beneficio evasisse. Et licet diffitendum non sit, multos etiam aegros citra opem medici artificis restitutos esse; Id tamen potestatem seu energiam artis nullo modo enervat, cum per se curatis eadem, quae, si, medicis adhibitis, curati fuissent, contingerint. Illi namque, qui, medicis non adhibitis, ex morbo convalescerunt, intelligant necesse est, se aliquid fecisse vel non fecisse, & idcirco sanitatem consequutos esse; Siquidem aut in ediam aut copiosiore cibum & potum, aut sitim, aut balnea aut eorum abstinentiam, aut labores, aut quietem, aut somnum aut vigiliam aut eorum omnium promiscuum usum adhibentes, sanitatem consecuti sunt. Artis esse, non minus ea, quae offenderunt, quam, quae profuerunt, rite aestimare. Quod vero omnes morbi sanari nequeant, culpam non in artem ipsam, sed vel in ipsorum aegrotantium impatientiam vel negligentiam vel morborum vehementiam atque celeritatem rejiciendam esse, dexterrime inculcat. Antiquitatem artis prosequitur *Cous* libro de *prisca medicina* atque ostendit, non fortuito, sed via quadam investigatam & inventam esse eandem. Doctrinam *anthropologicam*, quam fusius hodie, quam par est, suis in *Institutionibus* pertractant medici, ab arte longe alienam esse putat, atque Sophistarum classi adnumerat illos, qui fieri non posse dicunt, ut quis artem medicam cognoscat, nisi idem, quid sit homo, & quaenam prima ejus generatio & compositio, noverit. Quae enim ab his de Natura dicta vel scripta sunt, non tam ad medicam, quam pietoriam artem spectare judicat.

Quoad *Physiologiam Hippocratis*, ea ex superius allegatis scriptis eo, qui vulgo in *Institutionibus* servatur, ordine, pari facilitate delineabitur, dummodo ad id, quod de *natura elementorum*, de *temperamentis*, *humoribus*, *partibus*, *facultatibus* & *actionibus* earundemque *instrumentis* senserit, attendatur. Quotiescunque de elementis naturae humanae, de quibus quippe hic tantum sermo est, loquitur *Hippocrates*, qualitaturn, *calidi* nempe, *frigidi*, *humidi* & *sicci* nominibus utitur; Quae tamen qualitates singulae, homine fato fungente, in propriam naturam reverterentur, ficcum in ficcum, humidum in humidum, calidum in calidum & frigidum in frigidum. Ex harum qualitaturn diversa mixtione & mutua quasi contemperatione, ulterius docet, exurgere temperamenta, quae tamen & pro ratione temporum anni & diversarum quoque aetatum sint diversa. Humores ad quaternarium reducit numerum, sanguinem scil. pituitam & utramque bilem, tam flavam quam atram. Sicuti autem varias corporis partes, quibus constat, enarravit: Ita etiam varias illis facultates & actiones vindicavit, quarum omnium primus veluti auctor sit spiritus, sicuti haec omnia ad mentem *Hippocratis* fusius explicuit *Galenus*.

§. VII.

Reliqua ejusdem placita *Physiologiam* respicientia huc fere redeunt: (c) Reperiri in homine ignem quendam connatum. (d) Omne, quod minime coäluit, sive pellicula sive carne tegatur, cavum esse, quod, dum homo valet, spiritu quidem, sed, dum idem aegrotat, sanie plenum sit. (e) Inesse homini & amarum & falsum & dulce & acidum & insipidum aliaque sexcenta, quae pro copia & viribus varias habeant facultates. Et haec quidem mixtione & mutua inter sese contemperatione neq; cerni, neque molestia quenquam adficere. At ubi horum quip-
piam

(c) Idem libro de arte. (d) Ibidem. (e) Ibidem.

píam secretum fuerit, & per se extiterit, tunc & conspicuum fieri & hominem molestia adficere. (f) Corpus nostrum tribus ex rebus constitutum esse, nempe continetibus, contentis & impetum facientibus, quo postremo nomine spiritus intelligendos esse, & antiqui & recentiores tantum non omnes mordicus defendunt. Et ne quis forte dubitandi aníam inde arriperet, conceptui sano non undique statim congruere, qua ratione spiritus isti, quos alioquin tenuissima constare substantia credunt, sursum, deorsum, omnesque in partes ferantur, difficultati statim satisfaciunt (g) alio *Hippocratis* loco, quo confluxionem unam, conspirationem unam & consentientia omnia statuit; Quam etiam sententiam acerrime inculcavit (h) *Galenus*, qui totum corpus *συνπνεῖν* & *συνῆσθαι* esse interpretatus fuit. Adscribit porro idem *Cous* Naturae exquisitam sensibilitatem, dicendo: (i) Ejusmodi naturas, quae celeriter ac vehementer suorum delictorum incommoda percipiant, reliquis equidem imbecilliores esse: Imbecillem vero proxime ad eum, qui aegrotaret, accedere, esseque imbecilliolem, qui aegrotaret, multoque gravius adfici, si quid intempestive fecerit. De (k) genitura viri sic docet: Proficisci eandem ex universo totius corporis humido, quod in eodem contineretur. (l) Masculinum semen foeminino esse robustius. (m) De iis, qui sectionem juxta aures experti sunt, enunciat: Quod venerem quidem exerceant, verum quod semen paucum & imbecille & infocundum emittant. De puellis, pueris atque mulieribus haec pronunciat: (n) Puellas citius pubescere, quam pueros, quo citius sapiant & senescant propter corporum imbecillitatem & victus rationem. (o) Puerum in utero matris respirare, docet; Compressis enim labris tum ex utero matris alimentum sugere, tum spiritum, qui in puerro cali-

(f) Libro VI. Epidemicor. Sect. VIII. Aphor. 8. (g) Libro de alimento. (h) Libro I. de medendi ratione. (i) Libro de arte. (k) Libro de genitura. (l) Ibidem. (m) Ibidem. (n) Libro de partu septimestri. (o) Libro de carnibus.

ro calidissimus sit, in cor attrahere. (p) Magis sanas esse mulieres, si cum viris rem habeant, quam contra. (q) In venere exercenda longe illas minorem prae viris voluptatem percipere, virum vero insuper etiam diuturniorem; Id quod an sufficienti experimento suffultus enunciarit senex noster, alibi disquiremus. Caeterum (r) semen quoque mulieribus adjudicat, quod corpore suo (inter coeundum) emittant, interdum quidem in uterum, ex quo humidus reddatur, nonnunquam vero foras, si plus aequo uterus dehiscat; Additque, quod post coitum (s) semen ab utrisque emissum, siquidem mulier minime conceptura sit, foras profluat; si autem conceptura sit, semen minime foras profluat, sed in ipso utero maneat; Unde praeter hoc sequentia conceptionis (t) signa tradidit: Mulierem nempe, ubi conceperit, statim inhorrescere & incallescere & dentibus stridere & articulum reliquumque corpus convulsionem prehendere & uterum torporem, idque iis, quae purae sint, accidere; Quae vero crassae & mucosae istud experiantur, earum plerasque hoc non sentire: Candide tamen hic simul profitetur, tantum se de his rebus scire, quantum ipsae (mulierculae) id ipsi indicaverint. (u) De partu septimestri & octimestri ita sentit: Puerum septimo mense natum certa ratione in lucem prodire & vitalem esse, cum is rationem & numerum exacte ad hebdomadas respondentem habeat; Octavo vero mense natum nullum unquam vixisse: Novem autem mensium & decem dierum foetum edi & vitalem esse, numerumque ad hebdomadas exacte respondentem habere; Quam suam sententiam ulterius (w) alibi explicat, adjiciens: Octimestrem partum octavo mense aegrotare; Ex iis enim, qui septimo mense nati sint, superesse quosdam, licet ex multis pauci sint. Mulieribus interim de partu fidem habendam esse, quippe quae adfirmant, quod septimo mense, & octavo

B

& no-

(p) Libro de genitura. (q) Ibidem. (r) Ibidem. (s) Ibidem.
(t) Libro de carnibus. (u) Libro de partu septimestri, (vv) Ibidem.

& nono & decimo & undecimo partus in lucem prodeant, sed ex hic octavo mense natos minime superesse. Cujus rei hanc (x) alio in loco allegat rationem: Quod partus octavo mense editus non possit duas continenter consequentes afflictiones perferre, ideoque eos, qui octavo mense nascerentur, minime superesse posse. His enim, inquit porro, accidere, ut ea, quae in utero est, & ea, quae in partu fit, afflictione consequenter laborent, proptereaque eorum, quae octavo mense eduntur, nullum esse superstitem, concludit. Quam tamen *Hippocratis* sententiam falsitatis (y) alibi satis convicimus. Undecimestres vero, duodecimestres & reliquos, decimum mensem supergressos refert ad fallacias mulierum, quae nempe vel mensibus non prodeuntibus, vel uteris in tumorem sublatis utero sibi gestare videantur, in quo tamen & decipiant & decipiantur; Quod idem etiam sensisse *Paulum Ammannum*, Professore *Lipsiensem*, alibi notavimus. Concedit porro, (z) nihil impedire, quo minus superfoetatio seu alter conceptus in muliere fieri queat: Nam superfoetare eas mulieres, in quibus os uteri (stomachum vocant) post primum conceptum non ita valde clauditur. (zz) Coeuntibus denique, tam foemellis quam viris has praescribit leges, illis, ut recte concipiant, his, ut pro voto suo generent. Vir, secundum monitum *Senis* nostri, neque inebrietur, neque vinum album bibat, sed valentissimum ac meracissimum, cibisque utatur valentissimis, calida ne lavet, robustus sit & sanus, & cibis abstineat, quae ad rem minime faciant. Videtur quoque temere sibi persuasisse, in viri potestate positum esse marem vel foeminam generare; Cum, inquit, marem procreare volet, mensibus desinentibus aut cessantibus uxorem adeat, & quam penitissime (membrum virile) intrudat, dum semen excernat: At ubi foeminam generare volet, cum plurimi menses mulieri

(x) Libro de partu octimestri. (y) Disputatione medico-forensi de partu octimestri vitali & legitimo. (z) Libro de superfoetatione. (zz) Libro proximo citato. Conf. medic. For. nostr.

lieri fluxerint nec dum cessarint: Dexter autem testis, quo-
ad maxime fieri potest, obligandus; sinister vero, si maris
procreatio expetitur. Fateor autem, haec praecepta ita
comparata esse, ut ea sequi vix liceat, & si liceret, frustra-
neum tamen & irritum foret. Taceo, jus jurandum ejus
graviter laedere artificium vel potius consilium, quo fidi-
cinae cuidam, quam minime gravidam esse decebat, ab-
ortum procuravit.

§. VIII.

Eodem modo comparatum est cum *Pathologia Hippocra-
tis*, quam quis in una atque continua serie ejus in scriptis
difficulter reperiet. Quae vero seorsim hinc inde occur-
runt, ad haec pauca rerum momenta reduci sese patiun-
tur. (a) Morbum in genere adpellat omne id, quod ho-
mini molestiam adfert. (b) Adserit quoque, nulli illo-
rum prae altero majorem, uti loqui amat *Cous*, divinita-
tem competere, sed omnes aequae divinos & aequae hu-
manos esse. Unde ingenti praejudicio laborasse censet o-
mnes illos, qui (c) morbo comitali divinitatem quandam
vindicarunt, cum homines ideo tantum ex imperitia & ad-
miracione divinam & naturam & causam illi adscripserint,
quod nulla in re reliquorum similis esset.

§. IX.

Juxta haec non neglexit quidem omnino morborum
causas indagare, sed cum ingenti tamen difficultate id
scrutinii genus stipatum esse non diffitetur. (d) Obscuris-
simos enim & maxime difficiles morbos opinionem magis,
quam artem, indicare; In his praecipuum esse, quaenam
sit morborum causa & ex quo principio ac veluti fonte cor-
poris vitia oriantur? Multum tamen in indagatione cau-
sarum morbificarum situm esse (e) inde infert, quod is
facile ex illis, quae corpori insunt, ea, quae conferant,
offerre possit. Mox vero subjicit, (f) plerosque morbos

B 2

vix

(a) Libro de flatibus. (b) Libro de morbo sacro. (c) Ibidem. (d)
Libro de flatibus. (e) Ibidem. (f) Ibidem.

vix aliunde oriri posse, quam ex aëre, cum is aut copiosior aut parcius aut plenior aut morbidis inquinamentis infectus in corpus subierit. Non minus quoque in censu causarum morbificarum accusat pravam victus rationem, cum quis copiosiores cibos aut liquidos aut siccos corpori exhibuerit, quam ipsum ferre queat, neque labore aliquo ciborum quantitatem compenset, imprimis si varios insuper & dissimiles inter sese cibos immittat; Dissimilia enim seditionem excitare, & alia aliis citius, alia tardius concoqui. Notat vero potissimum (g) tempora solstitialia & aequinoctialia, & inter illa quidem aestivum, inter haec vero vernum & autumnale, quod maximi periculi plena sint. Observandos itidem esse siderum ortus, praecipueq; caniculae, arcturi & vergiliarum occasus, quia his diebus morbi judicationem subirent, & alii quidem perimerent, alii vero deficerent, aliique omnes in aliam formam atq; statum transirent. Quibus (h) alibi addit, non minores homini affectus ex intempestiva evacuatione, quam repletionem contingere. Non minus quoque (i) à defluxionibus à capite versus alias partes factis multos morbos derivat, v. g. apoplexiam, si versus cerebrum ipsum, ophthalmiam, si in oculos &c. fluxio ista contingerit. Quod si vero per palatum pituita ad ventrem perveniat, tunc ventres quidem fluere, inde tamen non aegrotare homines; Ast pituita intra permanente, volvulos fieri, affectiones diuturnas. Per palatum ad fauces multam & frequentem fieri fluxionem, morbos tabidos efficere credit. Ut taceam morborum phalanges, quos (k) anni tempora, tempestates earundemque mutationes, venti, pluviae, aestus, frigora, variae hominum aetates &c. pariunt. Unde (l) medico, ad locum ignotum venienti & artem suam recta ratione exercitatus commendat, ut variorum anni temporum rationem habeat, nec non ventorum; quavis

(g) Libro de aëre, aquis & locis. (h) Libro de prisca Medicina. (i) Libro de glandulis. (k) Aphorismorum Hippoc, integra Sectione III, (l) Libro de aëre, locis & aquis.

vis in regione spirantium indolem exploret & ad aquarum qualitates attendat. Ipsam quoque (m) victus rationem inspiciendam, imo & varium regimen attendendum esse jubet, an otio dediti vel exercitationibus & laboribus gaudeant? Tali enim, has similesque res exacte exploranti pollicetur, se morborum cuique regioni familiarium notitiam facile sibi comparaturum atque hinc tanto etiam felicius curaturum, imo &, quales inprimis morbi grassaturi sint, haud vane praedicturum.

§. X.

Neque eam *Pathologiae* partem, quam *aetiologicam* vocant *Institutionum medicarum* conditores, omnino ignoravit; Cujus rei unicum saltem ut exhibeamus specimen, phaenomena febrium intermittentium exempli loco inservire nobis poterunt. Explicaturus enim *paroxysmum horroris* seu *frigoris*, ita ratiocinatur: (n) Cum cibis multum quoque aëris seu spiritus ingeri; Hunc, cum prae multitudine exire nequeat, obstructo ventre inferiore, universum tunc corpus percurrere flatus, eosque ad partes corporis sanguine refertas illapsos eas refrigerare: Quibus tum locis, in quibus fontes & radices sanguinis continerentur, refrigeratis horrorem per universum corpus penetrare. Universo enim sanguine perfrigerato, totum quoque corpus horrorem pervadere, majorem, quo majore copia & frigiditate flatus irruperint; Si contra, minus vehementem. *Oscitationes* ideo praecedere febres autumat, quod aëre magna copia coäcervato confertimque ad superiora erumpente, tanquam machinatione aliqua os diducatur, quod hic potissimum facillimus ei transitus concedatur. *Calorem*, deinde, subinde *aestum febrilem* subsequi, ita explicat: Coäcto cumulatim plurimo sanguine, aërem ipsum, qui sanguinem refrigeravit, a calore superari, rursus incallescere, incensumque ac veluti igneum existentem in toto corpore calorem excitare, ad id ipso etiam sanguine subserviente. *Sudores* fieri docet liquatione ejus, quod incensum est, ex

B 3

quo

(m) Ibidem, (n) Ibidem,

quo spiritus oriatur, quo ad corporis meatus erumpente sudores excitarentur; Coacto nempe spiritu in aquam abeunte & per meatus eodem modo erumpente, quo a ferventibus aquis vapor sublatus incrassescat & condensetur. *Dolores capitis* hoc modo contingere existimat, quod viae capitis, cum aëre replentur, angustiores reddantur, sicque repletae ac distentae dolorem excitent. *Pulsationes circa tempora* inde derivat, quod sanguis vi pulsus cum calidus existat, per angustam viam celeriter transire nequeat, quod multa cum remorentur, quae impediunt motum & obstruunt vias: Unde pulsationes circa caput contingant, necesse est.

§. XI.

In *arte semeiotica* morbos tum cognoscendi tum futuros eorum eventus perite praedicendi, usque adeo excelluit *Cous* noster, ut neque suis neque nostris temporibus quenquam ea in re parem, nedum superiorem habuerit. Imo, qui hanc signorum doctrinam scriptis vel commentariis suis post illum illustrarunt, ingenue confessi sunt, faciem *Hippocraticam* ubique praeluxisse: Unde ipse *Prosper Alpinus* in aureo suo tractatu de *praesagienda vita ac morte aegrotantium*, singulis in paginis testatum facit, quod pleraque sua ex solidissimis *Hippocratis* monumentis hauserit: Quem proinde librum dignum judicavit *Hermannus Boerhaave*, qui nova forma ab infinitis hypothetarum mendis repurgatus A. MDCCX. in lucem publicam denuo prodiret. Sunt autem praeter multos alios fontes, ex quibus praedictiones suas petit *Hippocrates*, sudores, sputum, urinae, alvi fluxus, decubitus, mentis constantia vel alienatio multaue alia.

§. XII.

Praeceptorum *diaeteticorum* locuples ubique in scriptis *Hippocraticis* conspicitur adparatus. Praescripsit enim non tantum quantitatem, qualitatem, modum aliasque victus conditiones in genere, sed & speciatim rationem victus anni temporibus, variis aetatibus imo & specialibus morbis

bis adcommodatam. Differuit de (o) lacte, quibus vel conveniat vel non conveniat, de aqua, vino aliisque liquoribus. (p) Aquas ex imbribus collectas levissimas, tenuissimas, dulcissimas ac limpidissimas esse judicat. Addit tamen, cito putrescere aquam pluviam & odorem pravam contrahere: Contra pravas omnes declarat, quae ex nive & glacie fiunt, cum per frigus leve ac dulce exhalet, turbidum vero ac ponderosum remaneat. Porro vero de aquarum salubritate ita differit: (q) Aquas ex locis saxosis defluentes, vel ubi ferrum nascitur, aut aes, aut luna, aut sol, aut sulphur, aut alumen, aut bitumen, aut nitrum, duras esse & aestuosas, quaeque nec facile per urinas ferantur & alvi egestionem adversentur: Optimas contra esse, quae ex sublimioribus locis profluant, dulces quippe & albas: Salsas vero, indomitas esse & duras, & ut bibantur, penitus improbandas. Non minus quoque aliis ex indiciis qualitates aquarum aestimavit; Quae enim cito calescunt & cito refrigerantur, levissimas esse dicit, Plura alia huc spectantia hac vice allegare neque vacat neque lubet.

§. XIII.

Medendi methodum certis quidem regulis, quod *Institutionum* scriptores aliàs facere solent, non circumscripsit, abunde tamen indicationibus tam generalibus quam specialibus futurum Practicum instruxit. Eundem nempe informavit non modo de actu purgatorio generatim instituendo, sed &, quae & qualia purgare oporteat, ipsum monuit, non neglectis quoque cautelis, quantitatem purgandi moderantibus. Qua vero ratione venaesectionem, cucurbitulas, aliaque remedia administrare oporteat artificem, hinc inde suis quoque monitis ita praemunivit, ut nullibi facile impingere queat adfiduus horum praeceptorum observator.

§. XIV.

(o) Lect. V. Aph. 64. (p) Libro de aëre, locis & aquis. (q) Libro proxime allegato.

§. XIV.

In ipsa praxi exercenda nemo *Hippocrate* felicius fuit. Pauca quidem remedia, sed tanto certioris efficaciae in usum vocavit. In plerisque acutis nudus tantum spectator fuisse videtur. Hanc tamen generalem praxeos regulam statuminat: *Contrariorum contraria esse remedia*. Ita plenitudinem sanare docet evacuationem; Evacuationem vero plenitudinem, laborem otium & otium laborem &c. Quisque istud omnium optime faceret, is optimus existimandus esset medicus; Qui vero plurimum ab eo praestando abesset, is plurimum in arte medica deficere censendus foret. Huic regulae multas alias ad latus ponit, quales sunt: Multum & subito vel implere vel exinanire vel calefacere vel refrigerare, vel modo quovis alio corpus movere, periculosum. Omne nimium naturae esse inimicum; Modo aperiendum ac dilatandum, modo vero stringendum esse; Illud, ut humores ad excretionem destinati liberiores inveniant exitum: Hoc vero, ut, qui retineri debent, retineantur. Observandum esse humorum cursum, unde non modo veniant, sed & quorsum tendant; Atque adeo modo derivandum, modo revellendum esse. Humores ad exitum destinatos, per loca & organa convenientia ejiciendos esse, neque permittendum, ut, qui vasis suis semel egressi sunt; denuo ingrediantur. Attendendum diligenter esse ad juvantia atque nocentia. Nihil temere faciendum esse. Subinde satius esse, nudum morborum spectatorem sese gerere: Nam utut patientem non juves, eundem tamen quoque non laedes. Denique medicaminibus suos quoque adsignat gradus: Quaecunque enim, inquit, non sanant medicamenta, ea ferrum sanat; Quae ignis non sanat, ea incurabilia judicare oportet.

§. XV.

Plura hac vice allegare non opus est, cum partim in *historiae medicinae universalis periodo quinta* prolixè universales medica *Hippocratis* exposita fuerit, partim vero ex his, tanquam

tanquam materialibus *Institutionum Hippocraticarum* forma, concinnari facile queat.

§. XV.

Pergerem ad *Galenum* presso pede, nisi de *Erotiano*, quem ad scriptores *Institutionum* nonnulli referunt, verbulum monendum esset. Auctor quidem est definitionum medicarum & Lexicon graecum vocum obscurarum *Hippocratis* conscripsit; An vero ideo *Institutionistis*, ut sic barbare cum vulgo loquar, accenferi mereatur, merito dubito.

§. XVI.

Galenus vero majori jure huc referri potest. Ipsemet libro de libris suis, omnibus iis, qui ad artis medicae cognitionem contendunt, primum omnium perlegendum commendat librum de *sectis ad eos, qui introducuntur*, sicuti & libros de *ossibus & pulsibus* dicatos esse introducendis fateatur. Quorsum & libellos duos *isagogicos*, alterum de *arteriarum & venarum*, alterum vero de *nervorum dissectione*, nec non *institutionis empiricae subfigurationem* refert. Huc etiam pertinet liber de *constitutione artis medicae*, nec non *Galeno* adscriptae *definitiones medicae*, uti & *introductio seu medicus & ars medicinalis*: Ex quibus, ut & *Anatomicis Galeni* libris abunde peti potest, quicquid ad *Physiologicam* medicinae partem spectat.

§. XVII.

Pathologicam doctrinam explicant libri de *morbis & symptomatum differentiis*, de *causis morborum & symptomatum*, de *locis affectis*, de *temporibus morborum*, de *differentia febrium*, de *plenitudine*, de *causis morborum antegressis & continentibus &c.* Artem vero *prognosticam* declarant libri de *diebus judicialibus*, de *crisibus*, item tractatus de *pulsibus*, in quo primum de eorum differentiis, deinde de *pulsuum dignotione*, porro eorum *causis*, tandemque de *praesagiis ex his sumendis* agitur. Hisce jungendus est libellus de *usu pulsuum*, introducendis seorsim scriptus.

C

§. XVIII.

§. XVIII.

Ipsam denique *therapeuticam* illustrent libri de *methodo curandi*, de *curandi ratione* secundum *Erasistratum*, de *tabe &c.* *Diaeticam* vero partem libri de *alimentorum facultatibus*, de *dieta extenuante*, de *boni malique succi cibis*, de *dieta in morbis acutis &c.* egregie perficiunt. Quae tamen omnia prolixius hac vice non discutiam, singula suo loco reservaturus, quando universum celeberrimi hujus post *Hippocratem* principis medici systema in *historia medicinae universali* à me explicabitur.

§. XIX

Contemporaneus *Galen* fuit *Soranus*, *Ephesius*, qui, ut *Wolfgangus Justus* refert, temporibus *Traiani & Adriani*, Imperatorum Romanorum floruit. Ab aliis *Peripateticus* & vetustissimus archiater dicitur, qui, *Suida* Auctore, *Alexandriae* primum perfecit, deinde *Romam* venit ibidemque praxin medicam, regnantibus modo dictis Imperatoribus, exercuit. Haereseos *Methodicae* strenuus sectator fuit. Scripsit equidem in artem medicam *Isagogen*, quae cum medicorum antiquorum operibus exstat: At cum scripta ejus maximam partem perierint, ex *Coelio Aureliano*, ejusdem interprete, discendum est, quidquid ad hypothèses ejus spectat. *Strictum* autem & *laxum* supposuisse, & ex hisce principiis omnia de duxisse *Methodicos*, ex dicto *Coelio Aureliano* satis innotescit. An inter genuina *Sorani* referenda sit haec in artem introductio, quae ipsi vindicatur, cum nemine quidem acriter contendam: Sufficiat mihi, placita ejus breviter exposuisse, prout dicta in *introductione* leguntur. De primis artis inventoribus sic differit: Medicinam quidem invenit *APOLLO*, amplificavit *AESCULAPIUS*, perfecit *HIPPOCRATES*. Describit deinde medicum tyronem, qualem tam ratione animi quam corporis eum esse oporteat, eidemque praeter *grammaticam*, *rhetoricam* & *arithmeticam* etiam *astrorum scientiam* commendat, ut nempe eorum ortus & occasus & motus & tem-

& tempora anni cognoscant, quia cum ipsis & corpora nostra permutantur, & eorum mobilitate & perturbatione aegritudines in hominibus commoventur. Imo nec *philosophiae* expertem eundem esse debere, serio injungit. Uti quatuor sunt anni tempora: Ita in totidem partes corpus hominis distingvit, *phlegma* nempe, *sanguinem*, *cholera* *rubeam* & *nigram*. *Phlegma* in capite, *sanguinem* in pectore, *cholera rubeam* in ventre, & *nigram* in vesica residere, & ex hisce 4. humoribus totum corpus constare, credit, quorum quilibet suis locis dominetur, ita ut sanguinis virtus sit circa cor, cholera rubea dominetur in hepate, nigra vero in liene, & phlegmatis alia pars sit in capite, alia in stomacho. Hosce humores sua quoque habere emunctoria, nempe sanguinem per nares, cholera rubram per aures, nigram per oculos, & phlegma per os & nares excerni, ulterius docet, monetque, singulos per singulas dominari aetates. Iidem quatuor humores ipsi quoque sunt quatuor corporis elementa, à quorum etiam varia habitudine varii morbi inducantur. De virtute seu potentia animae sic sentit: Eam totum corpus regere atque ideo triplici virtute, *ζωτική*, *τρεπτική* & *ψυχική* instructam esse. *Ζωτικήν*, vult, esse virtutem vitalem, quae vitam membris vel toti corpori elargiatur atque in corde consistat; *Τρεπτικήν* eam adpellat vim, quae partem tribuit membris corporis; Et *Ψυχικήν* eam adpellat animae virtutem, quae sensum faciat motumque & in capite, i. e. in cerebro residet. De conceptione mulieris hunc sibi format conceptum: Fieri illam viri semine & mulieris sanguine, quamvis & ipsum semen virile sanguinem esse existimet; Unde & majores hos vere cognatos vocaverint consanguineos. In morbis, praecipue vero in febribus, quatuor distincta agnoscit tempora, nempe initium, augmentum, statum atq; declinationem; Quae si non intellexerit medicus, graviter eundem homines laesurum esse existimat.

§. XX.

Inter commentatores vero *Galen*i referendus est *Haly Rodoham*, alias *Eben Rodan* dictus, Aegyptius, physicus ac medicus praestantissimus, qui, *Wolffgango Justo* teste, sub Henrico II. & Conrado II. Imperatoribus Romanis vixit. Edidit autem commentarios in artem parvam *Galen*i, qui deinde variis formis hic & illic recusati sunt.

§. XXI.

Ejusdem magni hujus viri, *Galen*i placita successivis temporibus multi alii medici amplexi sunt, & diffusissima ejus opera in compendium redigere adlaborarunt. Quorum pertinet *Franciscus Valleriola* seu *Variola*, qui seculo decimo quinto artem medicam *Augustae Taurinorum* magno omnium adplausu docuit. Praeterquam enim, quod commentarios tam in librum *Galen*i de constitutione artis medicae, quam in sex libros ejusdem de *morbis & symptomatibus* ediderit: Fundamenta quoque artis medicae secundum *Galenum* concinnavit, in quibus, cum presso pede *Galenum* secutus fuerit: Hinc uberiore eorum, quae dictis in fundamentis praestitit, enarratione possumus supersedere.

§. XXII.

Eodem jure huc quoque pertinet *Hieronymus Thriverius*, qui eodem seculo floruit & medicinam in *Academia Lovanensi* publice professus est. Commentarios edidit non modo in tres libros *Galen*i de temperamentis & unum de inaequali intemperie, sed & in ejusdem *τεχνῶν*. Praecipue vero ejusdem filius, *Dionysius Thriverius*, ab obitu Patris universae medicinae brevissimam & absolutissimam methodum in publicum emisit, quae *Institutionum* formam haud injuria tueri posset.

§. XXIII.

Neque hic omittendus est *Nellanus Glacanus*, Tirconalliensis Hibernus, qui Libris XIII. integrum cursum medicum proposuit & in tres tomos divisit, quorum prior *physiologiam*

logiam & prolegomena, secundus *pathologiam* seu descriptionem morborum, causarum morbificarum & symptomatum, ac tertius *semeioticam* prosequitur, in qua potissimum de signis, crisis, pulsibus & urinis agitur.

§. XXIV.

Jungimus huic *Jobannem Dominicum Maglioccam*, Parthenopolitanum, qui ea, quae argumentum nostrum respiciunt, tribus partibus disputationum medicarum, *physiologicarum*, *aetiologicarum*, *semeioticarum* ac *therapeuticarum* complexus est. Quorsum etiam spectant, quae *Hieronymus Ximenes*, Caesar-Augustanus, hac de re commentatus est.

§. XXV.

Delineata sic *institutionum medicarum*, qualis *Hippocratis* & *Galen*i aetate fuit, facie; Liceat paucis quoque eam adumbrari *Arabum medicorum* temporibus. Praeoccupavit quodammodo hunc laborem *Antonius Deusingius*, Med. ac Phil. D. inque Academia provinciali Groeningae Omlandiaeque Prof. Primar. & provinciae Med. Ord. qui *canticum* principis *Abi-Alis*, *Ibn Sinae*, vulgo *Avicennae* dicti, de medicina, sive, ut *Deusingius* interpretatur, *breve, perspicuum & concinne digestum* institutionum medicarum compendium, ex arabico latine versum, una cum *Jobannis Mesuae*i, Damasceni aphorismis medicis nobis reliquit; Ex quibus duobus opusculis, tanquam totidem speciminibus admodum luculenter adparet, qualis medicinae status ista tempestate, qua ingens regnabat barbaries, extiterit.

§. XXVI.

Natus est *Avicenna* in pago quodam *Bocharense*, nobilitas *regni Bocharensis* ideo cognominatus; Attigit annum aetatis 88. cum 7. mensibus, tandemque colica gravissima correptus, *Hamedanae* obiit ibidemque sepultus est. Lethalem fore passionem hanc colicam, ipse praedixit, eaque de causa omnem sui curationem rejecit, dicens: *Moderator,*

qui in corpore meo est, debilior est, quam ut possit corpus meum moderari; quare non prodest medicatio.

§. XXVII.

Opusculum ipsum *cantici* seu *carminis rhythmi* forma concinnatum est, quod praelaudatus *Deuslingius*, *arabicae* pariter ac *turcicae* ut & *persicae linguae* peritissimus, ex arabico in latinum sermonem vertit, sicque digessit, ut in parte *medicinae theoricæ*, tradita primum constitutione artis generali seorsim in *physiologia de elementis, temperamentis, humoribus, partibus, spiritibus, facultatibus & functionibus*; In *hygiene* de sex rebus non naturalibus, in *pathologia* de morbis eorumque causis & symptomatis & in *semeiotice* de signis tam *diagnosticis* quam *prognosticis* ageretur: In parte vero *practica* praeter regimen sanorum & aegrotantium curatio morborum tam per medicamenta & cibos, quam per *chirurgiam* sisteretur.

§. XXVIII.

Verum ut specialius nobis innotescat, qua ratione *theorica Avicennae* cum ipsa ejus praxi cohaereat, praecipua ejus placita brevissimis excerpta exhibebimus. In *ea theoriae medicae* parte, quam *physiologiam* vocamus, huc fere redeunt ejus sancita: Elementa agnoscit quatuor, aquam nempe, ignem, terram & aërem, idque ejus rei indicium ipsi est, quod corpus, si quando intereat, ad ea necessario revertatur. Temperamenta itidem quatuor, nempe simplicia constituit, *calidum, frigidum, siccum & humidum*; Quam doctrinam in curatione multum juvare medentem, sponte fatetur, sicque ab *Ammanno* plane diversa suo jam tempore sensit, qui eam officere potius quam prodesse existimavit. Humores, ex quibus corpus sit conflatum, cum *Galeno* eosdem admittit, scil. *phlegma, bilem flavam, sanguinem bilemque atram*. Nec alienus est ab hypothese *spirituum*, quos in tres familias distingvit, quarum primam *naturalis*, ex vapore blando puroque constans, componat, alterum *vitalis*, qui in corde purificatus vitam praestet, ac tertiam *animalis*, quod genus

genus *spirituum* in plexu retiformi praeparetur, & per quem sensus & intellectus existant. Et prouti tres *spirituum* tribus agnoscit: Ita totidem quoque *facultates* admittit, *naturalem nempe, vitalem & animalem.*

§. XXIX.

Eodem plane modo in *pathologia* sese gerit, res omnes praeternaturales ad *aegritudines*, earundem *causas* & *symptomata* referendo. Morbum ipsum à quacunque quidem causa in corpore accidere posse autumat, plerosque tamen, exceptis morbis solutionis continui, à praedominantibus quatuor qualitatibus, *calido, frigido, humido atque sicco* derivat.

§. XXX.

Pathologiae ipsa quoque *therapeutice* examussim respondet, quam describit, esse operationum speciem unam, quae rei occurrat per id, quod ei contrarium est. Nimirum, si morbus fuerit à calore, per frigus, aut si fuerit à frigore, per contrarium calorem; aut, si fuerit ab humiditate, per siccitatem, si vero fuerit à siccitate, per contrariam eum vult curandum humiditatem. Ita porro repletionem putat profligari per evacuationem; Si ab obstructione ortum traxerit aegritudo, sanandam eam esse arguit per apertionem in eo, quod occlusum est, & sic in caeteris. An vero tali ex systemate vel aegrotantes vel medici ipsi multum solatii sint petituri, aliis curatius dijudicandum relinquo.

§. XXXI.

Qui vero haec medicorum Arabum dogmata juventuti tradere sategerunt, eidem quoque de *Institutionibus*, prospicere adlaborarunt, quorum in numero est *Georgius Kraut*, Hagenoënsis, quique libellum introductorium de principiis universalibus totius medicinae tam theoricæ quam practicae ex *Avicennae* aliorumque doctrina digessit. & tabulis maximam partem illustravit. Prodiit in folio
cum

cum *Galeatii de S. Sophia* in nonum *Rhasis* commentariis ab eodem emendatis.

§. XXXII.

Huic subjungimus *Andream Gratiolum*, *Salodianum*, qui primum *Avicennae* librum de universalibus medicae scientiae praeceptis interpretatione ac scholiis, *Hippocratis* atque *Galen*i praecipua loca commonstrantibus, illustravit.

§. XXXIII.

Ad scripta autem veterum, inprimis *Hippocratis* & *Galen*i recte intelligenda suas digessit *Institutiones Leonardus Fuchsius*, qui partim in *Ingolstadiensi*, partim vero in *Tubingensi Academia* cum laude artem medicam publice professus est. Strenuum fuisse *Galen*i sectatorem, ipsemet ingenue confitetur, additque titulo, institutionibus ejus praefixo, illas ad scripta *Hippocratis*, *Galen*i aliorumque veterum recte intelligenda mire utiles esse, id quod etiam citra vanam advertisementem facile concesserim. Coeterum scriptorum *Arabum* tam superbus contemptor tamque acris insectator fuit, ut nullam illorum dogmata profligandi vel explodendi occasionem facile praetermiserit.

§. XXXIV.

Comprehenduntur vero *Institutiones Fuchsianae* quinque distinctis libris, in quorum primo de medicina generatim, & sectione quidem prima de medicinae origine, incremento, perfectione, praestantia, definitione, methodo tractandi & partibus, quibus universa scientia constat, differitur, nec non de medicorum sectis, distributione artis in tres distinctos ordines, quorum primus earum est rerum, quae corpus humanum constituunt, quasve naturales vulgo adpellant, uti sunt quatuor vulgaria elementa, temperamenta, calidum, frigidum, humidum & siccum, humores itidem, ceu sunt pituita, sanguis, bilis tam flava quam atra, nec non partes humani corporis, quales sunt caro, os, membra-

membrana, nervus, vena, arteria, cor, jecur, caput atque manus, ipsaeque facultates & actiones, uti sunt vitalis, naturalis & animalis, tandemque spiritus, quos tanquam instrumenta actionum considerat, atque in animales, vitales & naturales distingvit; Quae omnia sectionibus frequentibus ad octavam usque prolixius prosequitur.

§. XXXV.

In *libro secundo*, pertractantur res vulgo dictae *non naturales*, quae, licet naturam & constitutionem corporis humani non ingrediantur, nec ejusdem essentiam compleant, illud tamen alterant, ac, nisi oportune ac salubriter adhibeantur, sanitatem & naturam hominis destruunt, uti sunt aër, corpora nostra ambiens, cibus & potus, motus & quies tum universi corporis tum singularum ejus partium, & vigilia, excretio & retentio, quorum omnium agmen claudunt perturbationes animi.

§. XXXVI.

Tertio libro sistuntur res praeter naturam, ubi morbi non modo natura in genere, sed & ejusdem causae atque differentiae secundum partes similes & instrumentarias declarantur, addida definitione symptomatis in genere ejusdemque differentiis, nec non febrium omnium brevi ac dilucida explicatione, quam enarratio vitiorum capitis, thoracis, abdominis & articularum subsequitur.

§. XXXVII.

Libro quarto agitur de signis medicis, quam *Institutionum* partem alias *Semeioticam* vocare consueverunt, ubi non tantum de signorum utilitate variisq; eorum generibus, sed & de temporibus morborum eorundemque usu & dignotione differitur, subjuncta tractatione de crisibus seu judiciis sive bonis sive malis, tam praesentibus quam futuris, eorundemque notis atque indiciis, de eorundem differentiis & modis solutionum in morbis, num per excretionem

vel abscessum futurum sit iudicium, ac denique de diebus decretoriis, quaeque mortis citra iudicium futurae notae sint, imo, qua ratione ipsius mortis dies & hora praecognoscenda sit? Quod ultimum curiosa disquisitione non est indignum & magnam insuper famam atque auctoritatem medico conciliare potest. Cumq; non minus urinarum perita atque prudens inspectio plurimum momenti conferat ad morbos quosdam tum cognoscendos, tum ad eventus eorundem circumspecte dijudicandos: Hinc de urinis succinctam adhuc tractationem subiecit atque ostendit Auctor, non modo, qua ratione illa inspicienda sit, sed &, quid varii urinarum colores, consistentia, quantitas, innatantia ramenta, capilli, aliaeque corpuscula in urina dispersa, bullae & contenta varia eorundemque loca portendant? Ac denique, cum ex egestionibus quoque, v. g. sputo, sudore &c. varia praedici queant: Hinc earundem varias significationes exponere consultum duxit, ita tamen, ut pulsuum quoque doctrinam breviter perstringeret, quae quippe pariter est ex numero earum rerum, ex quibus futura medici praesagire solent.

§. XXXVIII.

Restat quinta & postrema *Institutionum Fuchsonianarum* pars, quam de curandi ratione inscripsit, alias vero *therapeutica* vocari consuevit. In hac non modo generatim tradit, quid sit indicatio, coindicatio & contraindicatio, sed &, quid morbi natura & temperamentum, vires insuper, consuetudo, aetas, regio, tempus anni & constitutio coeli, laborantis partis conditio & alia talia speciatim indicent? Quid insuper perito Practico faciendum incumbat, contrariis ipsi indicationibus occurrentibus? Quam totam tractationem commendatione scriptorum quorundam, ex quibus mendendi praecepta haurienda sint, obsignat.

§. XXXIX.

Quanquam autem hisce omnibus aditum planum ad
veterum

veterum scripta & fructuose legenda & recte intelligenda patefecerit *Fuchsius*, qui etiam unicus ejus scopus fuisse adparet: Attamen ab erroribus immunem mansisse eundem, praeter multos alios jamdudum animadvertit *Conringius*. Is enim *Fuchsius* imputare non veretur, quod ob solam Philosophiae ignorationem in gravissimum istum errorem imprudenter prolapsus sit; *Mortem esse substantiam*: Quo ipso tamen universam Pathologiam non parum turbaverit; Fuisse caeteroquin acerrimum *Galen*i defensores & calcasse eundem vestigia quorundam Italorum, qui ne latum quidem unguem ab *illius* placitis recedere ausi sunt, atque adeo in Magistri hujus verba quasi jurarunt. Hanc tamen ipsi laudem neque invidet neque detrahit, quod profugatis explosisque *Arabibus*, artem medicam ex *Galeno* desumptam primus in Germania repurgaverit, & quod proinde magna injuria manibus Juvenum excutiantur ejus scripta, quum Patrum avorumque memoria doctissimi quique tum Itali Gallique tum Hispani cum eo disputare non erubuerint, id utique, *Conringii* judicio, non facturi, nisi praeclara eum doctrina instructum fuisse, sibi persuasisent.

§. XL.

Ianus Cornarius, ab aliis *coronarius* dictus, seculo decimo quinto vixit & *Hippocratis*, *Galen*i, *Aëtii*, *Aeginetae* aliorumque veterum medicorum scriptorum versione in sermonem latinum, id quod ante ipsum nemo ausus fuerat, magnam sibi famam comparavit. Praeter multa alia scripta, quorum seriem in *Lindeno renovato de scriptis medic.* legi licet, etiam *ἐπιγραφήν* seu enumerationem universae rei medicae edidit, quae indoli temporum, quibus vivebat, est adcommodata.

§. XLI.

Spectat huc *Bassiani Landi*, qui *Montani* discipulus ac postea in Gymnasio Patavino collega fuit, iatrologia seu dialogi II. quibus universae artis medicae, praecipue ve-

ro morborum omnium & cognoscendorum & curandorum absolutissima methodus sistitur.

§. XLII.

Eodem seculo floruit *Hieronymus Montuus*, qui compendiolum curatricis scientiae edidit, indoli temporum, quibus vivebat, pariter adcommodatam.

§. XLIII.

Hujus quoque loci est *Leo Suavius*, qui *Theophrasti Paracelsi* philosophiae & medicinae universae compendium ex optimis quibusque ejus libris cum scholiis in libros IV. ejusdem de vita longa, mysteriorum, ut sibi blanditur, plenos in publicum emisit.

§. XLIV.

Pertinet ad eadem haec tempora *Johannes Crato à Crafftbeim*, Wratislaviensis, trium Imperatorum Romanorum archiater, consiliis medicis, quae edidit, admodum clarus, qui philiatrorum conatus adjuturus, non solum *isagogen medicinae*, sed & *μικροτεχνν* seu parvam artem medicinalem edidit; Quibus in scriptis principia artis tradere adlaboravit.

§. XLV.

Idem argumentum explicandum sibi sumpsit *Laurentius Scholtzius à Rosenow*, Wratislaviensis, Silesius, consiliis & epistolis medicinalibus, quas edidit, clarus, & felix *Cratonis* imitator, cujus etiam consilia & epistolae medicinales, ut in publicum prodirent, ipse curavit. Reliquit vero etiam, qui propius ad rem nostram spectant, *aphorismos medicinales*, cum theoreticos tum practicos, quibus universam artem succincte & forma aphoristica tradere adlaboravit.

§. XLVI.

Ernestus Fridericus Fabricius medicinae utriusque tam Galenicae quam Hermeticae anatomen philosophicam exhibuit, qua brevem, & succinctam & perspicuam absolutae

lutaе artis medicae sciagraphiam oculis subjicere conatus est.

§. XLVII.

Eodem studio flagravit *Simeon Partlicius, de Spitzberg*, qui universi systematis medici harmoniam meditatus est, in qua nova plane & ut titulus habet, artificiosa discendae & exercendae medicinae methodus per breviora praecepta traditur, per canones selectos illustratur, & commentaria dilucida explicatur; Elucubratum est opusculum ex dogmaticorum aequae ac hermeticorum scriptis, assiduis vigiliis & accurata theoricae & praxeos observatione comparatum.

§. XLVIII.

Ad eandem hanc scriptorum seriem pertinet *Petrus Severinus*, qui ideam medicinae philosophicae, fundamenta continentem totius doctrinae *Paracelsicae*, *Hippocraticae* & *Galenicae* orbi erudito exhibuit; Quam *Wilhelmus Davissonus* non modo commentariis illustrare, sed & praeter *Paracelsicas*, *Hippocraticas* & *Galenicas*, etiam *Platonicas* doctrinas explicare cordi habuit. Quas omnes in unam & harmonicam conspersionem redigere, non levis sane negotii res est. Taceo, rem medicinae admodum nocivam atque damnosam esse, philosophicis doctrinis eandem superstruere velle, quae quippe eam certissime confundunt & alienis obruunt.

§. XLIX.

Johannes Pancratius Bruno, Altdorffinus, Lexici medici *Castelli*, quod renovavit, à plurimis mendis & vitiosis allegationibus repurgavit, & innumerorum pene vocabulorum accessione locupletavit, editione satis notus, non modo *Casparis Hoffmanni* isagogen medicam edi curavit, sed & manum ipse operi tali admovit, in publicum emittendo praecepta medicinae generalia, quae in ordinem redegit, à rebus extraneis, quibus prohdolor! referta, depuravit, & ad vera artis medicae principia adcommoavit. Etiam si autem in permultis scopum, quem praefixum sibi habuit, non ubique obtinuerit: Voluntas tamen est laudanda.

§. L.

Mauritius Hoffmannus, itidem *Aldorffius*, in inclyta Norimbergensium Universitate P. P. *institutionum medicinae*, quas laudabili exemplo in cathedra disputandas publice proposuit, nova methodo concinnatarum, & ex natura sanguinis deductarum, *synopsin* nobis reliquit, in quibus & artem breviorē & vitam simul longiorem polliceri ausus est. Uti vero prius discētibz admodum gratum: Ita posterius potissimum est, quod plerique in votis habent, nihil obstantibus aerumnis, quibus vita humana communiter exposita est.

§. LI.

In praefatione, opusculo praemissa, conquestus est, famam suam, quam, ut ipse loqui amat, praedones quidam ipsi suffurari fuerant conati, varias ipsi absurditates adfingendo, rodi ac sugillari. Titulus scripti hic est: *Prudentiae medicae ex sanguine pro salute mortalium agendorum rationes, exponentis fundamenta, disputationibus publicis proposita*. Statuit is, ex sanguine, animam cum corpore jungente, vitamque ac valetudinem promovente, & cujusque *ἰδιοσυμπασίαν* constituyente, omnem vitae sanitatisque rationem derivandam esse: Unde non modo *omnipraesentiam* & *omnipotentiam* eidem adscribit, sed & varias differentias illi adfingit, aliusque illi sanguis *cephalicus* & *epilepticus*, alius *pectoralis* & *phthysicus*, alius *hypochondriacus* & *scorbuticus*, alius *nephriticus* & *arthriticus* & alius denique *spermaticus* & *hystericus* dicitur. Provocat hinc ad experientiam, quam XLIV. annorum spatio partim docendo, partim medendo sibi adquisiverit; Nec ipsum unquam poenituisse, addit, huic methodo constanter inhaesisse: Hanc enim se fideliter secutum, semper cum successu praxin medicam exercuisse adseverat. An veri quippiam sub hac fama, quae malum est, quo non deterius ullum, latuerit, ex hoc specimine dijudicent alii. Aures ferire phrasēs, *omnipotentiam* & *omnipraesentiam* tribuere sanguini, negandum non est. Sed audienda est suis exceptionibus & explicationibus altera pars.

§. LII.

§. LII.

Andreas Buxbaum, catechesin medicam, per modum dialogi propositam edidit, ex qua in arte medica initiandos artis principia, neotericorum hypothesebus adcommodata, facili negotio addiscere posse pollicetur.

§. LIII.

Iohannes Riolanus, Ambianus, Pater, quem *Merklinus* in *Lindenio renovato*, doctrinae Hippocraticae adversus chymistas acerrimum vindicem vocat, universae medicae compendium seorsim primum evulgavit, quod tamen deinde cum operibus ejus junctim editum est.

§. LIV.

Iohannes Daniel Horstius, praeter Anatomica varia, etiam manuuctionem ad medicinam reliquit, quam studiosae Juventuti in Academia Marpurgensi praelegit. Sicuti *Henricus Regius*, de Roi alias dictus, Ultrajectinus, fundamenta medicinae in *Ultrajectina* suos docuit. Iungimus huic *Olaum Wormium*, Arhusiensem Cimbrum, qui in Haffniensi Danorum Academia institutionum medicarum compendium, quod emisit, publice praelegit.

§. LV.

Petrus Servius, Spoletinus, institutionum Libros IV. quibus tyrones ad medicinam manuducuntur & informantur, edidit, una cum duabus prolusionibus, ad instruendos inflammandosque ad artem tyrones adcommo-
datis.

§. LVI.

Similiter *Sebastianus Meyerus*, Landsbergius, institutiones medicas concinnavit, de quibus ipse praedicare non dubitat, eas omnes medicinae locos solidaque totius artis fundamenta distincte, breviter ordineque complecti, imo & quibusvis litteratis proficuas esse.

§. LVII.

§. LVII.

Georgius Wolffgangus Wedelius, multis scriptis clarus, the-
oremata medica seu introductionem ad medicinam, certis
theorematis, juxta ductum institutionum medica-
rum absolutam, ad legendum aequae ac disputandum,
quae laudabilis ejus consuetudo erat, proposuit.
In *praefatione*, adducturus causas, cur, tot scriptis in
lucem editis, non magnum aequae incrementum ceperit
medicina, quin nec illa stabilita satis sint, quae funda-
mentorum loco instillari animis discentium solent, hasce
potissimum refert: *Partim, quod complurium sententias citra ju-
diciū compilasse novus saepe liber vocetur, partim, quod vetusta sor-
deant, & paradoxa saltem novitatis specie arrideant; Quod porro
eadem merces diversis saltem fornicibus expositae inveniantur, ut,
dum aliam quaeras, eandem invenias; Quod jurare in verba magi-
stri plurimi consueverint, quod controversis tempus teratur, iisque
veritas saepe obnubiletur potius, quam in lucem exponatur; Ex
quibus singulis infert Wedelius: Medicinam in quam plu-
rimis nihil fuisse aliud in hoc usque seculum, quam con-
tinuam novationem in antiqua ignorantia. Quae etiamsi lubens
suo loco relinquam, & aphoristica haec forma, qua Hippoc. non
infeliciter est imitatus, captui discentium eximie sit a-
daptata, fatendum tamen libere est, multa fermentum ve-
terum de calido innato, humido radicali, flammula vitali, spiritibus
&c. redolere, de quibus merito dubitandum, an delicato
modernorum palato sint placitura.*

§. LVIII.

Eadem aphoristica forma conscripta quoque est *San-
ctorii à Sanctoriis* medicina statica, quae una cum *Martini
Listeri* commentario VII. aphorismorum sectionibus com-
prehensa Lugduni Batavorum A. 1703. iterum prodiit.

§. LIX.

Inter opera medica *Gregorii Horstii*, senioris, reperiun-
tur quoque imo potius reliquis eorum partibus praemif-
fae

fae sunt *institutiones medicae*, XX. disputationibus comprehensae, in quarum IV. primis de medicina in genere, de elementis ac temperamentis, de partibus H. C. earumque actionibus, de anima ejusque facultatibus nec non de sanitate C. H. egit. A quinta ad undecimam usque morbi indolem in genere una cum praecipuis suis differentiis discussit, nec non causas tam morborum quam symptomatum ad examen vocavit. *Duodecima* & sequentibus disputationibus de signis tam diagnosticis quam prognosticis differuit; *Decima septima* egit de methodo medendi in genere, & *vigesima* demum materiam medicam breviter ob oculos posuit.

§. LX.

Ut vero singulas hasce *institutionum* partes percurramus, & quid in illis contineatur, in synopsi exhibeamus, nec propositum nostrum patitur, nec opus est, cum, quid de *Horstianis* hisce *institutionibus* sentiendum sit, philiatrum nostri ex uno vel altero specimine intelligere & aestimare nullo negotio possint. Ia v. g. ut ex sola *physiologia* aliqua tantum exempla proponamus, quaerit is, an medicina sit scientia, & si hoc, an illa sit theoretica vel practica? An C. H. sit medicinae subiectum? Et an illud unico vel pluribus medicis sit committendum? Quot sint elementa, & quot inter illa calida, quot frigida? An elementa sint in mixtis actu secundum formas substantiales? An complexio sit substantia? An melancholicus, vel is, qui iustitiale temperamentum habet, propior sit aequalitati ponderis? Et quae sunt ejus farinae plura, ex quibus an multum solatii sit petiturus medicus tyro, aliis mature perpendendum relinquo.

§. LXI.

Johannes Beverovicus, Dordracenus Belga, ideam medicinae veterum secundum ductum *institutionum medicarum* quidem concinnavit, cujus tamen hic neutiquam eo fine mentionem facio, quasi crederem, philiatros ex ejus lectione in medica scientia proficere multum posse, sed ut specimen aliquod

aliquod ipsis exhiberem, quod in litterarum humaniorum cultura, cum medicina conjungenda, ipsi imitarentur. *Beverovicium* nostrum, qui diligens magni illius litteratoris, VOS-
SII, discipulus & auditor fuit, tantus litterarum elegantio-
rum amor ceperat, ut, cum deinde ad medicinam addiscen-
dam, hortatu *Vossii*, serio sese adplicaret, philologiae studi-
um ex animo suo dimittere difficulter posset: Quare, quae-
cunque apud utriusque linguae, graecae pariter ac romanae, po-
etas, philosophos, historicos, oratores, philologos, artem medendi tan-
gere videbantur, inter legendum ita notavit, congeffit & disposuit,
ut ea, quae praedictis antiquorum scriptis dispersa esse vi-
derentur, ratione & distributione sub uno aspectu pone-
rentur: Unde ex non medicis nata est idea medicinae veterum,
quam hoc nomine donavit Auctor, quod nulla artis par-
te omissa referat, quicquid de singulis antiquitus creditum
est. Quisquis ergo librum hunc sedulo eolverit, nullo
fere negotio brevi tempore addiscet, quod alii vix diutur-
na antiquorum lectione adquirere sibi poterunt.

§. LXII.

Carolus Wittestein, sive à *petra alba*, *Placentinus*, veram
totius medicinae formam ad *Sereniss. Alexandrum Farnesium*,
Placentiae & Parmae Ducem perscripsit, ita quidem, ut, cum
varia sint hominum ingenia, aliis nuda veritate conten-
tis, aliis vero disceptationes & subtiliora requirentibus, in
textu omnia, quae ad artem ipsam necessaria visa fuere,
adducerentur, in margine vero, quae tum delectatione
tum speculatione animae satisfacerent, adderentur.

§. LXIII.

Forma haec medicinae talis est: Praemissis paucis de
ejusdem inventione & constitutione generali, agit primum de
elementis, quae cum *Aristotele* numero quatuor, non plura,
nec pauciora agnoscit, nempe ignem, aërem, aquam atq;
terram. De temperamentis agens, tantam ex ingeniosa ho-
rum investigatione utilitatem pollicetur medico, ut, quic-
quid

quid universa ars medica magni habet, inde originem suam ducat: Cum sine illis nulla corporis sani, vel aegri vel quod neutrum dici posset, vera sit cognitio; Nulla medendi methodus, nulla universalis cognitio artis formari possit; Nil praedicere, nil denique cum dignitate medicus facere, ejus doctrinae ignarus queat &c. Videant igitur recentiores, ne in hodierna artis medicae luce pudore suffundantur à scriptore, qui lumine hoc destitutus, de usu tamen doctrinae hujus longe saniora illis cogitata fovit.

§. LXIV.

Johannes Nicolaus Stupanus, Hungarus, M. D. ejusdemq; in *Academia Basileensi* Prof. P. medicinam theoricam, ex *Hippoc.* & *Gal.* physiologicis, pathologicis & semeioticis libris in theses contraxit summatimque ad disputandum publice proposuit, ratus, ea melius inter disputandum intellectum iri, quae primum audiendo minus distincte comprehensa fuerint. Itaque laudabili hoc suo exemplo jam ante integrum, & quod excurrit, seculum aliis praeivit, qui eandem hodieque viam ingrediuntur, ac disputando praecepta medica aliis clariora reddere adlaborant.

§. LXV.

Praemisit autem *practicis* artis partibus *theoreticas*, quae quippe naturae ordine *illis* sunt priores, & *practicis* scientiis fundamenta subministrant. Eas vero sic digessit, ut, expositis in parte *physiologica* praeliminaribus de medicinae praestantia, ejusdemque sectis, speciatim de arte empiricorum, dogmaticorum & methodicorum, & in quibus inter se mutuo conveniant vel differant &c. libro *secundo* de elementis, *tertio* de natura hominis secundum *Hippocratem* itemque de officina sanguinis venarumq; principio, ac *quarto* de temperamentis agat. Hinc partes C. H. compendiose recenset, atque tunc demum animae humanae facultates & functiones animales ac vitales tandemque naturales earumque actiones & instrumenta exponit, totiq;

tractationi finem imponit doctrina de spiritibus, quibus animam ad functiones suas edendas uti, suo jam tempore credidit; Ut vehementer miremur, dogma hoc à nonnullis *Stablio* ceu inventori tribui, & *naturam* hanc ridicule *Stablianam* vocari, cum *Aristoteles* una cum universo *Peripateticorum* choro animam humanam ceu principium universale omnium actionum, in C. H. observandarum agnovit; Qua de re alibi latior differendi campus nobis aperietur.

§. LXVI.

In *pathologica* theoriae medicae parte proponit ante omnia sanitatis morbique essentiam primaque morborum genera, progreditur hinc ad causas eorundem universales explicandas indeque symptomatum differentiis maxime principalibus enarrandis sese accingit, tandemque causis symptomatum, tam penes laesas actiones sensitivas & motrices, quam etiam naturales, immoderatas nempe excretiones, retentiones affectusque corporis consistentium postremum tribuit locum.

§. LXVII.

In *tertia* theoriae medicae parte *semeioticam universalem* proponit, & quamvis signa distingvat in *salubria* & *neutra*, omnibusque suam competere utilitatem, sponte fateatur, *insalubrium* tamen rationem potissimum habendam esse docet, quod horum *tanto evidentior usus existat, quanto magis conspicua est medici actio, in abigendis morbis occupata, quam ea, quae in sanitate tuenda, praeservandisq; morbis versatur.* Uti vero reliqua omnia ex *Hippoc.* & *Gal.* scriptis hausit: Ita ex iisdem fontibus quoque deprompsit, quae in *semeiotica* tradit.

§. LXVIII.

Pertinet huc *Johannes Fernellius*, vulgo *Ambianus* dictus, qui, licet *Claramontio* oppidulo natus & educatus esset, *Ambianus* tamen suis in operibus ideo dici maluit, quod Patrem inde oriundum habuerit, sicuti pleraque vitae *Fernellianae*



lianae memorabilia *Guilielmus Plantius*, ejusdem familiaris, non sine facundia nobis exposuit. Suas autem *medicinae Institutiones*, ut plerique alii facere consueverunt, a *physiologia* auspicatur, quam integris septem libris declarare contendit. In primo eorum non modo partium humani corporis tam simplicium quam compositarum descriptionem una cum earundem usu sistit, sed & ipsam confectionis rationem more Anatomicis solemni exhibet, suadendo ei, qui dictarum partium historiam consequi cupit, ut alio in cadavere musculorum, in alio ossium exsiccatorum aptisque compagibus revinctorum, in alio viscerum internorum, in alio venarum, in alio arteriarum ac denique in alio nervorum confectionem instituat. Atque in hac partium humani corporis historia firmissimum artis medicae fundamentum positum esse confidit, quia eadem plane necessitate, uti ad historiae fidem *Geographia*; Sic ad rem medicam corporis humani descriptio pernosceda est.

§. LXIX.

Quo vero tyronibus artis utilior est historia partium humani corporis: Eo sterilior est doctrina de elementis, quam *libro secundo* exhibet: Illud enim profecto studia Philiatorum parum admodum promovebit, siue sciant siue ignorent, quae medicis in corpore partes elementa, quaeque principia dici debeant? Quibus rationibus terra, aqua, aër & ignis omnium rerum elementa dicantur? Et quomodo corpus hominis, ut caeterorum omnium, ex quatuor elementorum concretione nectatur & contineatur? Qua ratione elementa inter sese mutuo permisceantur? Utrum eorum substantia, an qualitates solae totis totae perfundantur? Neque multum illos solabuntur acriores disputationes adversus Juniores institutae, qui elementorum solas vires, non vero substantias nobis inesse, existimarunt; Et quae sunt ejus farinae plura, quae, siue sciantur siue ignorentur, arti sane felicius addiscendae parum vel nihil velificabuntur.

§. LXX.

Quae in *tertia* Physiologiae suae *parte* de temperamen-
tis differuit *Fernelius*, longe utique majorem sponderent u-
tilitatem, si condigne pertractata essent. Jam vero per
temperamentum nihil aliud intellexit, quam concentum
quendam quatuor principum qualitatum, ex omnium e-
lementorum permissione ortum. Cumque quatuor
tantum sint, ex quibus temperamentum confi-
citur: Hinc singulorum exuperatione simplices qua-
tuor creari temperaturas concludit, nempe *calidam*, *fri-*
gidam, *humidam* & *siccam*; Similiter quatuor conjugatas esse
temperaturas, quae duarum simplicium exuperatione pro-
cedant seque efferant, nempe *calidam* & *humidam*, *calidam*
& *siccam*, *frigidam* & *humidam*, *frigidam* & *siccam*. Caeterum
innumeras esse particulares temperamentorum differenti-
as non diffitetur. De *temperamento ad pondus* aequae ac *ju-*
stitiam pronunciat, utrumque in rerum natura vere subsi-
stere, & cum compositi corporis temperamentum ex inser-
tis elementorum portionibus aestimare, nihil sit aliud,
quam cognitionem, multis difficultatibus obstructam su-
scipere: Hinc discernendorum temperamentorum nul-
lam aliam esse legem, nullos alios judices, quam sensus
hominis, & inter illos praecipue tactum, quorum quippe
beneficio notiones rerum animis imprimantur. Frustra
autem sine dubio laborat in temperaturis singularum cor-
poris humani partium tam externarum quam internarum
internoscendis, quae quippe omnem suam temperaturam
a sanguine tantum reliquisque humoribus per partes tran-
seuntibus nanciscuntur. Agnoscit tamen lubens, multis
ex causis temperamentum ingenitum commutari: Unde
aetatis progressu cujusque temperamentum vertitur atque
commutatur; Quam etiam ob causam antiqui ratione ae-
tatis differentias in temperamentis agnoverunt. Illud ve-
ro miror, nullum temperamentum *biliosum*, nullum *sangui-*
neum, nullum *melancholicum* dici oportere, nimis acriter no-
strum contendisse *Fernelium*. Neutra saltem rationum ab
ipso allegatarum id sufficienter evincere videtur.

§. LXXI.

Interea pergit ad *Librum quartum*, in quo de spiritibus & calido innato agitur, quam doctrinam omnem ex veterum monimentis haustam esse, cuius facillimum est perspicere. Supponit autem hic calorem quendam eumque divinum non nobis tantum hominibus, sed & cunctis aliis viventibus inesse, cujus beneficio alimentum trahant, conficiant, eoque nutriantur ac sustententur, augeant, procreent animantes, praeterea sensu adficiantur & moveantur; Is vero calor cum sine vehiculo in omne corpus permeare & huc illucve momento diffundi non videatur: Hinc inducti fuere ad credendum veteres, calorem istum in corpore aliquo fluxo & profluente contineri. Atque ideo necesse fuit, calori isti materiam substernere tenuissimam, aëreo-aetheream, pernecitate velocem, quae simul fovendo calori familiaris esset & amica, quam spiritus nomine, h. e. corporis aetherei, quod simul caloris facultatumque sedes & vinculum, primumque obeundae functionis instrumentum esset, insignire placuit. Ast cum spiritus iste, calore perfusus habere debeat, in quo confideat, quoque alatur ac sustineatur: Hinc adoptatur adhuc humor pingvis & oleo perquam similis, quem *humidum primigenium* adpellare placuit. Ex quibus omnibus, in summam redactis id tandem consequitur, *calidum innatum* nihil esse aliud, quam *humidum primigenium*, insito spiritu & calore undique perfusum; Id nempe humidum, cui spiritus & calor ab ortu est inditus, in quo salvus viget & conservatur: Quibus proinde tribus inter sese mutuo junctis *calidum innatum* contineri, ex veterum mente hoc modo declaravit *Fernelius*. Denique cum admodum aequivocum sit vocabulum *naturae*: Hinc indolem ejus breviter sic exponit: Quod sit vis prima & causa per se, nostri opifex & conservatrix. Sermo autem est de *natura humana*, de qua proinde praedicat: Eam soli homini addictam, quem confirmavit, gubernare, quantum potest, longissime; Eam, ne frustra condidisse videatur, edito operi in omni
vita

vita infidere, id nunquam deferere, sed ejus gubernacula tractando, partes omnes in suum opus ducere & concitare, ita ut illa ipsa simul omnium functionum causa censi debeat.

§. LXXII.

Proximum nunc locum vindicat disquisitioni animae ejusdemque facultatum, quae quippe corpori organico vitam confert actionesque vitales inducit. Ast cum nihil sit taediosius, quam toties entia citra omnem necessitatem multiplicare: Hinc universam illam facultatem animae doctrinam, tanquam ex lacunis *Galen*i haustam, merito mittimus, paucis tantum hic praesupponentes, alibi vero plenius demonstraturi: Animam, eamque rationalem omnium oeconomiae humanae functionum & actuum, rationalium nempe, animalium atque vitalium fontem atque principium esse.

§. LXXIII.

Cum autem facultatibus tanta cognatione *functiones* cohaereant, ut aliarum ex aliis cognitio peti debeat: Hinc jam a facultatibus tanquam a causis conversione facta, articulatim *libro sexto* edisserere contendit, qua lege, quo ordine usae suis illae spiritibus suisque particulis & temperamentis tanquam instrumentis functiones omnes suas compleant, ut simul inde partium omnium C. H. commoditas & usus in promptu sint & eluceant. Quemadmodum vero dicto *sexto libro* functiones omnes in homine jam genito omnibusque suis partibus absoluto scrutari & explicare conatus est: Ita *septimo* in primis in eo, qui gignitur & in lucem profertur, omnem suam attentionem figit: Ubi quidem in singularum functionum explicatione quam plurima occurrunt, quae animadversione haud indigna forent, quae tamen omnia paginarum harum angustia non capit.

§. LXXIV.

Convertimus nos potius ad examen *pathologiae Fernellianae*, quae *septem* iterum libris comprehenditur. In primo genera-

generatim de morbis, eorum differentiis & causis differitur; In *secundo* de symptomatis & signis; In *tertio* de pulsibus & urinis; In *quarto* de febribus; In *quinto* de partium morbis & symptomatibus; In *sexto* de affectibus partium, quae sub diaphragmate sunt; Et in *septimo* seu *postremo* de externis corporis humani morbis agitur. De hisce vero omnibus, imprimis doctrina de febribus polliceri non veretur, quod non pauca legenti sint occursura, aut penitus à majoribus praetermissa, aut non satis explicata, aut ab illis interdum dissidentanea, sed quae tamen ut ratione stabilita, ita & longo medendi usu comprobata sint. Atque ideo magna sui fiducia fretus subjicere non dubitat: Sic decere investigatorem veri, non solum quae legerit, sed & quae ipse secum meditando consideraverit & contemplatus fuerit usuque tenuerit, cognitione dignissima in communem usum proferre.

§. LXXV.

Sicuti autem tam *Physiologiae* quam *Pathologiae* septem cuilibet libros seorsim destinavit *Fernelius*: Ita totidem etiam *therapeuticae* universali seu medendi rationi sacros fecit. In *primo* fundamenti loco substernitur, medicinae leges legibus naturae debere esse consentaneas; Deinde de officio medici, remedium inventionem, eorundem quantitate definienda, de tempore, quo adsumenda sint, nec non de forma & ratione praecepta generalia inculcantur. In *secundo* de evacuatione per venae-sectionem agitur, cujus tamen non solus *evacuatorius* sed & *revulsorius* ac *derivatorius* effectus solide, ringentibus licet plerisque Neotericorum, adstruitur, & singuli morbi, quibus vel praesentibus vel futuris vena secta succurrit, enumerantur, habito insuper prudenti selectu venarum secundarum, cum non sit indifferens, quamcunque venam quocunque in adfectu secare. Neque hic neglexit indicare, quid spontanea sanguinis eruptio in morbis conferat, quibusve signis morbi magnitudo & virium robur comprehendantur, pro quorum quippe indicatione mit-

tere vel non mittere sanguinem oporteat? Quomodo evacuationis quantitas ex morbi magnitudine & virium robore aestimanda sit? Quomodo praesentia aeque ac praeterita prudenter observanda, ut ex illis certior evacuandi quantitas judicetur? Quo morbi tempore sanguis sit mittendus? Qua ratione corpus ante venaesectionem debita & idonea ratione praeparandum? Quid ipso sectionis tempore faciendum? Ut à venaesectione aeger sit regendus? Quibus omnibus pauca adhuc de arteriotomia, de particulari sanguinis vacuatione, scarificatione, cucurbitulis &c. adjiciuntur.

§. LXXVI.

Libro tertio methodi medendi de purgandi ratione disputatur, quorsum non modo catharsis, emesis & clysterum in anum injectio pertinet, sed & ad evacuationes particulares per errhina, apophlegmatismos & bechica ista purgandi ratio restringitur. *Libro quarto* de summis medicamentorum generibus & facultatibus more *Galenicis* solemni differitur. *Quinto ac sexto* usitata tam internorum quam externorum medicamentorum materia sistitur: Et *septimo seu ultimo libro* remedia composita exhibentur, quo ordine agitur primum de syrupis, electuariis & pilulis, deinde de antidotis tam solidis quam humidis, porro de trochiscis seu pastillis nec non de eclegmatis atque conditis &c. Ad externa vero medicamenta referuntur olea, unguenta & emplastra &c.

§. LXXVII.

An *Johannis Heurnii*, medicinae olim Professoris in *Academia Lugduno-Batava* & Principis *Auriaci* Archiatri *Institutiones medicae* hoc delicato seculo, quo novam vestem universa ars induit, multis placiturae sint, admodum dubito. Ipse *Heurnius* in epistola dedicatoria ad *Henricum Ranzovium*, Pro-Regem in Ducatibus *Sleswicensi*, *Holsatiae* atque *Dithmarsiae* sponte fatetur, theses esse ex suggestu Academico praecipitatas & à discipulis suis (quos inter *Petrum Pavium* laudat, qui

qui etiam postea in eadem Academia professioni publicae admotus est) ex dictantis ore exceptas & ipso tandem adnuente in publicum emissas esse. Cui accedit, quod nimis stricte *Aristotelis Galenique* placitis inhaereat, & hujus ultimi more multa de facultatibus aliisque talibus rebus frigide differat, quae hodie in auribus studioforum non debent non molestum stridorem & in animo ipso fastidium parere.

§. LXXVIII.

Agit autem *libro primo*, postquam de medicinae natalibus, sectis, earumque placitis, nec non de artis definitione ac divisione paucula pro more *Institutionistarum* praelibaverat, de elementis, quo nomine intelligit minimam, i. e. simplicissimam partem ejus, cujus est elementum; Quam notitiam ei, qui medicinae operam navare cupit, adeo necessariam esse opinatur, ut quis neque bonam valetudinem tueri, neque causam morborum intelligere, neque signis quippiam deprehendere, neque morbum profligare possit, qui elementa corporis, quoque modo à pristino statu recedant, ignoraverit. Nobis vero secus videtur, qui hanc doctrinam de elementis ad Physicorum subsellia inferius remitemus, qua quippe medicus stricte sic dictus tota sua in functione carere sat commode potest.

§. LXXIX.

In *Libro secundo* discutitur doctrina de temperamentis, eorundemque differentiis, notis atque indiciis: Hinc ad partium principum, cerebri nempe, pulmonum, cordis, jecoris, ventriculi, genitalium totiusque habitus temperamenta eorundemque notas pergit, & quot modis, & ex quibus causis temperamentum ingenitum mutari possit ac soleat, circa finem hujus partis disquirat. Vereor autem, ne toto hoc laborioso scrutinio inanem ludat operam, cum primo statim hujus tractationis capite circa initium ex frigida illa & otiosa elementorum doctrina ipsam temperamenti indolem declarare cupiens, sese prodatur, dum

temperamentum nihil aliud esse putat, quam sobolem quandam permistorum elementorum. Taceo, quod varia illa viscera atque partes, quarum temperamenta ordine describit, eorundem capacia non sint, sed ad longe alias causas referri mereantur.

§. LXXX.

Quae porro *libro tertio* de facultatibus earundemque functionibus, spiritibus & calido innato differuntur, *Galenicum* fermentum redolent & à recentioribus falsitatis jamdudum convicta sunt. *Libro quarto* disputatur de humoribus eorundemque numero, officina generationis ac potissimum de sanguine. Humores in genere describit esse substantias humidas, ex esculentorum & potulentorum mixtione genitas, ut exhaustum in corpore refarciantur. Hos ad quaternarium reducit numerum, sanguinem nempe, pituitam, bilem & melancholiam, atque ab hepate ex chylo, vi ventriculi praeparato, gigni adseruit, sola tantum materiae & coctionis varietate distinctos. Advehi deinde chylum per venas meseraicas rubras ad hepar, ibidemque haematoseos vi, quae in hepate resideret, in sanguinem transformari. Sicuti autem post venas lacteas ab *Asellio* detectas sua sponte corrui hic fieri modus: Ita hepatis quoque jam dudum ultima cecinit *Bartholinus*. An vero sanguis crescat vel decrescat, an sit frigidus vel calidus, & quae sunt aliae ejus indolis otiosae, frigidae & ne cassa quidem nuce dignae quaestiones, iis diutius non inhaerebimus.

§. LXXXI.

Libro quinto acturus *Heurnius* noster de generatione hominis, nihil agit aliud, quam ut *Aristotelis*, *Hippocratis* & *Galenii* sententias variis modis inter sese mutuo committat & conciliare studeat, quae si hodie ab iis audiantur, qui *Hornium*, *Regnerum de Graeff*, *Swammerdamium* aliosque recentiores legerunt, iusta eosdem indignatione merito adficiunt. Quod quaestiones hinc inde interspersas attinet,
an

an scil. mulieres habeant sanguinem calidiorē prae viris, cur viri non sint menstruales, an muliebritas sit in mensibus &c. illas tanquam futes & inutiles merito mittimus. Atque haec omnia, quae hucusque recensuimus, ad partem medicinae *physiologicam* spectare videntur.

§. LXXXII.

Nunc vero *parte secunda*, & *libro quidem sexto* ad *Pathologiam* sese convertit *Heurnius*, acturus de iis, quae sanitatem evertant, id quod faciunt omnes affectus praeter naturam seu morbi. Per morbum autem intelligit constitutionem praeter naturam corporis viventis, laedentem primo & per se actionem. Deinde prosequitur varias morborum differentias, quae vel à partibus nostri corporis ducuntur, uti sunt morbi intemperiei, organicarum partium, conformationis &c. vel ab adjunctis qualitatibus, vel à tempore &c. *Libro septimo* inquitur in causas morborum, quarum pleraeque ita comparatae sunt, ut rarissime morbos excitandi energia polleant, aut si quadam ad morbos gignendum potestate valeant, merito miraculosum videri debet, quod nihilominus homines tam raro aegrotent. *Libro octavo* symptomatum historia sistitur, prout vel animalem vel vitalem actionem laedunt & adficiunt, quibus *ultimo* adnectuntur symptomata excrementorum, quaeque in qualitate mutata consistunt.

§. LXXXIII.

Libro nono exorditur *Semeioticam*, quam tractationem urinarum inspectione ideo auspicatur & fusius deinde prosequitur, quia inter excrementa nullum certius morbos indicare ac de iisdem fidem facere existimat. Agit tamen etiam de pulsibus, huiusque scientiae utilitate aliisque fontibus *doctrinae diagnosticae*. In *prognosi* vero ordine tractat de signis coctionis atque cruditatis, salutis & mortis, quae vel ad melius vel ad deterius inclinant, quaeque & tempus & modum criseos patefaciunt, & quae sunt alia

hisce adfinia, quae legisse non poenitebit eum, qui iudicium subactum, maturum & variis casibus practico-clinicis jam illustratum possidet.

§. LXXXIV.

Ultimo ac decimo Institutionum Heurnianarum libro therapeutica generalis seu methodus medendi sistitur, ubi in genere rursus fatendum nobis est, quod, quae de primarum ac secundarum facultatum vi, deque gradibus qualitatum in medicamentis simplicibus, & quo demum artificio haec omnia dignoscenda sint, differuntur, ingenio seculi moderni parum adcommodata esse videantur, quae proinde sine piaculo hic sicco pede praetermittere nobis licebit. Neque enim hodie studiosis nostris aures pruriunt, multo minus saliva movetur, si de facultatibus primis & secundis plantarum earumq; gradibus disputantes vel potius ineptientes in cathedra audirent docentes. Si amplius tertiarum atque quartarum facultatum vires alta voce e-buccinatas perciperent, metus foret, ne in cachinnos e-rumperent. Tam exquisitus hodie est philiatrorum nostrorum gustus! Melius Auctor noster instruit seriem indicationum, quos desumere docet vel à morbo ipso, causa morbifica & symptomate, vel à temperie totius corporis aegri, vel à parte morbo obfessa, vel ex viribus aegrotantis, vel ab aëre ambiente, vel ab aetate, vel à consuetudine, vel à peculiari cujusvis natura, vel à sexu, vel ab exercitio vitaeque instituto, vel à morbi longitudine ejusque brevitate, vel à quatuor anni temporibus, vel à paroxysmis morborum, vel à solemnibus naturae functionibus vel ex remediorum viribus, vel, quod tamen dubiis suis haud caret, à sideribus. Neque omnino contemnenda sunt, quae capite *Institutionum* suarum ultimo de modo consilia medica ineundi *Heurnius* noster disputat.

§. LXXXV.

Prius vero, quam eundem mittamus, illud adhuc, tanquam ab hoc loco minime alienum monere consultum duxi,

duxi, quod appendicis loco *Institutionibus* suis junxerit consilium, modum & rationem studendi, eorum usui infervituram, qui medicinae operam suam dicarunt. Estque hoc scriptum non lectu modo jucundum, sed & philiatris apprime utile & necessarium, quanquam, quod pariter diffitendum non est, temporibus, quibus vivebat, congruum. Hodie enim ad *Avicennam*, *Mesuen*, *Serapionem* aliosque *Arabes*, vel *Graecos*, *Aretaeum*, *Paulum*, *Aëtium*, *Trallianum*, *Oribasium* aliosque ablegare velle philiatros, vereor, ne irritum, sterile atque supervacaneum institutum sit futurum.

§. LXXXVI.

Ita ergo si cum *Heurnio* nostro comparatum sit, metuo, ne paria cum ipso fata habeat *Balthasar Schultzius*, quem *Lindenius Wratislaviensem*, ipsemet vero medicum *Colbergensem* sese vocat. Ingenue is confitetur, synopsis universae medicinae, quam edidit, cum ex multis medicorum libris, tum praecipue ex *Iohannis Heurnii Institutionibus* conformatam & XII. Disputationibus exhibitam, inque *Academia Wittebergensi* exercitio privato eventilatam esse. Qualis autem est fons, tales etiam plerumque solent esse rivuli.

§. LXXXVII.

Vix praeterea melioris notae est ejusdem *Schulzii* historia de homine microcosmo, in qua cum admirandam corporis humani fabricam tum divinam animae humanae essentiam *διαλογως* contemplandam exhibere conatus est, instituta adhuc in fine brevissima utriusque mundi, magni aequae ac parvi comparatione. Id tamen tantopere Nostro vitio vertendum non est, qui in gratiam pueri nobilis, *Ottonis Flemingii* libellum conscripserat eidemque dedicaverat.

§. LXXXVIII.

Dispersitur interim duas in partes, quarum prior de mirabili machina humani corporis, posterior vero de anima agit. Quoad priorem, praeter divisionem partium, *Hipocrati*

pocrati usitatam in *ιχοντα*, *ιχομενα* & *ορμυα*, in similes ac dissimiles, earundemque brevem historiam, quaeque illarum chylosi, haematosi, respirationi, procreationi &c. subserviunt, sistit quoque humorum variorum succinctam enarrationem, quorsum praeter chylum, qui quasi reliquorum humorum omnium rudimentum est, pertinet sanguis, pituita, bilis & succus melancholicus, qui secundae coctionis humores sunt, sicut ad tertiae coctionis humores, anonymus, ros, cambium & gluten ab Auctore referuntur: A quibus tamen omnibus humidum radicale, quod primogenea haereditate solidis membris insidere fabulantur, distinctum esse arguit. De spiritibus vulgaria medicorum commenta repetit, &, ne physica ista speculatio pathologico usu destituta esse videatur: Hinc ab impedito spiritu naturali atrophiae, à vitali syncopes, & ab animali apoplexiae originem derivat. Quoad *posteriores* vero, animam rationalem à DEO homini primitus inspiratam, postea mirabili propagationis serie continuari credidit, cujus proinde virtus etsi in toto corpore tota sit, sicut & in omnibus partibus tota est: In organicis tamen membris, maxime in corde potenter residere putavit, unde virtutem suam per organa debite conformata universo corpori communicet: Quae omnia, uti & vulgarem animae divisionem in *vegetantem*, *sensitivam* & *rationalem* non aliunde, quam ex *Aristotelis* & *Peripateticorum* fontibus hausisse videtur.

§. LXXXIX.

Ex *Italis* hoc circiter aevo *Institutiones medicinae* nobis reliquit *Vidus Vidius*, senior, philosophus ac medicus *Florentinus*, suo tempore longe excellentissimus, qui tum *Lutetiae* tum *Pisis* magno cum adplausu artem medicam docuit, & gravissimo Archiatri munere apud Franciscum I. Regem Galliarum magna cum laude perfunctus est. Absolvuntur autem *Vidii* nostri *Institutiones* tribus libris, in quorum *primo* de origine & auctoribus medicinae agitur, subiecta causa, cur post eos de medicina scripserit? In *altero*
libro

libro tractatur de communibus medicinae, qualia sunt ejusdem definitio, divisio atque subjectum cum resolutione quarundam generalium quaestiuncularum, quibus multi alii praeter Vidium tempus inutiliter terere consueverunt, uti sunt: An medicina sit ars, an scientia? Quae ad perficiendum medici officium requirantur? Qualem oporteat esse medicum? Qualem praestare sese debeat aegrotans? Et quae sunt ejus farinae plura, ex quibus, quantum conatus tyronum artis juvari ac promoveri possint, facile cuilibet licet perspicere. In tertio interim Institutionum libro agitur de partibus medicinae, deque ratione, qua inveniantur atque in ordinem disponantur: Quae omnia nimis sunt generalia, quam ut multa praeclara comoda lectoris polliceri inde queamus.

§. XC.

Hujus quoque loci est *Ludovicus Mercatus*, Hispanus, qui non modo in *Academia Vallejoletana* Professioni medicae praefuit, sed & splendido Archiatri Regii munere apud *Philippum II. Hispaniarum Regem* perfunctus est. Seorsim primum *Institutiones medicas* edidit, quae deinde simul cum reliquis ejus operibus prodire, in quorum proinde *tomo primo* exhibetur primum pro more *physiologia*, quae de constitutione corporis secundum naturam agit; Quam deinde excipit *hygieine*, in qua de sanitatis conservatione & praecautione differitur; Tandemque adnectitur *pathologia* cum *semeiotica* atque *therapeutica*, quibus in partibus ordine enarrantur morbi cum eorundem signis, causis, symptomatis, differentiis eorundemq; curatione.

§. XCI.

Hisce etiam adnumeratur *Georgius Scharpius*, Scotus, cujus *Institutiones medicas* *Claudius Scharpius*, filius in lucem dedit, à quarum tamen lectione tanto alieniores credo tyrones artis, quo minus moribus nostri seculi sunt ad commodatae.

§. XCII.

Ipsius conterraneus, *Gilbertus Jacchaeus*, natus *Aberdoniae*, septentrionalis *Scotiae* oppido, episcopatu & Academia celebri, in qua etiam Professione publica perfunctus est, similiter *Institutiones medicas* scripsit, vix tamen etiam ad delicatum moderni seculi gustum attemperatas.

§. XCIII.

Duncanus Liddelius, pariter Scotus, seorsim quidem exhibuit universum artis medicae compendium, disputationibus aliquot in *Academia Julia* quondam habitis inclusum; Postea vero cum aliquot aliis ejus scriptis studio *Ludovici Serrani*, Neomagensis, sub titulo operum Jatro-Galenicorum Lugduni junctim prodire, & septem libris comprehenduntur, quorum *primus* Physiologiam, *secundus* Pathologiam, *tertius* semeioticam, *quartus* therapeutice una cum victus ratione tam in sanis quam in aegrotantibus exhibet; Reliqui vero tres tractatus de febribus earundemq; symptomatibus, de peste, de variolis atque morbillis agunt: Quae tamen omnia *Galen*i principia redolent.

§. XCIV.

Similiter *Petrus Laurembergius*, Rostochiensis, edidit porticum Aesculapii seu generalem artis medicae constitutionem, in qua de medicinae genere, subiecto, fine, definitione, divisione pleraeque controversiae examinantur, errores multi à multis hucusque custoditi ostenduntur, & verae de singulis sententiae feruntur ac demonstrantur. Ponamus autem, acu hic rem tetigisse *Laurembergium*, in plerisque, quas pertractavit, controversiis: Inanem tamen operam lusisse eundem, nemo diffitebitur, qui rite intellexerit, ἀλλωτρία talia à medicinae ambitu quovis modo arcenda, eandem potius confundere quam juvare, sicuti inferius suo loco animadvertemus.

§. XCV.

§. XCV.

Ludovicus Gardinius in publicum produxit *Hortensii* manu-
ductionem per omnes medicinae partes. Cui successit
ejusdem *Hortensii* manu-ductio ad Pathologiam, quae est
Institutionum medicarum pars secunda, & secutus tandem
est earundem liber tertius, five medicina subsidaria, opus
posthumum de rebus non naturalibus, quod studio & o-
pera *Jacobi Briffaut*, medici *Duacensis*, prodiit.

§. XCVI.

Et cum *Leonardus Franciscus Dinghemius* fundamenta me-
dico-physica ad Scholarum ἀκριβολογίαν studiose aptata
esse ipsemet profiteatur: Hinc & illa artis nostrae sectato-
ribus parum profutura, haud vane conjicimus.

§. XCVII.

Quanquam etiam *Lazari Meissonnerii*, *Matifconensis*,
idea medicinae, verae fidei cum sensibus per rationem re-
stitutae cum philosophiae naturalis & medicinae secretiori
institutionibus, multa speciose polliceatur, nempe artifi-
um novum ad docendam, discendam & feliciter faciendam
medicinam omnino necessarium, necnon philosophiae
studiosis & quibuslibet aliis, vitam longam sanamq; siti-
entibus utilissimum: Eventus tamen satis comprobavit,
non respondisse eum promissis.

§. XCVIII.

Johannem vero *Walaeum*, inter Scriptores *Institutionum*
ideo referre nonnulli recusant, quod, ipso vivo, sub hac
saltem forma nullum scriptorum ejus lucem adspexerit pu-
blicam. Omnia quidem, quae inveniri potuerunt, scripta
Walaei in unum congeffit *Christophorus Jervinus*, vel *Jrvinus*
philosophices & chirurgices Magister Edimburgensis, in quibus
multa nova, plurima renovata, verbo, quicquid vel in In-
stitutione nervosum vel in praxi salubre desiderari potest,
reperiri censet: Sed quis fidem nobis faciet, omnia, quae

à *Jervino* compilata sunt, *Wallaei* genuina esse? De quo quidem non abs re permulti dubitant.

§. XCIX.

Interea in formam *institutionum* theorica *Wallaei* sic digessit *Jervinus*, vel, ut alii scribere malunt, *Irvinus*, ut tribus partibus, *physiologia* scilicet, *pathologia* ac methodo medendi comprehensa adpareat. In *prima* illarum agitur de partibus H. C. de calido innato, de humoribus, chylo potissimum ac sanguine, de temperamentis, de facultatibus animae, tandemque de functionibus, vitalibus, naturalibus & animalibus. In *altera*, cui tamen etiam doctrinam signorum jungit, de morbis eorumque causis & effectis tractat: Et *tertiam* denique tribus capitibus comprehendit, in quorum *primo* de causis sanitatem conservantibus, in *altero* de curatione morborum & in postremo de magnitudine symptomatum differitur.

§. C.

Majori quidem jure *Institutionum* scriptoribus adnumeratur *Vopiscus Fortunatus Plempius*, Amstelodamensis, qui libros VI. fundamentorum medicinae, acribologia Scholastica sic satis quidem accuratos, edidit, in quibus tamen non pauca continentur aliena, ab institutionibus merito removenda; Hanc ob causam non modo *Auctor* ipsemet fundamenta sua hinc inde interpolare, sed & apologema pro eodem *Daniel Vermoscius* adversus dicteria & ineptias cujusdam *κηπερος* scribere coactus fuit. Sicuti acre & virulentum est scriptum, quo *Plempium κηπερος* iste, sub hac ejus inscriptione: *Methodus medicinam rite discendi & exercendi*; est infectatus: Ita *Vermoscius*, defensor *Plempii* tanto minus pepercit *adgressori*, quo certius is ea aetate, qua *Plempii* institutiones perstrinxit, juveniles annos nuper demum ingressus, & vix à triennio cis citra doctorum ordini adscriptus, atque adeo fermento ambitionis totus turgidus, pulvis Aesculapii, vixdum è Scholae testa caput exerens, eo polluerit iudicio, ut medicinam non solum rite discendi & ex-

& exercendi methodum tradere, sed & *Plempii*, viri Professorii, qui in *Academia Lovaniensi* medicam artem multos annos non sine fama & adplausu docuerat, scriptum tamen ejus acri & censorio stylo laceffere ausus fuerit. Sed quid mirum? Quid non audet temeraria Juventus? Interim *κν-π&pos* iste multos hodieque sibi similes habet, adolescentulos arrogantes, aliorum famae insidias struentes, imo quosvis obvios Scyllaei canis instar adlatrantes. Uti vero *Plempius* optime, sic in suo apologemate sentiente *Vermoscio*, à dignitate sua alienum existimavit, cum talibus putidis cavillatoribus manum stylumque conserere: Ita hos Viri prudentis mores imitari decet eos, qui paria cum ipso fata experiuntur. Non sunt digni tales cavillatores, quibus vel verbulum respondeatur, nisi circumstantiae cum tempore demum sese manifestantes aliud quid suadeant. Neque publicum suum dissensum dissimulare potuit *Jacobus Primerosius*, qui destructionem fundamentorum medicinae *Plempianorum* evulgavit, in qua minimum quater centum *Plempii* errores demonstrare conatus est; Cujus tamen defensionem iterum in sese suscepit *Gerhardus Blasius*, filius *Leonardi*, *Amstelredamensis*, qui, ut ipse loquitur, impetum *Jacobi Primerosii* in *Vopiscum Fortunatum Plempium* retudit. Cui vero tandem victoriae gloria sit adjudicanda, adhuc sub judice lis est, quam nos ut hac vice dirimamus, nimis à scopo nostro alienum esse judicamus. Caeterum idem *Gerhardus Blasius* compendium *Institutionum medicarum* XII. disputationibus in *Illustri Athenaeo Amstelredamensi* publice ventilatis comprehensum evulgavit.

§. CI.

Eundem laborem adgressus est *Albertus Kyperus*, Philosophiae ac medicinae Doctor, hujusque in *Academia Lugduno-Batava* Professor Ordinarius. Promittit quidem titulus *Institutiones medicas*, ad hypothesin motus sanguinis circularis compositas, quibus subjiciuntur ejusdem transumpta medica, quibus fundamenta artis continentur. In praefatione autem ad Lectorem fatetur, se *Aristotelis*, qui quippe ab *Hip-*

pocrate non multum recedat, ut & *Galen*i hypothesibus inhaesisse, ac tyronibus hoc medicinae compendium destinasse, ut ideam artis generalem parvo tempore comprehendere mente possent, sicque ad legendum Auctores fierent aptiores, imo ad ipsam quoque praxin manu ducerentur.

§. CII.

Totum opus sic satis prolixum quatuor comprehenditur libris, in quorum primo sistitur medicinae *subjectum*, nempe homo, in secundo *finis*, sanitas scilicet & morbus, sicuti in tertio *signa*, & in quarto *media* & sanitatem conservandi & amissam restituendi exhibentur.

§. CIII.

Quod *primam partem* specialius attinet, ea, si fatendum, quod res est, nihil aliud exhibet, quam anthropologiam seu discursum physico-anatomicum de natura hominis, qui finem artis aequè parum directe respicit ac Astronomia vel quaecunque alia scientia. Quanquam enim nunquam in animum induxerimus negare, medico historiam illarum partium perspectam esse debere: Veram tamen theoriam medicam, futuris usibus practico-clinicis eminenter utilem tam parum illustrat, ac ars pictoria: Unde jam alibi monitum est, anthropologicam hanc hominis tractationem, tanquam jam aliunde notam, esse praesupponendam. Caeterum monstra illa traditionum antiquarum de calido innato, de spiritibus insitis & influentibus, vitalibus, animalibus ac genitalibus, de anima vegetativa, sensitiva & rationali &c. in omnibus tantum non paginis adhuc reperiuntur. Taceo *facultates Galenic*as in explicandis functionibus viscerum atque partium utramque absolvere paginam. Ut proinde necessarium duxerim, tyrones monere, ne specioso titulo fascinari sese patiantur, qui *institutiones medicinae* ad hypothesin quidem de motu sanguinis circulari compositas pollicetur, ubi tamen re ipsa nihil praestatur aliud, quam quod antiqua opinio-

num

num *Galenicarum* crambe recoquatur, atque ingenti taedio
lectori denuo adponatur.

§. CIV.

Quae cum ita sese habeant, omnino supervacaneum
esse judicamus, reliquas harum *Institutionum* partes percur-
rere, cum, semeioticis exceptis, plane ejusdem sint indo-
lis. Convertamus nos potius ad *Transumpta* medica, quae
ex Physicis ea repetunt, in quibus fundamenta medicinae
continentur. Liceat autem, *Auctoris* pace, libere adserere,
quod in eo tanto minus ejusdem institutum adprobare
queamus, quia animus discentis alienis talibus, physicis
vel metaphysicis speculationibus praeoccupatus, plane
ineptus redditur, ad comprehendendum ea, quae proprie
atq; directe ad artem medicam, quae factiva est & practica,
pertinent. Vehementer namque hucusque displicuit, quod
tantam Physices in medicina necessitatem esse, hucusque
crediderint, ut nonnulli illorum adserere non dubitave-
rint, hanc in solidum physicis dogmatibus ita inniti, ut ex
his multa repetere & dehinc ex scientiae theorematis de-
ducere cogatur recte medendi praecepta. Finge, in phy-
sicis dissentire medentes, an quaeso possibile erit, ut in
medicis praeceptis convenire queant? Istud enim omni
intuitu paradoxon videtur, quod medendi praecepta ea-
dem manere possint, etiam si circa scientiae theoremata sit
dissensus? Quia aut talem oportet esse praxin, qualis est
theoria, aut ista saltem theoria praxi omnino erit inutilis;
Id quod innumeris instantiis comprobari facile posset, si
id operae valeret pretium. Quod ipsum tanto magis di-
lucescet, si expendatur, studiosos medicinae ad *Hippocratis*
& *Galen*i principia à *Nostro* ablegari, ad quae quippe tan-
quam ad ὑποθεσεις reliqua revocari queant, quanquam i-
psemet negare non audeat, multa in iis dubia, nec forte
pauca etiam falsa contineri. Hoc saltem quam verissi-
mum esse saepe saepius experti fuimus, quod Juvenes
nimis

nimis sollicite το διότι inquirentes, haud infrequenter una cum illo το ὅτι amittant. Neque enim subtilis de principiis disputatio, sed felix morborum depulsio medicum efficit, ut recte caeteroquin noster quoque observavit; Adeo ut in proverbium plane abierit: *Doctum theoreticum esse infelicem Practicum*: Quia, dum subtiles tales doctores in elementis tantum morantur: Seipsum ad praxin exercendam inidoneos reddunt.

§. CV.

Haec vero omnia ne frustra adseruisse videamur, animus tantum advertere jubemus ad ea, quae libro primo *Transumptorum* disputantur de elementis eorumque nomine respectu homonymiae, etymologiae & synonymiae, de eorundem existentia, essentia, causis tam internis quam externis, origine, consequentibus, adjunctis & effectis una cum divisione &c. Coecus enim sit oportet, qui non advertat, spinosas tales elementorum disquisitiones ad finem artis, qui est curatio & liberatio a morbis, ne minus quidem respicere. Quo sensu ipsemet *Galenus* Libr. I. *Prorrhetic.* S. I. comm. 17. recte adseruit: Quicquid non docet melius curare, sophisticum est & ab arte alienum. Quae deinde libro II. de mixtis docentur, utilia quidem sunt, majori tamen utilitate sese commendarent, si mixtionis natura non absolute & in se, sed in oppositione ad statum vitalitatis considerata fuisset, ut exinde demum distincte intelligi posset, cur mixtio animalis, suo in genere ad corruptionem putredinosam valde proclivis, rarissime tamen ad actualem corruptionem perveniat? Reliqua prolixius prosequi non est necesse. Optaremus saltem, *Kyperum* nostrum vim *Logices*, in qua eximie plane excelluisse videtur, in alia quacunque disciplina adhibuisse, modo medicinae pepercisset. Quis enim Juvenum, medicinae studiosorum hodie reperitur, qui haec talia dialectica sine tacita indignatione audire cupiat?

§. CVI.

§. CVI.

Contra nimia prolixitate plerisque peccare videbuntur *Institutiones Danielis Sennerti*, Professoris medicinae in *Academia Wittebergensi* & medici cubicularii *Iohannis Georgii I. Electoris Saxonici*. Edidit quidem primum, uti ipsemet in Praefatione testatur, in gratiam studiosorum medicinae epitomen quandam & quasi lineamenta artis, quam in dicta *Alma Wittebergensi* docebat; Quia non ignorabat vir prudens, multum discantibus prodesse, si ejus, cui se adplicuere, disciplinae ideam quandam animo conciperent. Quum vero deinde epitomen istam in manus resumeret, illamque concisa nimis brevitate laborare animadverteret: Hinc factum est, ut meliora interim edoctus, quaedam mutaret, quaedam vero adderet, indeque majoris molis *Institutiones* enascerentur, quarum insuper amplitudinem miris modis augebant numerosae, quas ubique intersperfit, quaestiones controversae, quod tamen institutum suum inde excusat, quod alias discantium animi variis tricis involverentur, ex quibus tamen extricandi potius quam implicandi essent. Addit, perinde fore intuitu philiatorum, sive *Institutiones* paulo prolixiores sive easdem commentario illustratas legerent.

§. CVII.

Quanquam autem negari neque possit neque debeat, sine detrimento Reipublicae medicae in multis breviorum esse potuisse *Sennertum*: Fatendum tamen simul est, multa egregia, *Semeioticam* praecipue atque *diaeteticam* concernentia in hisce *Institutionibus* contineri. Et, si iudicio *Petri Laurembergii* in *Lauru Delphico* standum, principem inter *Institutionum* scriptores locum tuetur *Sennertus* noster; Ita enim ille commendat eundem: *Pervolve, & nocturna diurnaue versato manu Institutiones Danielis Sennerti, in quibus prolixiori orationis serie fundamenta artis plenissime enarrantur, & longe forte solidius quam factitatum à Fuchio, Valleriolo, Riolo, Heurnio,*

nio, Duncano Liddelio caeterisque de genere hoc. *Unus iste tibi erit instar omnium; Quem si noris, omnes noris.*

§. CVIII.

At vero quid veri vel falsi huic iudicio subfit, rectius non intelligemus, quam si singulas *Institutionum Sennertianarum* partes breviter percurramus, quidve in illis laude vel vituperio dignum sit, sincere quidem, attamen modestè indicemus. Praemissis itaque paucis, ut vulgo moris est, de natura ac divisione medicinae, in parte *Physiologica* agere incipit de sanitate & temperamenti. Sanitatis formalem rationem constituit *in potentia*, corporis actiones exercendi, à naturali omnium partium constitutione proveniente; *In potentia*, inquam, non actuali exercitio; Cum non is solum sanus dicendus sit, qui actiones debitas actu obit, sed etiam, qui eas actu non obit, dummodo, si velit, obire possit. Ad hanc sanitatis rationem in tanto clariori luce collocandam, inde quoque ipsam temperamentorum indolem deducit, describendo temperamentum in genere, quod sit qualitas ex mixtione elementorum & quatuor primarum qualitatuum mutua actione & passione exorta. Varias deinde horum temperamentorum differentias prosequitur, quarum tamen primariae huc redeunt, ut aliud sit temperamentum *ad pondus*, aliud *ad justitiam*, aliud *simplex*, aliud *compositum*, aliud *calidum*, *frigidum*, *humidum* & *siccum*, vel *sanguineum*, *biliosum*, *phlegmaticum* & *melancholicum*, quorum tamen omnium nullum homini accommodatius sit, nullum convenientius, quam calidum & humidum, quod alias sanguineum vocatur. Quae praeterea de differentiis corporum secundum Astrologos nec non de temperamento totius, quod à partium principum, cordis, epatis, cerebri, ventriculi &c. temperie dependere existimat, *Auctor* noster adfert, ea tanquam res nullius momenti lubens praetereo.

§. CIX.

Omnem vero hanc doctrinam de temperamentis ut clarius illustret, proxime subjungit discussionem *calidi innati, humidi radicalis & spirituum* vulgo sic dictorum. Quid autem sit calidum innatum, inventu difficile & obscurum esse fatetur, cum, quo quis in investiganda *calidi innati* natura plures in consilium adhibeat Auctores, eo fere redatur incertior. *Noster* vero, ut tantam, scilicet, difficultatem & nodum quasi gordium solvat, per *calidum innatum* idem, quod alii per *spiritum innatum*, intelligit, ita tamen, ut *insitus* ille, cujus originem à semine derivat, & in corde potissimum hospitium suum habere ipsiusque animae praecipuum organon esse docet, à *naturali* caute distingvi mereatur. An autem *humidum primigenium* ad *calidi innati* essentiam pertineat, dubitare videtur; Atque adeo *spiritus* potius *insiti* seu *calidi innati* pabulum seu domicilium esse credit: Non tamen facile haec tria, *calorem, spiritum & humidum radicale* separari, sed ut balsamum naturale arctissimo nexu conjungi. Cum vero calidum istud innatum ad omnes actiones perficiendas non sufficiat, sed calido aliunde influente, à quo & foveatur & excitetur, indigeat: Hinc spiritibus id officii demandare non dubitat, quod, cum ex tenuissima & maxime sincera sanguinis parte generati sint, animae quasi cum corpore uniendae vinculum actionumq; edendarum maxime necessarium instrumentum constituent. Hos trifariam distingvit, ita quidem, ut spiritus naturales differant a vitalibus, hi ab animalibus, & omnes ratione officiorum, quibus destinati sunt. Quibus ita expeditis, agit de naturali partium organicarum constitutione, & tam similaribus quam dissimilaribus communi unitate, de animae facultatibus & actionibus, nutritione & augmentatione, de generatione & partu, quibus omnibus physica explicatio de sensibus tam externis quam internis subjungitur. Atque hoc omne est, quod *Physiologiam* secundum *Sennerti* nostri mentem exhaurit.

§. CX.

Nisi igitur felicior fuerit in parte, quam nunc adgredimur, *Patologica*, vereor, ne praecipitatum nimis a plerisque censeatur *Laurembergii* iudicium. Prolixitate interim multum superat praecedentem; Tribus enim distinctis comprehenditur partibus, quarum *prima* de morbi natura & differentiis, de morbis intemperiei & totius substantiae seu occultarum qualitatibus, de morbis compositionis, conformationis & solutae unitatis, nec non de eorundem temporibus tractat. *Alter* agit de morborum causis, quam doctrinam ideo summe necessariam medico esse existimat, cum morbi neque vitari neque tolli possint, nisi causae caveantur; Et dividit easdem in proximam, remotam & procatarteticam, in causam per se & per accidens, in positivam & privativam, communem & propriam &c. Porro inter causas morborum refert res non naturales, plethoram atque cacochymiam, cujus ultimae occasione seorsim de pituita, bile, succo melancholico, seroso humore & flatibus agit, addendo tamen, humores non primis tantum qualitatibus corpora nostra adficere, sed praeter calidum, frigidum, humidum & siccum, amarum quoque & falsum & dulce & acidum & insipidum & acerbum & sexcenta alia, secundum *Hippocratis* effatum, homini molestiam creare. Hisce omnibus subjungit generationem calculorum ac vermium, inque causarum morbificarum censum refert. Neque, ut tritam a vulgo viam ubique calcasse videatur, causas morborum intemperiei cum & sine materia, totius substantiae, morborum organicorum & solutae unitatis prorsus negligit.

§. CXI.

Parte *tertia* sectione prima loquitur de symptomatibus eorundemque differentiis. Et cum ipsas quoque facultates varia ratione distinxerit: Hinc agit primum de symptomatibus facultatis naturalis, quorsum atrophia, anorexia, dysforexia, bulimia, malacia, apepsia, nausea, vomitus,

mitus, singultus &c. referuntur. Ad symptomata facultatis vitalis reducit lipothymiam, syncopen, palpitationem cordis &c. tandemque, interjectis nonnullis de symptomatibus sensuum tam externorum quam internorum, nec non motricis facultatis, agit de symptomatibus, in quibus vel omnes vel pleraeque actiones animales laeduntur, uti sunt lethargus, carus, catalepsis, apoplexia, epilepsia, vertigo &c. paucis adhuc de symptomatibus, quae in qualitatibus corporis mutatis consistunt, differitur. Alteram vero partis tertiae sectionem sibi vindicant disquisitiones aetiologicae circa causas diversorum horum symptomatum institutae, ubi eodem iterum ordine causis symptomatum facultatis naturalis, vitalis, animalis sensuumque tam externorum quam internorum facultatisque motricis recensitis, universa tractatio enarratione causarum, quae symptomata qualitatuum corporis mutatarum concernunt, obfignantur. Et fatemur quidem libere, singulas hasce partes singularem mereri animadversionem; Verum cum prolixioribus nobis esse non liceat, id tantum brevissimis repetimus, pleraque, quae circa causales deductiones adferuntur, principiis physiologicis *Auctoris* conformia ac proinde levioris momenti esse.

§. CXII.

In libro *tertio*, qui de signis agit, parte prima sectione prima eruuntur praecipuae signorum differentiae eorundemque fontes, & ante omnia inquiritur in methodi semeioticae necessitatem & utilitatem. Ita enim omnino res habere sese videtur, sicuti *Sennertus* noster observavit: Aegros nempe, videntes ea, quae sibi eveniunt, jam antea medico cognita fuisse, non solum medicinam extollere, sed & medico magis obedire magisque fidere; Atque ita *methodum semeioticam* non solum ad curationem necessariam esse, sed & auctoritatem artis non parum promoveri concludit. Adde, medicum ea praevidentem, quae aegris obventura sunt, tempestive iis occurrere posse. Hac proinde scientia in-

structus artifex vulgi calumnias longe facilius evitare potest, dum, quae futura sunt, praedicit, nec optima medicamenta, quae pluribus profuerunt, infamat, ea illis exhibendo, in quibus nulla salutis spes superest. Hinc igitur sectione secunda pergit ad signa, quibus tam universi corporis humani, quam praecipuarum ejus prartium temperies cognoscitur. Qua in re frustra omnino fuisse *Sennertum*, extra dubium est, quia nulla pars prae altera calidior est vel frigidior, humidior vel siccior, quam prout vel plus vel minus sanguinis vel feri intra sese recipit.

§. CXIII.

Interim sectione tertia sese confert *Auctor* ad declaranda signa, quae ex urina peti possunt; Ubi exposito vulgari inspectionis urinarum abusu, primum de earundem differentiis, substantia & affectionibus, deinde de earundem contentis & causis urinarum tenuium, mediocrium & crassarum, clararum item atque turbidarum colorumque, odoris, quantitatis similiumque accidentium rationibus differit, simulque regulas praescribit, secundum quas ei procedendum sit, qui urinas rite & cum fructu inspicere cupit, cum universa reliqua operosa urinarum pertractatio & in morbis cognoscendis & eorundem causis indagandis & eventu eorundem praedicendo tantum versetur. Et cum nonnulli spurii artis filii quidvis ex quavis urina polliceri ac temere praesagire audeant: Non sane inutilem suscipit laborem *Noster*, qui experientiae ductum secutus philiatri demonstraverit, quid potissimum ex urinis perspici ac praedici queat? Digressionem hinc ad doctrinam de pulsibus facta, exponit simplices primum, deinde vero compositas pulsuum rationes atque differentias; Posthaec vero declarat necessaria quaedam requisita, quibus instructum esse oporteat eum, qui pulsus eorundemq; causas atque differentias tam simplices quam compositas cognoscere, quidve illarum quaelibet significet atque praesagiat, perite exponere cupit? Non neglecta tamen

tamen etiam solerti pensitatione pulsuum, qui vel salutem vel mortem vel futuram crisin praenunciant. Et sicuti pars secunda libri tertii *diagnostica*: Ita tertia ejusdem libri *prognostica* prosequitur, eodem propemodum modo ac serie, sicuti alii *Institutionum* scriptores signorum doctrinam pertractare consueverunt.

§. CXIV.

Libro *Institutionum* quarto occupatus est in explicandis rebus, quae ad sanitatem tuendam necessariae sunt. Prius vero, quam ad specialia accedat, consultum esse duxit, generalia quaedam axiomata, tam in modo tuendae sanitatis quam in methodo medendi observanda praemittere, qualia sunt: Naturam nihil temere agere; Omne nimium naturae esse inimicum; Eam non facere subitas mutationes, & si faciat, esse periculosas; Semel multum & repente vel evacuare, vel refrigerare, aut alio quovis modo corpus movere, periculosum esse; Quae longo tempore extenuata sunt corpora, sensim reficienda esse; Quae vero brevi, repente; Naturam esse morborum medicatricem; medicum vero ejusdem ministrum; Consuetudinem esse alteram naturam; Et consueta longo tempore, etiam si deteriora sint, insuetis minus molesta esse solere; Et quae sunt ejus generis plura.

§. CXV.

Quibus ita praemissis *hygieinen*, doctrinam nempe in arte nostra longe utilissimam exorditur, quam duobus membris comprehendit, quorum altero series earum rerum, quae quasi materia sunt sanitatis, rerum scilicet non naturalium, quae quippe singulae corpus nostrum varia ratione adficiendi vi pollent, exponitur. Quia vero dietae illae causae non solum sanitatem corporis conservare, sed & evertere eandem possunt, nisi justa mensura, modo ac tempore opportuno adhibeantur, magnaue sit ratione aetatis, sexus, temperamentorum aliarumq; circumstantiarum, & corporum diversitas, neque omnibus eadem com-
moda.

moda sint atque utilia: Hinc *secundo membro* proponit methodum tuendae sanitatis, qua nempe ratione singulis istis rebus non naturalibus vulgo sic dictis recte utendum sit, ut sanitas facta recteque conservetur, & corpus humanum, quantum fieri potest, ad summam, sine multis morbis, senectutem perducatur? Atque adeo *Sennertus* agit primum de causarum salubrium vi atque facultate, deinde vero methodum tuendae sanitatis exponit, rationemque hisce omnibus, pro conservanda valetudine, recte utendi subjungit.

§. CXVI.

Quinto & ultimo libro pars medicinae *therapeutica* explicatur, quae nempe hominem in morbos jam prolapsam pristinae sanitati restituere & morbos varios propulsare docet. Ad quem finem ut pertingat medicus, duobus instructum subsidiis eundem esse debere, vult *Sennertus*, nempe *primo* methodo, qua per certas indicationes remedia seu juvantia inveniantur; *Deinde* vero materia auxiliorum, qua etiam id, quod per indicationes inventum est, exequatur: Quorsum non solum totam de medicamentorum facultatibus doctrinam, sed & de chirurgicis auxiliis & materia diaetetica tractationem reducit. Ad haec enim tria capita, nimirum *diaetam*, *chirurgiam* & *pharmaciam* omnia medici instrumenta revocari possunt. Ut adeo hoc postremo libro agat *Sennertus* non tantum de simplicium medicamentorum facultatibus & auxiliis chirurgicis, quatenus ad materiam medicam pertinent; Sed & de methodo medendi ipsorumque remediorum compositione. Quia vero medicamentorum facultates non aliter, nisi methodo *Galenicis* consueta & solemni, per primas nempe qualitates, *calidum*, *frigidum*, *humidum* & *siccum* in *primo*, *secundo*, *tertio* & *quarto gradu* explicantur: Hinc in iis prolixius enarrandis non morabimur.

§. CXVII.

In *Chirurgia* vero nihil aliud praestat. quam ut quinque generales Chirurgiae operationes breviter percurrat, nempe

nempe *synthesin* seu separatorum conjunctionem, *diorthosin*, seu eorum, quae intorta, inflexa vel compressa sunt, correctionem, *diaeresin* seu continui solutionem & *exaeresin* seu superfluum extirpationem ac deficientium restitutionem. Ad *synthesin* refert deligationem per splenia, ferulas & laqueos, deinde ossium fractorum coaptationem, luxatorum ossium restitutionem & partium molliorum v. g. uteri vel intestini recti &c. in loca sua naturalia repositionem, uti & partium vulneratarum per futuras, gluten ac fibulas fasciationem. Ad *diaeresin* reducit venae sectionem, abscessuum apertionem, fistularum incisionem, partium p. n. conjunctarum separationem, scarificationem, uersionem, rerum tam in corpore genitarum & p. n. retentorum, quam eisdem foris illatarum extractionem &c. Tandemque capite ultimo adhuc de partium amissarum restitutione, quam *Chirurgiam curtorum* vocant, agitur.

§. CXVIII.

Cum vero nequaquam sufficiat medico, instrumenta seu adminicula ad sanitatis pristinae recuperationem morborumque depulsionem utilia nosse, sed & opus sit, perspectum habere, qua ratione quolibet remedio ita utendum sit, ut amissa sanitas instauretur: Hinc *methodum medendi* nunc subjungere *Sennerto* placuit. Id autem eo ordine fecit, ut primum aliquem quasi praegustum praeberet philiatris de medendi methodo & indicationibus in genere; Quem in finem sequentia fundamenta ac veluti axiomata ex *Galeno* subministravit: Omne, quod indicat, aut sui conservationem aut ablationem indicare: Quod secundum naturam est, conservandum, quod vero praeter naturam, tollendum esse; Contraria contrariis removeri, sicuti similia similibus conservantur &c. Quibus ita generatim praelibatis, specialius disquiritur, quid causae morbosae & inter illas cacochymia indicent? Ubi deinde ordine agitur de evacuatione per purgationem, urinas, sudores nec non de particularibus evacuandi modis, de
I
tollenda

tollenda sanguinis abundantia per hirudines, cucurbitulas, scarificationem, venaesectionem &c. non neglecta hic etiam, tanquam loco admodum opportuno, doctrina de revulsione ac derivatione humorum, quae per universam praxin medicam latissime sese diffundit. In methodo vero curandi morbos intemperiei totiusque substantiae brevior est, quam per ea, quae superius *theoretice* de illis rebus dicta atque prolata fuerant, sperari licuisset: Sicuti & ea, quae ad indicationem vitalem pertinebant, brevissimis expedit.

§. CXIX.

Supereft *Pharmacopoeia*, quae ad calcem *Institutionum Sennertianarum* adjicitur, quamque multas ob rationes medico necessariam esse existimat, estque illa *medicinae therapeuticae* pars subsidiaria, quae de genuina medicamentorum praeparatione & compositione tractat. Expōitis itaque, quae ad praeparationem medicamentorum artificiosam necessaria esse judicavit, additisque mensuris ac ponderibus medicorum, nec non praecipuorum medicamentorum dosibus declaratis, propius deinde accedit ad ipsas Chymicorum operationes, magis tamen generales ac veluti ministras, quales sunt tritura, laevigatio, rasio, limatio, liquatio, solutio, deliquium, tostio, ustio, cinefactio, calcinatio, putrefactio, fermentatio, cribratio, lotio, maceratio, infusio, coctio, colatio, despumatio, clarificatio, filtratio, digestio & expressio &c. Deinde vero varias medicamentorum formas exponit, uti sunt decocta tam purgantia quam alterantia, infusa, vina medicata, aquae & spiritus destillati &c. In quibus omnibus licet debitam, quae talibus in rebus requiritur, exactitudinem nondum adsecutus fuerit *Sennertus*, in eo tamen laudandus est, quod à prava illa, quae ad ea usque tempora viguerat, consuetudine medicorum recesserit, & in eo quoque doctrinae medicae genere praestare aliquid voluerit, licet novatoris vel plane *haeretici medici* ignominiosissimo nomine subinde à coecis antiquitatis adoratoribus fuerit traductus, sicuti in

Praefat.

Praefationibus huic operi praemissis hinc inde conqueritur. An vero *plagiariorum* seriei, id quod *Stollum* fecisse, haud ita pridem in ejusdem *introductione in historiam litterariam medicinae* observavi, adnumerandus sit, alio loco commodius disquiram.

§. CXX.

Atque haec est genuina *Institutionum Sennertianarum* facies, quas, cum nimia prolixitate laborare ipsemet animadverteret, in epitomen contrahere non dubitavit. Quod Viri celeberrimi institutum alii quoque secuti sunt, & *Institutionum Sennertianarum* compendium, alii hac, alii alia forma ac facie exhibere conati sunt. Sic *Johannes Theodorus Schenckius*, M. D. ejusdemque Prof. in Acad. Jenensi publicus, qui *Gothofredo Moebio*, institutionum dicta in universitate Professori Ordinario successerat, *synopsin Institutionum medicinae disputatoriam* reliquit, de quibus ipsemet testatur, quod in illis opera *Danielis Sennerti* & *Guerneri Rolfinckii* usus fuerit. Continent, praeter *prolegomena*, etiam *physiologiam* & *pathologiam*, quae partes omnes veterum non minus quam recentiorum fundamentis principiisque sunt illustratae. Methodus ipsi, ut nonnullis aliis, arrisit *disputatoria*, quae quippe uti juventuti Academicae informandae ad exercitandum; Ita ad vires ingenii in palaestra disputatoria periclitandum est adcommodatissima.

§. CXXI.

Quod speciatim *prolegomena* attinet, illis more, institutionistis solemni, agit non modo de primis artis medicae originibus, sectis, necessitate & praestantia, sed ipsam quoque ejusdem definitionem divisionemque in suas partes exhibet.

§. CXXII.

Quibus ita praemissis ad *physiologiam* sese confert, tractatque primum de sanitate, quam cum *Galeno* definit, esse potentiam corporis exercendi actiones naturales; sive plenius: Esse constitutionem corporis naturalis & consequenter partium ejus viven-

rium, actiones vitae necessarias exercendi vim habentem. Potentiae huic opponit impotentiam, quam morbum esse, ait. Partes corporis cum Hippocrate distinguit in humores, spiritus & partes solidas. Has iterum dispescit in similes & dissimiles; Illas tamen nempe similes neutiquam spermaticas cum veteribus esse dicendas, rite sustinet. In describendis spiritibus, calido innato & humido primigenio plus sibi faceffit negotii, quam usus exiguus ex tritis talibus scholarum expectandus, requirebat. Eodem plane modo in recensendis animae facultatibus sese gerit. Has quoque, absente vel destructo temperamento, nihil operari, sed ab actione sua cessare existimat. Illud autem sic describit: *Esse qualitatem ex mutua actione primarum qualitatum, calidi nempe, frigidi, humidi & sicci, ortam, ex iisque remissis & fractis resultantem.* Praeter praedictas qualitates in sanguine etiam *salsum, dulce, acidum, acerbum, amarum, inspidum & reliqua infinita, omnigenas facultates* habentia admittit, quae omnia, licet homini insint, eum tamen non adfligant, dummodo mixta ac bene contemperata sint.

§. CXXIII.

Plura talia recensere merito supersedeo, ex quibus interim colligi facile potest, aliam faciem ipsam quoque *pathologiam*, si *physiologiae*, ut decet, respondere debeat, habere vix posse.

§. CXXIV.

Porro in Academia Lipsiensi compendium ejusdem *Sennerti Institutionum* XVII. disputationibus publice proposuit *Georgius Mochingerus*. Non minus *Christianus Winckelmannus* in tyronum medicinae gratiam Viri clarissimi, *Danielis Sennerti Institutionum medicinae* summam, tabularum forma breviter atque succincte concinnavit. Similiterque aphorismos ex *Sennerti Institutionibus medicis* magna industria collegit *Johannes Joachimus Becherus*, Spirensis, Med. D. & in *Alma Moguntina Institutionum P. P.* qui aliis quoque scriptis, imprimis *Physica sua subterranea* eruditis satis sese com-

men-

mendavit. Aphoristica forma concinnavit institutiones suas, ne ea parte molestus esset, qua ipsius olim Praeceptores molestiam olim crearunt.

§. CXXV.

Alia plane via incessit *Jacobus Barnerus*, Elbingensis, qui, uti anatomicae pariter ac chymicae artis admodum peritus erat: Ita etiam ex principiis anatomico-chymicis artem medicam illustrare cordi habuit: Quare prodromum *Sennerti novi*, seu delineationem novi medicinae systematis evulgavit, in quo, quicquid à primis seculis in hunc usq; diem de arte prodiit, *Hippocratis, Galeni, Paracelsi, Helmontii, Sylvii, Willisi &c.* dogmata, examinare suscepit. Opusculum nec lectu injucundum nec omnino inutile est, sed attentum & circumspectum requirit lectorem, ne aliena, praxi contraria, in artem praeter opinionem invehantur.

§. CXXVI.

Condidit quoque *Institutiones medicas Johannes Christophorus Geilfusius*, medicinarum Doctor & Practicus, quas quidem primum in usum Collegii privati conscripserat & auditoribus suis explicuerat, deinde vero revisas, & historis, observationibus secretisque multis, quae titulus jactat, auctas in lucem edidit. Praemissis paucis, ut fere solent *Institutionum* scriptores, de medicinae constitutione generali & enarratis praecipuis ejus partibus, *physiologia, pathologia, semeiologia, therapeutica* atque *hygieine*, ad naturam hominis specialius in parte *physiologica* explicandam deprope-
rat, quae quippe, humana nempe natura sit vera medica-
trix, cui omnis medicina artificialis dextre adhibita tan-
tum ancilletur. Ad ea vero, quae homini natura insunt, refert praeter temperamenta, spiritus, partes, humoresque, quibus quoque functiones addit. De temperamento ratio-
cinatur more veterum; Existimat enim, ad complexionem quam naturam hominis vulgo vocant, tria requiri, nem-
pe elementum, calidum innatum & animae praesentiam;

Ex quibus proinde absolutam hominis temperationem, cuius individuo congruam, emergere credit: Quae an utilissimam hanc & medico absolute scitu necessariam doctrinam multum illustrent, admodum dubito. Hinc ad partium divisionem progreditur, atque more recepto in *continentia, contenta & impetum facientia* universum hominis corpus distingvit, non omissis tamen etiam reliquis partium divisionibus in similes & dissimiles, instrumentales seu organicas, principes & ministras, aliisque, quas hodie *Physiologi* nullo amplius numero habent.

§. CXXVII.

Quibus ita praemissis, historiam trium cavitatum, in quas corpus humanum ab Anatomicis dividi consuevit, omniumque viscerum in illis contentorum prosequitur, eique artuum considerationem subjungit; Qua tota in tractatione nihil occurrit, quod non centies ab aliis dictum fuerit. Hisce interim sic expositis, pergit ad sanguinem ejusdemque motum; Elaboratio illius, secundum mentem *Auctoris* nostri, qui hic iterum vestigia premit veterum, succedit ex chylo, proprio hepatis calido; Eadem propemodum ratione, sicuti vinum generatur in vite, ita hepatis parenchyma bene valens calidoque geniali vegetum gignere purum atque defaecatissimum sanguinem opinatur. Motum tamen circularem recte agnovit eumque ex venae sectione ipsoque sensu probavit. Quae vero de functionibus circa finem hujus partis adduntur, magni momenti non sunt.

§. CXXVIII.

In libro *Institutionum* suarum secundo agit *Geilfusius* de morbo ejusdemque causa & symptomate: Causam enim sequitur morbus & morbum comitatur symptoma. Sicuti autem sanitatem in hisce tribus consistere dixit, nempe in convenienti crasi, deinde in naturali justaque habitudine organorum, ac denique in unitate: Ita triplex morbi genus inde resultare docuit, nempe morbum intemperiei

riei seu perversam dispositionem craseos, deinde morbum compositionis seu malam dispositionem organizationis ac denique morbum solutae unitatis, qui organi violenter divisi habitudinem supponit: Quae tria summa morborum genera, si verum fateri fas est, angustiora sunt, quam ut omnes morbi eo reduci queant. His in genere praemissis, sistitur deinde brevis & compendiosa enarratio adfectuum cordis, stomachi, intestinorum, jecoris, lienis, renum atque testiculorum, nec non ipsius quoque pectoris & cerebri, addita tamen etiam succincta morborum muliebrium delineatione.

§. CXXIX.

Tertia pars brevior est, in qua quippe, posteaquam signorum definitionem atque divisionem proposuit *Auctor*, specialius agitur de signis, quibus morbi species investigatur, deinde de inspectione urinarum, exploratione pulsus, praesagiis, crisis signisque laesionis viscerum.

§. CXXX.

In *medendi methodo* differitur primum de indicatione & remediorum inventionem, tum vero, qua ratione eorundem vires atque facultates, nec non remedia ipsa lege artis paranda sint, monstratur. Postremo agitur de actu purgatorio & venaesectione, cui tanquam vicariam substituit scarificationem & paucissimis adhuc ratio victus perstringitur. Ubi hoc unicum tantum monere placet, *Auctorem* nostrum longe plus in rubro promississe, quam in nigro praestitit. Ubi enim sunt rariores observationes, quas titulus pollicetur? Ubi secreta? Quae etiam, si lucerna Diogenis quaereres, non reperies? Atque adeo *Institutionibus* hisce pereuntibus, mundum quoque perituum, non facile metuendum est.

§. CXXXI.

Spero etiam, orbem eruditum sine incommodo vel detrimento nunc cariturum *Institutionibus Caspari Hoffmanni, medicinarum Doctoris & Professoris in Academia Noricorum Altdorff*

dorffina, qui satis etiam prolixè in hunc sese campum diffu-
pit, ut integris VI. libris *Institutiones medicas* complexus sit,
quas deinde in compendium ipsemet redegit, ex quo pro-
inde, quid sperare debeant tyrones artis, paucis hoc mo-
do declaramus.

§. CXXXII.

*Galen*i strenuum fuisse sectatorem *Nost*rum, extra dubi-
um est: Quia in varia ejus scripta commentarios compo-
suit, quales sunt de usu partium humani corporis &c. po-
tissimum vero testis ejus rei est apologia pro *Galeno* sive
χρησολαδων opus, quod veritati medicinalium dogma-
tum illustrandae, Galenique gloriae adferendae utilissi-
mum, omnibus denique sanioris medicinae cultoribus
summe necessarium esse depraedicat.

§. CXXXIII.

Ast vero, ut ad *Institutiones Hoffmanni* nostri propius acce-
damus, primo statim in limine animadvertere jubemus Le-
ctorem, eum quoad *universalia* de medicinae natura, sub-
jecto, fine ac divisione communem & a plerisque haec-
tenus tritam calcasse viam. In *Physiologia* agit de elementis
more Physicorum, deinde de temperamentis, quae ad
mentem *Galen*i vel ut *simplicia*, vel ut *composita* considerat, at-
que adeo priori intuitu temperamentum distinguit in *cali-
dum, frigidum, humidum & siccum*, posteriori vero in *calido-humi-
dum & calido-siccum, in frigido-siccum & frigido-humidum*. Subjun-
git deinde tractationem de partibus solidis, quas in *similares*
ac *dissimilares* aliorum more distinguit, ad priorem classem
referendo carnem & fibras, membranas atque tunicas, ve-
nas, arterias, nervos, tendines & musculos, ligamenta,
cartilagines & ossa, ungues, pilos, glandulas, cutim, cu-
ticulam & membranam carnosam. Hanc tractationem ex-
cipit historia partium solidarum *dissimilarium*, quorsum re-
fert abdomen ejusque musculos, peritoneum, gulam, oe-
sophagum, ventriculum, intestina, mesenterium cum va-
sis meseraicis & pancreate, omentum, hepar, lienem,
vesi-

vesicam felleam, renes cum vasis emulgentibus, vesicam urinariam cum ureteribus, vasa spermatica foeminarum cum testibus & utero, mammas, thoracem, costas, sternum cum musculis thoracis, diaphragma, pleuram & mediastinum una cum corde, quod ambitu suo thoracem in partem dextram atque sinistram distinguit.

§. CXXXIV.

Hic vero, digressionem quadam facta, de calido nativo paucula commentatur, de cujus origine hunc Lectori suo conceptum insinuare conatur, derivandam illud esse ex semine paterno, quod in uterum receptum ex attracto sanguine domum sibi formet; Ipsum vero vel totum vel maximam partem absumi in substantiam sanguineam, eo modo, quo coagulum in caseos vel fermentum in panes recipere. Progreditur hinc ad pericardium & humorem in eo contentum, venam arteriosam & arteriam venosam earundemque valvulas, venam cavam, arteriam magnam & earundem valvulas, auriculas cordis, ligamenta, vasa nutrientia & thymum, pulmones, asperam arteriam, caput & spinam, pericranium, cranium, futuras cranii, utramque meningem, cerebrum & cerebellum, nervos inde oriundos, musculos capitis ejusque motum super spina. Hinc discursum suum profequitur, agitque de spina ejusque partibus, de vertebrae spinae, cartilaginibus & earum ligamentis, de meningibus spinalis medullae & medulla ipsa, de nervis inde ortis, de musculis spinalibus, oculis partibusque omnibus circumstantibus, de humoribus, tunicis, musculis & trochlea, de vasis, de auribus & reliquis externorum sensuum organis, ut & artibus tam superioribus quam inferioribus: Quae tamen omnia ex Anatomicis praesupponenda, non docenda vel ex professo inculcanda erant.

§. CXXXV.

Descriptionem partium solidarum excipit doctrina humorum, ubi agitur de chylo ejusque viis, quas ille me-
K
feraicas

seraicas rubras esse existimat, quae quippe chylum sub vaporis specie attrahant & ad officinas sangvificas, hepar atque lienem deferant. Hinc porro sermo instituitur de sanguine ejusque temperamento ac differentiis, ubi etiam quaestio discutitur, quaenam pars princeps sit in opere sanguificationis? Suscipitur deinde tractatio de excrementis, & primum quidem utilibus, uti est semen tam masculinum quam foemininum, lac, pinguedo, medulla ossium, deinde vero etiam inutilibus singularum coctionum, ubi ad excrementa primae coctionis refert pituitam ejusque varias species, salivam & sputum, ad excrementa secundarum coctionum bilem cum succo melancholico & ad tertiae coctionis excrementa serum atque ichores. Ad excrementa particularia reducit fuligines cerebri, quae partim per futuras, partim per os sphenoides, cui *Noster* quoque ethmoides addit, pertranseant. Huc pertinent excrementa oculorum & aurium, lacrymae nempe cum cerumine. Tandemque universam tractationem *physiologicam* doctrina de facultatibus & actionibus obsignat.

§. CXXXVI.

Physiologiam excipit *Pathologia*, ubi, missis universalibus de sanitate ac morbo in genere, utriusque subjecto atque differentiis, causis, symptomatis &c. descendit *Hoffmannus* ad particularia, ubi agit de intemperie nuda, morbosa, calida, tam simplici quam composita, quorsum refert febres, quarum differentias, causas & symptomata ordine exponit. Hinc pergit ad intemperiem viscerum deque ventriculi, intestinorum, hepatis & lienis, ut & renum & cerebri imbecillitate eaque occasione de melancholia, vertigine, mania, memoriae imminutione, & fatuitate &c. agit. Ad intemperies cum substantiae affluxu reducit erysipelas, inflammationem, oedema atque scirrhum, & pro varia compositionis ratione inflammationem erysipelatoden, erysipelas phlegmonodes, & sic de caeteris; Quibus historia inflammationum particularium, ventriculi v. g. intesti-
norum,

norum, mesenterii, renum, uteri, vesicae urinariae & dia-
pragmatis subjungitur. Ad seriem vero morborum or-
ganicorum referuntur morbi conformationis in figura &c.
quos excipiunt morbi tam in cavitatibus strictis quam la-
xis, quos ordine referre nimis prolixum foret.

§. CXXXVII.

In *semeiotica* hanc signorum doctrinam in ordinem redige-
re adlaboravit: Unde praecipuos eorundem fontes consti-
tuit praeter alia temperamentum tam totius quam partium,
quod tamen universum negotium falso conceptu de frigi-
ditate vel caliditate horum vel illorum viscerum nititur:
Unde suo illa loco relinquentes id tantum addimus, quod
signa *pathognomonica* ex *Galen*i mente sic satis adcurate re-
censita sint. *Prognosis* vero more reliquorum ex urinis, su-
doribus, vomitibus atque dejectionibus, sputo, pulsibus,
respiratione &c. petendam esse docet.

§. CXXXVIII.

Postquam igitur hoc modo tyronem artis satis instru-
xit in cognitione, quae ad artem ipsam pertinet: Proxi-
mum nunc est, ut illi quoque instrumenta suppeditet ac
doceat, qua ratione uti illis debeat? Sunt autem haec in-
strumenta diaetetica, pharmaceutica atque chirurgica,
quae, prout reliqua omnia, breviter, attamen more suo ad-
curate pro sua, quam de rebus hisce habebat, theoria
perstringit.

§. CXXXIX.

Prius vero, quam *Hoffmannum* nostrum deferamus, ad-
huc paucis notamus, quod *Isagogen* medicam doctissimi
hujus viri, quem *Hermannus Conringius* semper *Χαρίεστος*
suum vocat, ediderit *Jacobus Pancratius Bruno*, *Altdorffinus*.
Huc etiam pertinent dogmata medicinae generalia, in or-
dinem ab ipso redacta, a rebus extraneis depurata, & ad ve-
ra, imprimis recentiorum principia adcommodata.

Suus etiam locus inter *Institutionum* scriptores est relinquendus *Lazaro Riverio*, consiliario, medico & professori Regis Galliarum, Ludovici XIII. nec non regionum in *Universitate Monspeliensi* medicinae professorum Decano, qui, cum ingeniose expendisset, pari propemodum difficultate ad practicam medicinae partem accedi, & ex coelo quasi artem optimam ad ipsa aegrorum cubilia devocari, nisi theoreticas ejus partes, *physiologiam, pathologiam, semeioticam* & ipsam quoque *medendi methodum* generalem assidue prius excoluerint tyrones, pari, inquam, difficultate, qua olim divinus Socrates à theoretica Philosophia ad practicam accessit, atque ita divinam artem quasi e coelo in urbes devocasse dictus est: Hinc ut artem, non paucis difficultatibus implicitam, tanto faciliorem philiatris redderet, *Institutionum* forma de singulis medicinae partibus eo modo differuit, quem genius temporum, quibus vixit, permittebat. Neque omnia indiscriminatim, quod ante ipsum pene multi fecerant, ex *Hippocrate* & *Galeno* mutuatus est, verum non pauca quoque de suo addidit: Ut in epistola dedicatoria ad *Franciscum Vautierium*, olim *Mariae Medicae, Reginae Christianissimae* Archiatrum, tum vero *Archiatrorum Galliae Comitem*, scribere non erubuerit, miraturos esse antiquos Jātricae disciplinae parentes, si hodie reviviscerent, eximiam artis magnitudinem tot posterorum inventis locupletatam, tot experimentis auctam, ut formam pene cum aetate commutasse videretur. Neque tamen dissimulare potest, in theorica medicinae parte, eadem prorsus apud plerosque Auctores occurrere praecepta, adeo ut eandem cramben iterum atque iterum coctam ac decoctam non sine taedio esitare cogantur Lectores; A quorum tamen numero ipsum quoque *Riverium* minime excludendum esse, facile fatebuntur omnes, quibus integrum *Institutionum* opus animo recolere volupe fuerit.

§. CXLI.

Dividitur illud, praeter praecognita in universam medicinam, in *physiologiam*, *pathologiam*, *semeioticam*, *hygieinam* & *therapeuticam*, quo modo etiam caeteri plerique scriptores *institutiones* suas hucusque dispertiri consueverunt. *Physiologia* septem continetur sectionibus, in quarum *prima* de elementorum natura, numero, qualitatibus & mixtione; In *secunda* de temperamentis eorumque differentiis & criteriis, nec non de temperamentis aetatum, sexuum annique temporum agitur. *Tertia* expendit humorum indolem & differentias agitque primum de sanguine proprie dicto, de pituita, bile & melancholia alimentaria, porro de humoribus secundariis, bile & melancholia excrementitia, de fero & pituita excrementitia &c. *Quarta* doctrinam de spiritibus eorundemque differentiis & calido innato prosequitur. *Quinta* naturam partium similiarium, dissimilarium & organicarum; *Sexta* facultates earumque functiones, & *septima* denique hominis generationem perscrutatur, & de femine utriusque sexus, de sanguine menstruo mulierum, de conceptione singularumque partium delineatione ac perfectione nec non de partu sermonem instituit.

§. CXLII.

Quod *pathologiam Riverianam* attinet, illa quatuor tantum sectionibus comprehenditur, in quarum *prima* non modo morbi natura in genere, sed & variae illius differentiae, potissimum accidentales, explicantur. In *altera* agitur de mutationibus morborum ac potissimum de crisi- bus & causis tam cricum quam ipsorum quoque dierum criticorum; Ubi quidem non pauca lectu digna occurrunt; Multis tamen modis supervacuum etiam videri posset, praeter naturam ipsos coeli astrorumque motus & influxus, tanquam cricum causas allegare. Interea sicuti sectione *tertia* morborum causae; Ita in *quarta* symptomatum natura, causae atque differentiae expenduntur.

§. CXLIII.

In *semeiotica Institutionum parte*, tradita *duabus prioribus sectionibus* signorum natura in genere & declaratis praecipuis fontibus, ex quibus peti solent, exhibentur primum quorumvis humorum in corpore praedominantium signa, quibus deinde signa partium vel primario vel per consensum tantum laborantium, morborum itidem vel benignorum vel malignorum, acutorum vel chronicorum &c. subjunguntur. Hinc *sectione tertia* ad *prognosin* fit transitus: Sicuti autem hac *prognostica* medicinae parte magnam imprimis famam atque auctoritatem medicus conciliare sibi potest: Ita *Riverium* nostrum non vulgariter in ea versatum fuisse, tota hac *sectione* solide demonstravit, in qua multa lectu jucunda & utilia simulque apprime necessaria occurrunt, quae de modo *crisium*, de tempore, quo morbi finiuntur ad ipsam usque diem & horam *criseos*, de loco, per quem futura est, an per vomitum, vel alvi fluxum, vel sudores, vel urinas, haemorrhagiam vel menses & haemorrhoides vel per abscessus *successura*? Imo plane de signis futuri delirii, de signis convulsionis & futurae *recidivae* magno cum iudicio & prudentia practico-clinica disseruit.

§. CXLIV.

Et sicuti non minus mortales sibi devincit, qui regularem vivendi rationem ipsis praescribendo ab insultibus morborum praeservat, quam qui eosdem jam actu aegrotantes à quovis gravissimo morbo liberat: Ita nec hanc medicinae partem intactam reliquit *Riverius*. Exposuit enim ordine naturam esculentorum ac potulentorum, determinavit eorundem quantitatem ac qualitatem, ordinem, tempus & horam adsumendi, consuetudinem ac delectationem in usu alimentorum, victum non singulis modo aetatibus sed & quibusvis anni temporibus idoneum una cum historica enarratione praecipuorum alimentorum, uti sunt panis, hordeum, coryza, avena, olera & radices usitatiores esculentae quaeque ex animalium genere petuntur. Quibus omnibus

omnibus circa finem exercitatio de usu & abusu rerum non naturalium additur.

§. CXLV.

Postrema seu therapeutica parte, qua medendi methodus generalis exhibetur, *sectione prima* agitur de indicationibus illarumque differentiis, de indicantibus, coindicantibus, contraindicantibus & correpugnantibus, de indicato nec non primo atque generalissimo curationis principio, quod est: *Contraria contrariis curari*. Quamquam autem de isto, si sic dici mereatur, principio, eandem sibi pollicitus sit certitudinem, quam de suis axiomatibus sibi haecenus promiserunt Mathematici: Attamen innumeris, quod vulgo dicunt, instantiis res illa infringi facile potest, & si conjicere fas est, non aliam forte ob rationem iis temporibus dominatum in scholis medicorum obtinuit, quam solo coeco erga *sectam Galenicam* amore, cui, quicquid etiam *noster* dissimulet, citra contradictionem addictus fuit. Caeterum *sectione secunda, tertia & quarta* de indicantibus a causa, morbo & viribus sic satis adcurate differitur.

§. CXLVI.

Suam insuper huc symbolam, sed alia, nempe tabularum forma, huc contulit, & *institutiones* in tyronum gratiam concinnavit *Godofredus Moebius*, Med. D. & in Academia Jenensi P.P. ordinarius, nec non Electoris Brandenburgici & Administratoris Archiepiscopatus Magdeburgici t.t. Archiater, quae tamen maximam partem ex fundamentis medicinae physiologicis constant, in quibus naturam & origines medicinae, doctrinam de animae facultatibus, spiritibus ac temperamento, nec non constitutionem partium principalium naturalem & praeter naturalem una cum earum usu ex veterum aequae recentiorum sententiis ventilavit variisque observationibus illustravit, quas deinde post Parentis obitum in gratiam tyronum in synopsis contraxit *Godofredus Moebius*, Auctoris filius. Sed,
si in-

fi ingenue fatendum, quod res est, videntur hae tabellae modernis scholarum usibus parum aptae, quia in parte *Physiologica* omnes propemodum ac singulae antiquorum fabellae de spiritibus vitalibus, genitalibus, animalibus &c. de qualitatibus occultis, idiosyncrasia, temperamentis astralibus, ab influxu astrorum vel praedominante planeta in themate natalitio petendis, qualitatibus primis, calido, frigido, humido, sicco variaque earundem mixtura & contemperatione, facultatum animae inutili multiplicatione &c. denuo recensentur, quae an veram ac solidam theoriam, nempe vere medicam, futuris usibus pathologico-practicis recte inservituram multum juvare ac promovere queant, non multa ad intelligendum attentione indiget.

§. CXLVII.

Quod vero *Pathologiam* spectat, pleraque terminis Logicis & Metaphysicis ita involuta sunt, ut non debeant non tyrones artis primo statim intuitu ingenstaedium talibus ex rebus capere. Ita ut unico tantum exemplo hanc rem illustremus, *prima tabula Libri secundi pathologica morbi naturam in genere declaraturus Moebius*, sistit praeter etymologiam & homonymiam, definitionem, genus, subjectum, causas, effectus & differentias essentielles vel accidentales &c. Ubi circa genus notat, morbum non esse substantiam, non impotentiam, non relationem, non motum, nec talem passionem, quae in actionis receptione consistat, nec tandem privationem negativam & quae sunt ejus farinae plura, quae non salivam, sed vomitum, etiam invitis, movere queant. Interea circa morbos partium similarium observat, quod sint vel intemperiei simplicis, ut calidae, frigidae, humidae, siccae, vel compositae, ut calido-humidae, vel calido-siccae, frigido-humidae vel frigido-siccae, & quidem cum vel sine materia praeter naturali; Vel occultarum qualitatum, quorum pestem, febres malignas, luem veneream, scorbutum &c. refert.

§. CXLVIII.

§. CXLVIII.

In *tabula secunda* exhibet causas morborum, ubi praeter alia incondita hoc tantum observo, quod etiam principia Chymicorum, sal, sulphur & mercurius, seriei causarum morbificarum adnumerentur. Symptomata quod attinet, illa secundum diversitatem facultatum explicat, ita quidem, ut v. g. ad expultricem ventriculi facultatem irritatam referat singultum, nauseam, vomitum, choleram tam humidam quam siccam, lenteriam, passionem coeliacam & ructationem &c. Ad facultatem genitalem abortivam vel depravatam reducat sterilitatem, salacitatem, satyriasmum, priapismum & sic de reliquis, quae referre ideo piget, quia pluribus hac in re speciminibus non est opus.

§. CXLIX.

Parte tertia exhibet *Moebius* noster synopsis signorum, quorum eosdem cum aliis quoque *semeiores* scriptoribus fontes agnoscit, & *diagnostica* quidem petenda esse existimat vel a laesa partium constitutione, vel a laesis actionibus, vel a qualitatibus mutatis, vel excretis & retentis, inprimis urina, pulsu, haereditaria dispositione, juvantibus atque nocentibus, nec non communiter vagantibus malis: *Prognostica* vero ex urina, pulsu, triplici symptomatum genere, sputo, lingua & respiratione haurienda esse arbitratur. Deinde admodum prolixus est in tradendis signis temperamentorum & quidem non totius tantum, sed & partium, cordis, cerebri, testium, uteri, pulmonum, hepatis, lienis, ventriculi, renum, quatenus singulae istae partes & viscera sunt vel calida & humida, vel calida & sicca, vel frigida & humida vel frigida & sicca &c. Quae tamen omnia partim aperte falsa partim inutilia & supervacanea sunt.

§. CL.

Methodum tuendae sanitatis *parte quarta* ita pertrahat, ut primum dietam foetus in utero, deinde infantum recens in lucem editorum, porro puerorum ac Juvenum, tandemque mediae aetatis atque senum ordine describat; Hinc progreditur ad historiam rerum, ad sanitatem tuendam

necessariarum, uti sunt aër, cibus, isque vel ex vegetabilibus, uti sunt triticum, secale, hordeum, avena, oryza, fabae, brassica &c. vel ex animalibus, uti sunt lac, caseus, serum, ova, variae carnes & pisces &c. Porro potus, aquosus, vinosus, cerevisiarius, hydromel &c. motus item, somnus, balnea &c.

§. CLI.

In *postrema* seu *therapeutica* parte, quae methodum mendi exhibet, sistitur synopsis indicationum non tantum curatoriarum, morborum intemperiei, occultarum qualitatatum, conformationis, compositionis & solutae unitatis, sed etiam praeservatoriarum atque vitalium, quibus deinde indicationes symptomatum urgentium, doloris, vigiliarum molestarum, sitis intolerabilis, fluxuum alvinorum, vomitionum symptomaticarum, lipothymiarum &c. subjunctae sunt. Atque his omnibus tandem synopsis virium medicamentorum adnectitur, non modo ratione qualitatatum primarum manifestarum, qualia sunt vel calida in primo, secundo, tertio ac quarto gradu vel frigida dictis in gradibus, sed & ratione secundarum ac tertiarum qualitatatum, qualia sunt emollientia, indurantia, adstringentia, resolventia, attenuantia, aperientia, incrassantia, atrahentia, repellentia, vesicantia &c. Haec tandem excipiunt ea, quae cuivis parti adpropriata sunt, exemplo cephalicorum, thoracicorum, cardiacorum, hepaticorum, splenetorum, uterinorum &c. Ut de fonte *pharmaceutico*, quae *ultima* sunt omnium, hac vice nihil addam, ne inutilium & supervacuarum rerum, a quarum lectione Philiatros omni modo dehortor, farragine chartam & tempus perdam.

§. CLII.

In Academia Lipsiensi hanc elementarem artis medicae partem secundum principia & experimenta *chymica* atq; Anatomica *Helmontii*, *Willisii*, *Sylvii*, *Tachenii* aliorumque Neotericorum illustrare conatus est *Michaël Ettmüllerus*, Phil. ac Med.

Med. D. hujusque in alma Lipsiensi P. P. Ord. & Practicus olim per omnem Europam celeberrimus. Edidit non modo Collegii *Institutionum medicarum* in theses concinnati synopsis, *physiologia*, *pathologia*, *hygiene* atque *therapeusi* comprehensam, sed & Collegii *Institutionalis* discursum theoretico-therapeuticum: Quorum illo tyronibus, hoc vero pro-
vectioribus consulere voluit.

§. CLIII.

Missa hac vice epitome, de *Institutionibus Ettmüllerianis* id potissimum hic notamus, quod praeter prolegomena, quae de medicinae natalitiis, progressu & auctoribus, nec non de ejusdem natura, definitione ac divisione agunt, complectantur *physiologiam*, *pathologiam* cum *diagnosi* & *prognosi*, *hygienem* atque *therapeuticam* generalem atque specialem, cui harmonice *collegium therapeuticum* connexum est.

§. CLIV.

Quod igitur specialius *Physiologiam* spectat, admodum quidem prolixus est Auctor in recensendis primo capite corporum naturalium principiis, materia nempe & motu, quae tamen omnia ita comparata sunt, ut ad genuinam theoriam medicam parum vel nihil conferant: Id quod compendiosa recensione ad D. D. Johannem Acoluthum, *Physicum* & *Practicum Wratislaviensem* transmissa dissimulare non audet, quando hunc in modum scribit: *Pauca & parca in naturalibus scientia apodictica, nisi quam ex mathesi haurire licet: Reliquum omne, quod scimus, experimentis, phaenomenis & observationibus effectuum naturalium innititur, quorum fiendi causarumq; ratio cum ut plurimum delitescat, hypotheses variae oriuntur, ex quibus illae sunt optimae, quae plurimum phaenomenorum naturalium explicationem theoricam conceptibiliorem, & applicationem practicam faciliorem reddunt.*

§. CLV.

Vix felicius negotium ipsi cessisse videtur, quando à tractatione principiorum corporum naturalium in genere
L 2 ad speci-

ad specialem tractationem de corpore humano ejusdemque principio vitali *capite secundo* transitum fecit: Ubi recte quidem agnoscit, *corpus humanum vivens* esse verum artis medicae *subiectum & obiectum*; Mox tamen paria cum *mechanicis* faciendo, corpus illud vivum considerat tanquam automa, cujus structura in se considerata, non secus ac reliquorum omnium animalium nihil aliud, quam machina quaedam naturalis hydraulico - pneumatica sit, ex variis organis, pro multiplicibus actionibus artificiosissime fabricata, in hoc solo differens à machinis artificialibus, quod hae externum habeant motorem, à quo partim exstruantur, partim etiam moveantur; Illa autem à principio interno spirituofo dependeat, à quo dicta machina non exstruitur tantum, sed etiam fabricata ad varias actiones, motus & operationes, pro organorum diversitate, determinatur. Quapropter duo hic considerata esse jubet, nempe 1.) structuram corporis humani materialem & 2.) ejusdem operationum principium seu corporis humani vivacitatem vel activitatem vitalem, secundum quam corpus vivere dicitur. Atque haec duo totius Physiologiae fundamenta imò universae medicinae primordia constituit.

§. CLVI.

Quoad structuram hominis, ibi haec tria potissimum considerat, nempe materiam, ex qua constat, deinde ejusdem variam texturam, ut tale corpus vel tales partes emergant, ac denique diversam materiae contextae modificationem, quae alias etiam qualitatum nomine venit, ac nullo alio, quam proprietatum nomine venire debent. In materiam, ex qua corpus humanum constructum est, inquirendo, recte quidem quatuor illa *Galenicorum* elementa inter non entia refert, verum pari incertitudine in locum de-structorum substituit minutias corpusculorum, inter quae salinae emineant, quae mutua sua textura & partem ipsam & temperamentum ejus elementale constituent, quaeque particulae salinae cum sulphureis mixtae, & in continuo
fer-

fermentationis motu sustentatae, & ab aëre inspirato re-
refactae, resolutae & volatilifatae calorem concipiant, per
totum corpus sensibilem, quem vulgo vitalem dicunt. Pro-
indeq;, ubi tales particulae densius agglomeratae & firmitus
contextae atque unitae sint, inde partes solidas durasque,
ut ossa & viscera, enasci credit, sicuti easdem particulas,
mediante liquido dissolutas, & in continuo motu constitu-
tas, partes componere fluidas seu humores opinatur: At-
que ex his particulis summe volatilibus spiritus, machinae
nostrae corporeae rectores exurgere, i. e. fluidas atque
spirituosas corporis partes active sese habere & machinam
agitare, solidas vero passive & ab illis informari atq, mo-
veri, concludit.

§. CLVII.

Principium itaque movens & vitale; quod principa-
liter aëtuat universamque hanc machinam movet & ope-
rationes ipsi largitur, secundum *Ettmüllerum* nostrum, non
est anima cum variis suis facultatibus, quas schola *Peripa-
terico - Galenica* eidem vindicavit, cum anima ista sit *ἀνὰ
Θῆς*, & ad hominis vitam & corpus gubernandum, nul-
lum jus & commercium habeat: sed universum functio-
num animalium aequae ac vitalium systema per principia
mathematico-mechanica in seipsis infallibilia, materiae
applicata, id est, per particularum minutarum, omnia cor-
pora componentium diversas figuras, magnitudines, com-
positiones, situs, texturas & motus corporum naturalium
& sic animalium etiam viventium, explicandum est. Quia
vero nihilominus hae hypotheses materiales vix univer-
sae esse videntur, ac proinde in formatione corporum
organicorum, qualia sunt praecipue animalia, & in ope-
rationibus animalium internis, sensu & motu, vix appli-
cari posse videntur: Hinc tale substituit principium vita-
le, quod quidem sit materiale, at non crassum, fixum vel
difficiliter mobile, sed subtilissimum, summe activum, mo-
bilissimum & maxime volatile; Atque tale esse credit san-
guinem, in spiritum resolutum, per motum fermentativum,

mediante quo omnia mixta sulphureo-salina spiritum urinofum produnt, spiritum, inquam, volatilem, lucidum seu laminosum, lucis instar per universam corporis machinam penetrantem, qui quippe secundum *Auctoris* nostri placitum, vitale sit principium, quo non tantum corpus humanum actuetur sed & à corruptione praeservetur.

§. CLVIII.

Cum igitur, per modo dicta, in machina corporis humani quasi hydraulico-pneumatica originaliter & efficienter spiritus & sanguis principii moventis seu activi locum obtineant; Partes vero solidae & organicae subiectum passivum sint, quae ab istis in motum concitentur, ac ab illis in esse, fieri & operari revera dependeant: Jam vero, uti *Noster* ulterius ratiocinatur, operationes omnes hujus machinae respiciant vel conservationem ejus *in individuo vel in specie*, & illae directae sint ad esse vitale simpliciter, vel ad esse animale: Hinc ad tria generalia capita omnes corporis operationes seu functiones redegit, nempe ad vitales, animales ac genitales. Atque proinde hoc ordine, principio adserto convenienter, agit de nutritione & auctione, de appetitu animali, fame & siti, de alimentorum masticatione ac deglutitione, de chylicatione chylique in intestinis alteratione faecumque ex eo separatione, de chyli secreti per intestina transcolatione & ad alias partes distributione, ejusdem in sanguinem conversione sanguinisque fermentatione ac distributione ex corde ad quasvis corporis partes distributique usu, de pulmonibus & respiratione ejusque utilitate, de lienis & hepatis officio nec non de bilis generatione, de feri superflui, salibus abundantibus impraegnati, exclusione per renes, de motu sanguinis ad glandulas, earum usu lymphaeque ortu & natura, de motu sanguinis ad corporis circumferentiam factaque ibidem insensibili transpiratione, de motu ejusdem ad cerebrum spirituumque animalium generatione & officio; Quam tractationem sequitur

historia

historia sensuum tam externorum quam internorum nec non consideratio motus partium: Ex quo deinde diverticulo in viam reversus *Auctor*, prosequitur sanguinis motum ad testiculos ibidemque factam seminis generationem, deinde agit de conceptione foetusque formatione, de vita foetus ejusdemque nutritione in utero, tandemque universam *Physiologiam* tractatione de partu obsignat.

§. CLXIX.

Patbologiam conjungit *Noster* cum *diagnosi* ac *prognosi*, quia *semeioticam* illius partem esse credit, eamque quatuor tantum capitibus complectitur, quorum *primum* de natura & subiecto sanitatis, morborum atque symptomatum tractat, *secundum* differentias dictorum morborum considerat, *tertium* morborum & symptomatum, corpori humano contingentium, causas expendit, & *quartum* denique rationem cognoscendi affectus & causas, eorumque eventum per signa diagnostica atque prognostica pandit atque evolvit.

§. CLX.

Eodem modo in *tertia Institutionum parte* sese gerit, iterum nempe *hygieinen* cum *therapeutica* conjungendo. Illius praecepta unico, quod de ratione sanitatem conservandi agit, capite complectitur, cujus quippe generales tantum regulas cum respectu ad differentes aetates habito tradit, & quomodo diaeta sanis ordinanda sit, adnectit. Fundamentum diaetae legitimae generale monstrat, consistere in recto usu rerum sex non naturalium, non exclusa tamen insigni efficacia consuetudinis in conservanda prospera valetudine, quae quippe in alteram tandem naturam transire solet, cujus eximiae potentiae uti passim singulares prostant observationes: Ita memoratu inprimis digna est historia tritoris cujusdam, quam ex *Salmutho* recenset *Ettmüllerus*: Tritor quidam, quem febre correptum herus ipsius misertus in lectum reponi curaverat, cum in hoc noctes insomnes ageret & indies pejus haberet, ab adstantibus

tibus tandem petiit, ut in terram super stramen collocaretur; Quo facto suavissime dormivit & aliis adhibitis brevi convaluit. Non minus quoque ingens consuetudinis energia observari potest in evacuationibus artificialibus, purgatione, vomitione, venae sectione, scarificatione &c. quas proinde, qui certis temporibus aliquoties admiserunt, denuo repetere coguntur, adeo ut, si illas negligant vel paululum saltem differant, non solum pejus sese habeant, sed plane circa venae sectae vel scarificationis locum pruritum seu stimulum quendam sentiant. Quibus ita praemissis, dietam trifariam distinguit, nempe in *tenuem*, *crassam* atque *mediocrem*; Tandemque secundum aetatum diversitatem ordinat eandem, ut partim sanitas conservetur, partim vero morbi praecaveantur.

§. CLXI.

In *therapeusi* prolixior est *Ettmüllerus*, & *capite primo* agit de *methodo medendi* in genere, quam nihil aliud esse existimat, quam notitiam curandi per medicamenta & eorundem applicationem, talemq; subinnuit artem, cujus ope medicus auxilia invenit eaque pro sanandis morbis legitime applicat: Tota res eo redit, ut credat *noster*, hanc medendi methodum consistere potissimum in judicio medici practico, super judicio ejus theoretico fundato, i. e. in accurata evolutione causarum morbificarum & inventione causatorum seu effectuum morbosorum, nec non in artificiosa applicatione mediorum ad causas evolutas, pro tollendis morbis & obtinendo fine, nempe sanitate. Quomodo vero judicium theoreticum viget in pathologo: Ita practicum obtinet in therapevta; Id quod tamen rationale esse debet, memoriae contradistinctum, quodque proxime in notitia oeconomiae animalis seu microcosmi particularis, quam Anatomiae studium suppeditet, remote vero in historiae universae naturae seu macrocosmi cognitione fundatum esse debeat: Unde ex horum, judicii nempe theoreatici & practici, diversimode super

per cognitione oeconomiae animalis & universae naturae fundatorum, diversitate, diversas & varias medicorum hypotheses, tam in theoria quam praxi ortas fuisse existimat, quae prout diversimode variant, ita quoque methodum medendi & iudicium medici practicum differre, indeque aliam exurgere methodum medendi *Galenicam*, aliam *Paracelsicam*, aliam *Helmontianam*, & sic deinceps, existimat: Quarum tamen nulla facile, multo minus penitus, in praxi sit rejicienda, cum quaelibet alleget rem facti, & certa quaedam habeat experimenta, ab universa natura & oeconomia animali petita, quae ratione modi applicandi tantum à se mutuo discrepent. Verum ea omnia ita comparata sunt, ut difficulter *Auctor* mihi illa sit persuasurus, qui constanter semper credidi, praxin medicam eo puriorem esse, quo ab arbitrariis talibus hypothesebus sive physicis sive chymicis alienior est atque remotior.

§. CLXII.

Interea *capite secundo* pergit *Noster* ad remediorum seu auxiliorum, ex triplici fonte, *chirurgico* nempe, *pharmaceutico* & *diaetetico* petendorum seriem enarrandam, quorum tamen omnium distinctionem non aliunde dependere putat, quam ab operationum gradibus, ita quidem, ut diaetamitissimum, chirurgia vero generosissimum subministret remedium, pharmacia interim medio modo sese gerente.

§. CLXIII.

Huic vero generali medicamentorum considerationi specialior nunc eorundem tractatio à *Nostro* subjungitur. Cumque causae morborum secundum triplicem eorum classem, pro diversitate partium, quas affligunt, sint vel humorum, seu contentorum & spirituum seu impetum facientium vel continentium seu solidarum partium: Hinc *sectione prima* agit de humorosarum partium vitiis corrigendis, quae cum vel *in quanto* vel *in quali* peccare deprehendantur; Hinc *primo capite* disquiritur, qua ratione vitiosa

M

humo-

humorum, inprimis vero sanguinis quantitas sit imminuenda, cui scopo venaeſectionem undique ſatisfacere, extra omne dubium repositum eſſe exiſtimat. Quod vero notiffimas veterum regulas, quas circa uſum venaeſectionis revulſorium ac derivatorium ſanctè obſervarunt, neglexerit *Noſter*, id ex falſa modernorum theoria, qua deludi ſe una cum multis aliis paſſus eſt, profluxit, qua quippe de circulatione ſanguinis hunc perverſum ſibi conceptum praefigurarunt, quod ſanguis aequaliter feratur per univerſum corpus, & aequali circulo à quibusvis partibus reſſuat, in quas influxit, non vero determinate plus minus ad hunc vel illum locum amandetur: Cujus interea theoriae parum memor *Noſter*, theoretice quidem concludit, tantam harum *revulſionum* ac *derivationum* utilitatem non eſſe: Quoad *experientiam* tamen *practicam*, non omnino de nihilo eſſe earundem obſervationem, atque adeo non ſimpliciter quidem rejiciendam, ſed corrigendam tantum eſſe: Sic enim ultro concedit, revulſione ſanguinem, in quadam corporis regione ſtagnantem in contraria vel oppoſita evacuari, ut aliquando promptius ad hanc fluat, & quantitate ejus imminuta nimium quoque ſtagnationis incrementum imminuatur. Ad quod comprobandum notabile allegat exemplum ex *Lindani Collegio Manuſcripto* de mercatore quodam *Amſtelodamenſi*, cui dexter oculus erat inflammatus; Huic cum medicus ſenex venam ſecaret in brachio ejusdem lateris, magis inflammabatur oculus; Idque mirum eſſe non poterat; Quia ſic ſanguis majori impetu ad partem adfectam ruebat: Cumque altero die Chirurgus in ſiniſtro brachio venam aperiret, oculus antea illaeſus pari cum dextro inflammatione corripiebatur; Quod videns medicus, iterum ſecat venam in dextro brachio, & ibi rurfus augeri inflammationem obſervat, adeo ut miſer aegrotans ferme excôecaretur. Tandem in conſilium vocatur D. *Lindanus*, erroremque amborum videns, ſtatim venaeſectionem in dextro pede inſtituit, atque ita inflam-

inflammationem dextri oculi notabiliter imminui viderunt; Cumque altero die venaesectionem in sinistro pede repetiissent, eundem in oculo sinistro detexerunt effectum & successum; Ut, sublata tandem inflammatione, in integrum restitutus fuerit aeger. Ad quem notabilem casum hanc tandem epicrisin jungit *Ettmüllerus*: *Haec fuit venaesectionis, sed videndum saltem, quantum in opposita parte venaesectionis in recessu habeat.* Tantum itaque efficaciae cum exerat venaesectionis revulsoria ac derivatoria, ideo non pigebit aliud proferre exemplum, quod ex *Actor. Medic. Hassnienf. Vol. II. pag. 194.* allegavit *Noster* de muliere, quae sub mensium fluxu ex venaesectione, instituta in brachio sinistro, hujus inflammationem, in mammis tumorem ac inflammationem, cancrum minitantem sensit: Sicut ancilla alia, aetu fluentibus mensibus, ex venaesectione in brachio, his oppressis, constrictionem thoracis, anhelitum difficilem, suffocationem demum cum delirio experta est: Sic alia mulier eodem plane modo melancholica facta refertur; Pluresque aliae prostant observationes, quae hanc *revulsivae* pariter ac *derivationis* efficaciam abunde confirmant. Conferri possunt, si placet, quae de vi *revulsoria ac derivatoria* olim ipsi disputavimus.

§. CLXIV.

Hinc vero, posteaquam de evacuatione massae sanguineae paulatina paucula attulit, *capite secundo* ad cacochymiam, seu peccantes humorum qualitates corrigendas sese confert, & ordine agit de alterantibus non modo *generatim*, sed & respectu *acidi*, vel *alkali* seu *urinosi* vel *falsi* speciatim, itemque de alterantibus respectu effectus, caloris scilicet ac frigoris, humiditatis ac siccitatis, imo & intuitu certarum partium solidarum, si quacunque demum ratione laedi illas contingat, ad quam ultimam classem aperientia, hypochondriaca, hepatica, antiscorbutica,

incrassantia, attenuantia seu expectorantia, conservantia & nervina cum uterinis referuntur.

§. CLXV.

Relictis alterantibus ad evacuantia progreditur, quorum naturam postquam in genere adumbravit, ordine deinde agit de vomitoriis, catarticiis seu purgantibus proprie dictis per alvum, de diuresi seu urinae provocatione, de sudoris evacuatione, de salivatione tam universali quam particulari, ad quam postremam pertinent apophlegmatismi, errhina atque sternutatoria. Postremum locum occupant clysmata, suppositoria, pessaria &c.

§. CLXVI.

Quae omnia postquam ordine explicuit, ad secundam classem morborum, spirituum nempe vitia emendanda, progreditur: Qua in serie occurrunt confortantia seu cardiaca & analeptica; Cumque spiritus etiam motu vitiato laborare posse *Nostro* videantur, & quidem vel *defective* vel *excessive*: Hinc merito etiam, theoriae huic convenienter, de corrigentibus cogitandum fuit, quibus spiritus, nempe animales, tam torpidi, fixi & quasi insensiles, unde actionum omnium languor & affectuum comatosorum origo dependeret, excitarentur, quam etiam nimium volatiles, impetuosii & subtiles, motuque elastico plus minus perturbati, atque hinc deliria, motus convulsivos similesque alias anomalas actiones excitantes, quodammodo cicurarentur & ad tranquilliores statum reducerentur. Quibus omnibus tractatio de curationibus *sympatheticis*, *magneticis* & *transplantatoriis* subnectitur, tandemque universum *Collegium therapeuticum* curatione morborum, partes solidas adficientium, causarumque morbificarum & urgentium symptomatum generali remotione obfignatur.

§. CLXVII.

Sicuti autem, ut jam vidimus, *Ettmüllerus* principia *Tachenii*

chenii, Helmontii, Sylvii, Willisii aliorumque adoptaverat suaeque theoriae adcommo-
daverat: Ita eorum numero, qui eandem principiis *Philosophiae Cartesianae* superstruxerunt, accensere non dubitamus *Johannem Jacobum Waldschmidium*, Professore-
m Medicinae Ordinarium in Academia *Marpurgensi*, & *Hasso-Cassellani* Principis Archiatrum. Is enim prae-
ter alia, quae edidit, scripta, *institutiones* quoque *rationales medicinae, recentiorum theoriae ac praxi adcommo-*
datas nobis reliquit. Equidem ante complures jam annos ediderat fun-
damenta medicinae ad Neotericorum mentem delineata & in compendium redacta: De quibus tamen ipsemet con-
queritur, quod praeter innumera sphalmata & lapsus quos-
dam in doctrinalibus, quam plurima quoque incondita serie & quasi tumultuarie coacervata atque connexa fue-
rint: Unde ipsemet dubitat, num tyrones medici multum inde lucis haurire queant. Ast vero de *institutionibus* suis,
de quibus hic nobis sermo est, longe aliud fert judicium; Vocat illas *rationales*, quod ex principiis, rationi consenta-
neis sint deductae, nec non morborum remediorumque explicationes per causas rationales & intelligibiles in sce-
nam producant. Sperat insuper, justis illas cancellis sese continere, cum nec in superfluis luxurient, nec in necessa-
riis deficient, de quo tamen duplici naevo hucusque con-
questi sunt, qui studio huic sese consecrare coeperunt.

§. CLXVIII.

Tantum vero bonorum datricem depraedicat *Philosophiam Cartesianam*; Hanc enim caput suum vix extulisse existimat, cum novum quasi sidus incolis regni medi-
ci fuerit exortum, ipsis aegrotantibus certio-rem spondens salutem. Huic *Philosophiae* in acceptis referendum, quod morborum apparen-
tias per suas causas evidentissime explicemus; Quod ipsos morbos denudatos & tenebris e-
volutos in apricum deducamus; Quod porro oeconomiam animalem per motum & figuram interpretemur, nihilque admittamus, quod non clare atque distincte vi principio-

rum mechanicorum percipere possimus; Ac denique, quod remediorum vires & operandi modum ad captum omnium describamus; Quae quidem omnia, si vera essent, amaris merito lacrymis deplorandum foret, quod invida fata tanta nobis beneficia tot seculorum intervallis dene-gassent; Jam vero cordatiores satis norunt, praeter phalerata verba nihil portentosis ejusmodi pollicitationibus subesse.

§. CLXIX.

Audet insuper tyronibus artis persuadere *Noster*, quod hic viam satis expeditam sint reperturi, ad culmen scientiae medicae perveniendi. Et quantum fiduciae ipsemet *Auctor* hisce talibus in rebus reponat, inde haud difficulter aestimare licebit, quod, etiamsi veterani nomen jam promeritus sit & annos plusquam viginti praxin medicam exercuerit, & quindecim fere Professioni artis publicae praefuerit, ipsum tamen non pudeat, istas medicinae rationalis *institutiones* legere ac relegere.

§. CLXX.

Ast vero dandum est aliquid adfectui; Quaelibet enim mater suum lambit foetum. Si autem, quod res postulat, fatendum sit, plures mihi consensuros esse reor, in plerisque, quae pertractantur, partibus meram ἀλλοτριωσιν contineri. In parte enim *physiologica*, quae *Institutionum Waldschmidianarum* prima est, praeter trivialia illa de medicinae origine, ejusque objecto, fine, definitione, genere &c. nihil occurrit, quod hanc medicinae theoreticae partem vel ruditer saltem illustret; Doctrina enim de elementis huc non pertinet, sed alieni, nempe physici, fori est. Quae de chylo ac sanguine differuntur, jejuna sunt, & scopum vere medicum non attingunt. Dogma de spiritibus eorumque distinctione in vitales & animales nec non de modo secretionis eorundem est supervacaneum & fermentum veterum redolet. Et quae de sensibus five externis five internis adferuntur, rectius philisophis quam medicis dispu-

disputanda relinquuntur. Temperamentorum notitia ut-
ut medico scitu & utilis & necessaria sit, a *Waldschmidio* ta-
men mutila & a scopo medico valde aliena proponitur.
In capite de partibus humani corporis praeter obsoletas
quasdam distinctiones nihil solidi adfertur. Ex quibus
proinde omnibus si quis statum humani corporis natura-
lem, quod tamen *Physiologi* officium est, addiscere deberet,
illum Oedipo longe feliciorum & argutiorum esse oportere-
ret. Quibus accedit, quod, omnium reliquorum ita dicto-
rum Mechanicorum ritu ac more, corpus humanum horo-
logio vel alii cuidam automati simile esse, vel eodem mo-
do suas edere functiones existimet; Quod ipsum princi-
pium quam misere omnem rationalem theoreticum nexum
laceret atque interturbet, suo tempore clarius patebit.

§. CLXXI.

Pathologia est altera *institutionum* pars, quam sibi pertra-
ctandam sumpsit *Waldschmidius*; Optaremus saltem, felicio-
ri id fidere ab ipso factum esse. An jure sugillet veteres,
quod causas morbificas, morbos eorumque symptomata
tam sollicitè a sese mutuo distinxerint, disputent alii. Id
saltem difficultate carere non videtur, quod subjectum
omnis morbi radicaliter partibus fluidis, denominative ve-
ro solidis tantum inesse doceat: Unde definitio morbi ge-
neralis, quod sit partium fluidarum in temperie & mixtio-
ne alteratio, suos utique manes patitur. Dum vero de-
inde ad morborum divisiones progreditur, antiquas reci-
nit cantilenas de morbis *cacochymiae* seu intemperiei ca-
lidae, frigidae, falsae, acidae, austerae, pituitosae, biliosae,
viscidae, melancholicae &c. Rectius vero intemperiem si-
ne materia rejicit & morbos occultarum qualitatuum ad
morbos turbatae humorum mixtionis refert. An vero ex
morbos malignorum explicatione per figuras salium,
per aetherem peregrinum &c. multum solatii sint petaturi
sive medici sive aegrotantes, jure ambigo. Quae autem
de accidentalibus morborum differentiis, temporibus atq;
causis

causis morborum, nec non de usu & abusu sex rerum non naturalium adferuntur, trivialia sunt & in vulgus nota. Solum caput de symptomatibus brevi ac perspicua ratione (convenienter tamen principiis semel adsumptis) seriem morborum, corpus humanum affligentium, sistit.

§. CLXXII.

In *doctrina de signis* tam *diagnosticis* quam *prognosticis* valde quidem prolixus est, eorum tamen maximam partem ex *Hippocrate* aliisque scriptoribus mutuo accepit. Missis autem signis status naturalis atque temperamentorum, illa potissimum ex pulsu, urina, actionibus laesis tam vitalibus quam animalibus, victus ratione, vitae genere, sexu, juvantibus & nocentibus nec non communiter vagantibus malis desumenda esse docet, non neglectis quoque signis plethoram, cacochymiam, turbatam sanguinis mixtionem & ventriculi cruditates tam acidam quam nidorofam indicantibus. Signorum vero *prognosticorum* hos constituit fontes, nempe signa *coctionis* vel *cruditatis*, qualia ex urina, excrementis alvi, sputo atque saliva hauriuntur, vel signa *salutis & mortis*, qualia à respiratione, decubitu, pulsu, sudoribus, morbi tolerantia, facie & oculis petuntur; Vel signa critica, qualia sunt insolitae quaedam apparentiae in partibus & actionibus tam vitalibus quam animalibus, nec non in organis excretionibus dicatis observabiles, cum symptomatum citra manifestam aliquam causam intensio-
ne. Vel signa, *morbis tempora* indicantia, quae vel ex indole ipsius morbi, vel à constitutione sanguinis vel ab anni tempore, vel à regionibus, vel à victu antecedente vel à viribus vel à paroxysmorum accessionibus, anticipatione vel postpositione vel à symptomatibus vel à cruditate & coctione desumuntur. Quamquam autem verbis vim crifium dierumque criticorum, imo & verum earum subiectum satis recte agnoscere videatur: In illarum tamen causa determinanda admodum ridiculas adfert speculati-

culationes: Quis enim sani sincipitis homo persvaderi sibi patietur, NATURAM, seu, quod *Noster* idem esse credit, aetherem consuetum, sanguinem humoresque permeare solitum esse morborum medicum? Eundem quoque moliri crises, humores coquendo, secernendo & excernendo? Quis credat, eundem illum cum aethere insolito & peregrino similem propemodum pugnam & bellum quasi intestinum inire, quale in butyro antimonii, ex spiritus nitri adfusione vel oleo tartari per deliquium à spiritus vitrioli instillatione contingere observamus. Sicuti autem ridiculum est bellum, quod duo illi aetheres inter sese mutuo gerunt: Ita non minus ridiculus est ejusdem exitus: *Peregrino* nempe *consuetum* expellente, omnia fluida aliam induere faciem & naturam succumbere: Contrarium horum evenire, & morbum cum salute aegrotantis terminari, *consueto* de *exotico* & *hostili* victoriam reportante. Sed apage talia, quae meliora edoctis nauseam movent.

§. CLXXIII.

Pergimus interim ad quartam *Institutionum Waldschmidianarum* partem, quam *Hygieinen* vocamus, in qua primum de sanitatis conservatione in genere agit, deinde vero diætam à prima infantia ad mediam, ab hac vero ad decrepitam usque aetatem specialius prosequitur, suis quoque monitis prospiciens gravidis atque puerperis: Hinc longa serie describit alimenta tam esculenta, ex regno potissimum vegetabili atque animali deprompta, quam potulenta, non aquosa tantum & cerevisiaria, sed & vinosa, quae tamen omnia centies ab aliis dicta ac proposita fuerunt.

§. CLXXIV.

Sequitur *therapeutica*, ultima *Institutionum* pars, in qua, posteaquam pauca de methodo medendi in genere disseruit & naturam indicationis tam curatoriae quam praeservatoriae, indolem quoque indicantis & indicati exposuit, praecipuas remediorum classes ordine declarat, pri-

imum locum concedendo alterantibus, qualia sunt repellentia, intercipientia, emollientia, humoresq; restagnantes discutientia vel suppurantia &c. Posteriores vero tribuit evacuantibus, uti sunt vomitoria & purgantia, quibus tamen praemittenda esse praeparantia atque digestiva, eccoprotica & lenientia, prudenter & omnino praestice monet. Excipiunt haec evacuantia per urinam sudoresq; nec non apophlegmatizantia, & masticatoria & alia, quae particularibus evacuationibus favent. Quibus postremo loco omnium praedictorum medicamentorum operandi rationes atque facultates jungit & historia praecipuarum operationum pharmaceuticarum cum adparatu instrumentorum maxime necessariorum, uti & remediorum tam compositione quam distributione totum opusculum obsignat.

§. CLXXV.

Id saltem hoc loco monendum restat, harum earundem *Institutionum Waldschmidianarum*, quas quippe Scholarum usui summe necessarias vel saltem eminenter utiles fore sibi persuasit, editionem alia forma machinatum esse incertum quendam Auctorem, cujus nominis initialia verba haec sunt: H. H. S. J. C. nempe per quaestiones & responsiones, sub tabularum forma rite distinctas, ut tyroni medico multo utique cum fructu prodesse queant. Placuit equidem adpellare *Vademecum Waldschmidianum*, ut putares, esse reipse ab ipsis *Waldschmidianis Institutionibus* aliquid diversum, id quod tamen sic sese non habere, tabellas hasce sedulo pervolventi primo statim intuitu apparebit. Neque vero negandum est, hanc erotematicam methodum adolescentes, arti primum initiandos, eximie juvare, testibus egregiis profectibus, quos in Collegiis Examinatoriis privatis facere solent Studiosi.

§. CLXXVI.

Waldschmidio subjungimus *Oligerum Jacobaeum*, Haffniensem, qui varios *Institutionum medicarum* naevos animadvertens,

tens, iisque ex animo mederi cupiens, in gratiam tyronum artis compendium hujusmodi *institutionum* concinnavit, in quo, resectis inutilibus vel minus necessariis Physiologorum & Anatomicorum praeceptis, ea tantum delibavit, quae vias commonstrarent, in quibus adsumpta alimenta mutationes solitas subire solent, in quibus discernuntur ac praecipitantur partes excrementitiae ab utilioribus & nutritioni inservientibus, qua denique lege humores varii, in conservationem vel individui vel speciei in cribris seu colatoriis convenientibus à sanguine percolantur; Cui etiam laudabili brevitati studuit in reliquis *institutionum* partibus, in quibus multa pariter superflua & inutilia ideo resecuit, ne nimia mole vastoque oceano territi tyrones, velut in ipso vestibulo animum desponderent humerosque oneri protenus subducerent, sicuti Auctor ipsemet in Praefatione loqui amavit. Laudo equidem concisam breviter; Valde autem metuo, ne nimis jejunum dimittat artis tyronem, ac proinde ineptum, qui ad reliquas altiores disciplinae medicae partes aditum sibi parare queat.

§. CLXXVII.

Caeterum in conscribendis hisce *Institutionibus* eum sibi scopum praefixum habuisse videtur, ut ex cathedra Academica Auditoribus suis easdem explicaret, id quod & sedulo ipsum fecisse, ipsemet Lectori suo insinuare non dubitat. An autem satis arduas atque sufficientes habuerit rationes, seculi nostri felicitatem tantopere depraecandi, quo nempe iteratis tot experimentis physicis, exculta Anatome ignibusque Chymicorum eventilatis, errores nebulaeque antiquorum penitus sint discussae, & detracta larva, jam facie venustiore ars medica undique enitescat, id merito in medio relinquo, qui jam alias conquestus sum, quod Physica pariter atque Anatome & Chymia multa aliena in medicinam invexerint, quae, quod incrementis artis potius obfuerint quam profuerint, sole meridiano clarius est.

§. CLXXVIII.

Nolumus interea suis, quas meruit, laudibus privare *Nostrum*: Has enim ipse quoque *Bartholinus*, cui censura libelli credita fuerat, agnoscere coactus est, dum hoc de ipso ferre iudicium non dubitavit: Tantam scil. fuisse curam hisce in *Institutionum medicarum* fundamentis solidis, ut appareat, cum felicitate in acquirenda medulla verae cognitionis certasse nitorem verborum & gratiam orationis: Quare omnes Juniores sedulo hortatur, ut ex hocce compendio tanquam optimo exemplari praecepta medica, à multis quippe supervacuis defaecata, hauriant.

§. CLXXIX.

Vereor autem, ne in parte *Physiologica*, quae tribus tantum capitibus constat, brevior fuerit, quam decebat. In *primo* namque agit de chylo & sanguine, in *secundo* de cribratione seu percolatione humorum à massa sanguinea & in *tertio* de temperamentis, ubi tamen multa adhuc desiderantur, quae tyronem artis scire oportet, priusquam ad altiora pedem promoveat. Praecepta sunt quidem brevia, singula tamen adcurate pertractata, nisi quod antiquis quibusdam commentis de spiritibus animalibus, sub nomine succi nervosi hodie venientibus, adhuc nimium patrociniatus fuisse videatur, quanquam spiritum naturalem, vitalem ac genitalem aequo jure exauctoratum esse, uti defunctum nuper hepar suas passum est exequias, recte omnino statuatur. Neque tamen etiam recentiorum lepidas fabellas penitus reticere aequum judicat: Unde, semen masculinum minutissimis animalculis refertum esse, ex mirabilibus *Leuwenhoekii* visionibus fidem facere contendit. An vero doctrinam de temperamentis, quae sua alioquin utilitate non caret, eo ipso clariorem efficiat, dum loco hypothesis haecenus receptae, qua secundum praedominium quatuor humorum, temperamentum in sanguineum, cholericum, phlegmaticum & melancholicum distributum est, aliam ejusdem divisionem in acidum, falsum,

falsum, acre, sulphureum & aquosum substituit, merito dubito, cum pari undique prematur difficultate, si acidum illud, acre, falsum &c. in humorum massa demonstrare deberet, ac illum humorum quaternionem, licet *hoo* prae *illo* longe facilius esse, plerique mihi sint consensuri. Haec tamen temperamenta, undecunque tandem oriuntur, & ratione aetatis & sexus & temporum anni, & diversitatis regionum &c. varium metaschematismum pati posse & actu pati, recte utique agnoscit.

§. CLXXX.

Quod insuper Auctori nostro placuerit, parti *Physiologicae* immediate subjungere *diaeteticam*, id vel ideo neminem probro ipsi facile daturum existimamus, quia id saltem sine exemplo non fecit. Imo idem plane institutum nuperrime adhuc adprobavit *Fridericus Hoffmannus*, Professor Hallensis, in *Tomii prioris Medicinae suae Dogmatico-systematicae sectione secunda*. Agit hic, at nonnisi brevissimis, nervose tamen, de aëre, cibo ac potu, somno & vigiliis, excretis & retentis, motu & quiete nec non adfectibus animi: Quae omnia sex rerum non naturalium titulo ac nomine *Institutionum* scriptoribus alias venire solent.

§. CLXXXI.

Hisce interim sic expeditis, ad partem *Pathologicam* progreditur, ubi, posteaquam de morbis, eorundem differentiis atque temporibus generatim egit, causarum quoque morbificarum historiam eadem propemodum, quae in scholis hucusque recepta fuit, methodo profsequitur. Neque à Scholarum praeceptis multum remota sunt, quae *Libro quarto* de doctrina semeiotica traduntur: In quibus proinde prolixius enarrandis multum commorari non est necesse.

§. CLXXXII.

In ultima vero seu *therapeutica* parte, quae methodum apta remedia inveniendi eademque certo ordine, tota

curationis periodo, administrandi docet, non paucae continentur cautela, quae animadversionem omni modo merentur. Remedia ipsa distingvit in *evacuantia* & *alterantia*, quorum *illa* quantitatem, *haec* vero qualitatem humorum respiciunt; Ad *illa* refert phlebotomiam, emetica, catartica, diaphoretica & sudorifera, diuretica, salivantia & masticatoria, errhina & ptarmica, expectorantia atque pnevmonica, vesicantia & pyrotica aliaque plura. Ad *haec* vero, quae qualitatem fluidorum immutant, corrigunt & alterant, veluti si acida alcalicis, alcalia acidis, viscida attenuantibus & tenuia incrassantibus corrigantur & alterentur, quorsum etiam aperientia, incidentia & attenuantia, adstringentia, emollientia, somnifera atque narcotica &c. referenda sunt.

§. CLXXXIII.

Nunc in eodem hoc *Institutionistarum* theatro comparet *Paulus de Sorbait*, Belga, Medicinarum D. & Practices Professor primarius nec non Sacrae Imperatricis, Eleonora Viduae, Personae Medicus. Placuit *Auctori*, primae huic medicinae parti tribuere nomen *Isagoges Institutionum medico-Anatomicarum*, quae parte *physiologica*, *pathologica*, *semeiotica*, *hygieine* ac *methodo medendi* absolvitur. Videtur esse sectator medicinae antiquae, *Hippocratico-Galenicae*, de qua forte non injuria in praefatione universali conqueritur, quod, etiamsi opulentissimis olim gazis, margaritis, auro gemmisque resplenduerit, nunc tamen empiricorum & ciniflonum impuris manibus devenustata, methodo ac praeceptis misere spoliata conspiciatur. De sua vero *Isagoge* bene sperare jubet Lectores, ob concisam *brevitatem*, *facilitatem*, ob subtiles *difficultatum enodationes*, *utilitatem*, & ob minime fucatam, quam cum vera philosophia habet, affinitatem & connexionem, *raritatem* largiter ipsis promittendo.

§. CLXXXIV.

Videamus vero, qua ratione hisce suis pollicitationibus satis-

satisfaciat. Praemissis in praefatione particulari quindecim canonibus, tanquam dispositionibus ac methodis regularibus tum ad medicinae solidam & fundatam cognitionem acquirendam, tum ad honeste salubriterq; vivendum, ad partem *Isagoges physiologicam* sese convertit, in qua traditis variis medicinae definitionibus ac divisione discussisque variis objectionibus, hic moveri solitis, ad elementorum doctrinam tradendam sese accingit, quorum quatuor agnovisse videtur, terram nempe, aquam, aërem & ignem; Ex quorum omnium complexu, miscela & permixtione temperamentum vivi adstruit, idque cum *Avicenna* describit, esse qualitatem, ex mutua quatuor qualitatum primarum actione, terminum quendam metamve sortita, resultantem. Hoc deinde distingvit in *substantificum* & *qualitativum*, quod posterius denuo duplex esse statuit, aliud nempe *ad pondus* seu *arithmeticae proportionis*, aliud vero *ad justitiam* seu *proportionis geometricae*; Quae omnia majori verborum pompa quam solida utilitate jam ab aliis decantata sunt. Iisdem quatuor elementis, adserit idem, respondere quoque humores, quos in alimentarios & excrementitios distingvit; Ad illos sanguinem stricte sic dictum, bilem, pituitam & melancholiam: Ad hos vero urinam, sudores, lacrymas, sanguinem puerperii, aurium excrementa &c. referendo. Cumque ex humoribus, ut vulgo fabulantur, spiritus generentur, facultatum instrumenta: Hinc, posteaquam integras *facultatem Galenicarum* colonias enumeravit, ad historiam spirituum tradendam sese confert, quos totidem esse numero, quot sunt facultates, ex praemissis quidem *Auctoris* facile consequitur, ipsam vero interea artem multis supervacuis entibus praeter necessitatem onerat. Taceo, nondum demonstratum esse, an etiam ejusmodi spiritus dentur? Unde consequens est; Non entis nullas quoque reales fore adfectiones. Simul quoque corruit, quicquid de *calido innato* & *humido primigenio* differitur. Reliqua, quae de partibus humani corporis tam externis quam internis commentatur *Auctor*, non tam ad *Physiologiam* quam *Anatomiā* spectant.

In parte *Pathologica*, explicata morbi natura in genere, exhibentur ejusdem differentiae, quae vel nituntur diversitate partium H. C. unde exurgit differentia morborum intemperiei & organicorum, vel desumitur a ratione partium, quas infestat morbus, unde oritur divisio in idiopathicos seu essentiales, & consensuales seu sympathicos; Vel petitur ab adjunctis qualitatibus, unde variae aliae exsurgunt differentiae morborum acutissimorum, manifestorum, occultorum, consequentium, connexorum, legitimorum, exquisitorum &c. Vel denique ab anni temporibus, unde aestivi, autumnales, hyemales & vernaes suam denominationem trahunt.

§. CLXXXVI.

In *causis morborum* explicandis exquisitè Logicorum praecepta observat, & praeter efficientem, causas etiam per se & per accidens, principales, totales, partiales, remotas & proximas &c. prolixè quidem, sed citra necessitatem practicam recenset. Dissertit deinde de sex rebus non naturalibus, quatenus omnes tam sanitatis quam etiam variorum morborum causae existunt. Progreditur hinc ad plethoram atque cacochymiam, ordineque ostendit, quæ ratione spiritus sive quantitate sive qualitate peccantes, sanguis item, bilis, pituita, melancholia, serum, vapores, fuligines, flatus, sabulum, calculus & vermes morborum causae subinde evadere possint? Possint, inquam, non aequè vero soleant; Quia illarum plures sunt, quæ rarissime efficaciam suam in excitandis morbis exerere consueverunt, uti sunt morbi spirituum, defectus sanguinis, vaporum, quos quasi per sublimationem ex humoribus generari & vera microcosmi meteora esse, sat liberaliter fingit *Auctor*. De symptomatibus vero tanto brevius loquitur, eaque vel in symptomata actionis laesae, vel excretorum & retentorum vel qualitatum mutatarum distingvit.

§. CLXXXVII.

§. CLXXXVII.

Partem *femeiolicam* exorsus, agit primum de signis in genere, deinde vero specialius disquirat de signis, differentiis, judiciis & contentis urinarum, additis cautelis, medico & urologo observandis. Hinc progreditur ad sphymnologiam seu doctrinam pulsuum eorundemque aetiologiam breviter percurrit. Obsignat tandem universam hanc tractationem doctrina de crisibus, cujus non modo ideam generalem ex *Galeno* declarat, sed & signa bonae ac salutaris criseos, signa itidem, quibus cognoscenda, quasve per vias futura sit, una cum dierum criticorum descriptione, exponit.

§. CLXXXVIII.

Hinc *parte quarta* convertit sese ad *Hygieinen*, quae de conservanda valetudine sollicita est. His disputatis, breviter de alimentorum natura in genere, fusius vero de eorundem qualitate, sumendi tempore, ordine atque praeparatione differit, & qualis cuivis aetati & cuivis anni temporis congruat, disquirat, tandemque de vegetabilibus & animalibus eorundemque partibus, quatenus vel salubria vel minus salubria sunt, suum judicium candide interponit. Neque, quid de variis potulentorum generibus, aqua, vino, cerevisia variisque condimentis sentiat, omisit, addita brevi discussione controversiarum ad *hygieinen* pertinentium.

§. CLXXXIX.

Ultimo tractatu brevem, universalem, &, ut *Auctor* loquitur, accuratam medendi methodum sistit, quae decem capitibus cum controversiis & centum quaestionibus huc pertinentibus absolvitur. Hic autem, praelibatis pro more paucis de nomine, significatione, divisione ac fine medendi, inquit in vera ejusdem principia, quorum duo *Auctor*, *Galeni* vestigiis insistens, esse statuit. *Primum* est: *Ea, quae secundum naturam sunt, similibus conservanda.* Alterum est: *Ea vero, quae contra naturam sunt, contrariis tollenda.*

○

Hinc

Hinc non sine bile invehitur in Chymicos atque Hermeticos, quos quippe intolerabili ausu ac fastu contrarium adferere stomachatur. Tanto vero minus parcit *Paracelsus*, qui per characteres & verba morbos curari posse, adferuit. Nec multum tribuit sigillis, amuletis & periaptis, orationibus itidem, fascinationibus & ligaturis, quae quippe omnia partim suspecta, partim incerta, & magis, astrologis & pseudochymicis tantum digna existimat, additque, morbos, sive ex causis naturalibus ortos sive maleficio illatos, non maleficio vel arte magica, sed remedio vel naturali vel divino curandos esse. Explicato sic principio methodi medendi, inquiritur in naturam indicationis, indicantis & indicati cum eorundem differentiis atque divisionibus, nec non de indicantium signis & veris indicantibus, curatorio nempe, praeservatorio & vitali. Quibus sub finem hujus tractatus quaedam de falsitate empiricorum & methodicorum in inveniendis praesidiis, experientiae & analogismi una cum brevi instructione, hac medendi methodo recte utendi, adjiciuntur.

§. CXC.

Johannes Sterpinus hic non videbatur omittendus; Praeterquam enim, quod *Acta Philosophica Regiae Societatis in Anglia Anno 1669.* ab *Henrico Oldenburgio* Anglice conscripta, latinum in sermonem transtulerit: Universam quoque medicinam tribus partibus, quibus *trifolii medici* nomen imposuit, comprehendere adlaboravit. Quod ejus institutum, diffusam artem in quaecunque compendium contrahendi, licet omni quidem ex parte improbandum non videatur: Jure tamen vereor, ut sic tyronum desideriis ex asse satisfecerit.

§. CXCI.

Accensetur quidem etiam scriptoribus *Institutionum medicarum* *Bernhardinus Christinus à Juvellina*, *Cyrnaeus*; Sed cum libellum hunc, qui *Institutionum* titulo superbit, & cui deinde regulae, consultationes & observationes una cum centuriis quin-

quinque curationum morborum & alia quaedam accesserunt, nullibi, quantacumq; etiam industria adhibita, conquirere potuerim; Hinc & in eo recensendo tanto breviori mihi esse licebit. Jacturam interim fore mediocrem, spero.

§. CXCI.

De *Stephano Blancardo*, Phil. & Medic. D. nec non Practico Amstelodamensi copiosius dicendum est. Is enim cum *Waldschmidio*, cujus *Institutiones* paulo superius recensuimus, paria fecit, & inter eos, qui medicinam fundamentis *Philosophiae Cartesianae* superstruxerunt, nomen suum professus est. Edidit is superiori seculo fundamenta artis medicae sub specioso *Academiae Cartesianae* titulo, quo secundum principia nobilissimi *Cartesii*, quae ille naturae aemula esse existimat, universam doctrinam medicam tam *physiologicam* quam *pathologicam* imo ipsam quoque *therapeuticam* explicare conatus est. Metuo autem, ne vano ambitionis vento inflatus *Auctor*, plus sibi tribuerit, aliisque polliceri ausus fuerit, quam actu praestiterit. Ambitiosum namque est, quod praefatione jactat, se, cum *Cartesius* omnia perficere non potuerit, vestigia ejus legisse, & ingens illud veritatis aedificium, à magno illo Philosopho erigi affectum, provida ratione facem ubique praeferente, effecisse & ad colophonem feliciter perduxisse. Ambitiosius est, quod paulo post de seipso jactitet, se omnes praecedentium seculorum scriptores longo post se intervallo relinquere; Cum nemo illorum *pathologicam*, potissimum *aetiologiam* & medendi methodum ad illum perfectionis apicem perduxerit, ac ipse quidem solus: Unde rationis usu privatim eum esse oportere concludit, qui secundum principia tam clara tamque evidenter ad intimam hominis cognitionem penetrare non possit.

§. CXCI.

Sunt autem, ut summatim omnia, quae dicto hoc opere praestitit *Blancardus*, comprehendam, quatuor rerum

momenta, quorum *primum* statum humani corporis sanum, *secundum* vero modum sistit, quo integritas ejus conservari illaque quocunque modo labefactata restitui debeat? *Tertium* in origine morborum secundum principia *Cartesiana* indaganda, & *ultimum* in modo explorando versatur, quo medicamenta in varios corporis nostri humores operentur eorundemq; corruptam crasim alterent, corrigant atq; emendent. De evacuantibus vero altum hic est silentium.

§. CXCIV.

Ut vero, an tanto hiatu digna sint, quae ingenti arrogantia protulit *Blancardus*, distinctius pateat, de singulis seorsim dispiciamus adcuratius. In parte igitur *Physiologica* demonstrare adlaborat, sanitatem humani corporis consistere, partim in partium solidarum integritate, partim vero etiam in celeri circuitu sanguinis reliquorumque humorum; Qui si contraria nimia tarditate peccet, obstructions & consequenter morbos causetur. In *altera* parte declarat, qua ratione convenienti diaeta & regimine humores in debita sua fluiditate & sic universum corpus in sua integritate salvum conservari debeat? In *tertia* vero, quam alias *Pathologiam* dicimus, demonstrare contendit, omnes morbos vel à laesione partium solidarum, vel ab inspissatione sanguinis aliorumque humorum, indeque orto tardo eorundem circuitu dependere; Et in *postrema* de medicamentis eorundemque operandi ratione, principiis adsumptis convenienter, differitur.

§. CXCV.

In quibus omnibus, ut meam nunc epicrisin adjiciam, sequentia merito desidero: I.) Quod omnes in corpore humano succedentes actus pure mechanice tanquam in automate peragi existimet. II.) Quod à celeri humorum circuitu sanitatem corporis & ab opposita tarditate ejusdem morbos derivet. III.) Quod chymaericis speculationibus theoreticis, praxi certe inapplicabilibus, omnia ita temeret atque coinquinet, ut lascivientis rationis fictiones, somnia atque ludibria ubique clare in conspectum prodeant.

deant. Sic, ut unum saltem vel alterum harum rerum exemplum subministrem, explicaturus modum concoctionis seu fermentationis alimentorum in ventriculo, conversionisque in chylum mediante menstruo gastrico, supponit, materiam mundi subtilissimam, quam alias aetherem subtilem vocant Philosophi, & de quo fabulantur *Cartesiani*, quod nullibi includi, nullibi excludi sese patiatur, irruere undiquaque confertim examinis culicum instar in particulas acidas tam alimentorum quam salivae, cultellorum scindentium instar efformatas, quae subtili ista primi elementi materia in particulas ciborum crassiores adactae, illas aliquamdiu agitent, penetrent, discindant atque diffindant, donec cum ramosis, i. e. biliosis unitae in chylum convertantur: Qui cum crudior & gryseo adhuc colore instructus ventriculo elabatur, novam deinde fermentationem in duodeno & reliquis intestinis suscipiat, confluentibus eo versus non bile solum flava & succo pancreatico, sed & reliquis glandulis intestinalibus succum suum eo evomentibus. Cum autem bilis (ex hypothese) naturae sit alcalinae & oleosae, succus vero pancreaticus acidae indolis: Hinc novam ibi excitari fermentationem, tamdiu continuantem, donec acumina acidi poros alcali eodem fere modo, sicuti gladioli suas vaginulas, oppleverint & quasi obturaverint, sicque ad tranquillitatem & mutuam quietem reduxerint: Unde subtili aëreo-aetherea materia partes alimentorum, mutua fermentatione hoc modo junctas, non amplius tam expedite, ut antea commovere valente, globuli coelestes interea sua pressione dominatum nacti, intimius illas unirent atque conjungerent: Ex quo deinde chylus longe majorem, quam in ventriculo habebat, perfectionem & exaltationem acquirere concludit &c. Pluribus forte speciminibus inutilium talium speculationum, quarum non parvus numerus singulis ferme in capitibus occurrit, non erit opus, cum ex hoc unico *Noster*, tanquam ex ungvibus leo, cognosci satis possit.

§. CXCVI.

Blancardo subjungimus *Cornelium Bontekoe*, in *Academia nostra Viadrina* quondam medicinae Professore publicum & *Friderici Wilhelmi M.* Archiatrum, qui anno 1688. *Amstelodami* in lucem publicam emisit fundamenta medicinae, five de effectibus alcali & acidi per modum fermentationis & effervescentiae commentationem, seu rectius loquendo, commentum, quanquam non ab *Auctore* ipso, sed à quopiam ejus amicorum primum belgico idiomate emissa, deinde vero latinitate donata fuerint haec fundamenta.

§. CXCVII.

Series tractationis ubique confusa est, non raro quoque *ἄσπερον πρῶτερον* committitur, uno ut me verbo expediam, scopis dissolutis non absimile totum videtur opusculum, ut suspicio haud vana orta in me fuerit, theses fuisse, confusaneo ordine discipulis in Collegio privato dictatas, quae deinde ab *Auctore* ipso non revisae, praematuri partus instar lucem publicam adspexerint. Postquam enim primis duobus capitibus de alcali & acido & quinque Chymicorum principiis, meliori duorum istorum salium explicationi servientibus, egerat, subjungit quinque sequentibus capitibus methodum, nova medicamenta praeparandi una cum enarratione praecipuorum simplicium, ex minerali, vegetabili & animali regno petendorum: Tum vero subnectit demum capite octavo fundamenta quaedam, ad novum aedificium in medicina & chirurgia extruendum. Quod ipsius institutum ut felicibus auguriis succedat, constituit lapides fundamentales recte disponere & fundum omnem aequare, cui deinde omne id, quod ad fabricam promissam spectet, firmiter & sine lapsus metu innitatur. Id vero ut reipsa praestet, propositiones quasdam physicas praemisit, quas infallibiles vocat, ac proinde fundum ignorantiae paludosum circa corporum & motuum notitiam desiccare laborat. Huic deinde fundo bene desiccato alcali & acidi palos, ut ipse putat, firmissimos

infigit,

infigit, ac postea cum aqua, terra, spiritu, oleo, aëre & igne ita firmiter vincire studet, ne ullibi vacillet ac titubet opus; Sic vero contextum plana hac effervescentiae ac fermentationis tractatione cooperit: Quibus omnibus debite elaboratis, videtur sibi fundamentum jecisse, quod immobile (si DIIS placeat) consistat, & super quod ingens illud artis medicae atque chirurgicae palatium extrui queat.

§. CXCVIII.

Jam, si quis ea curiositate teneretur, ut scire cuperet, quomodo haec duo principia, alcali & acidum, ortaue inde fermentatio vel effervescentia omnibus phaenomenis, in *Pathologia* praecipue, solvendis sufficiat, anxius sine dubio haereret *Auctor*, qua ratione seriae tali curiositati satisfaceret? Si credat, rem physicis quibusdam propositionibus, iisque admodum generalibus, de corporibus ac motibus expediri posse, sine dubio fallitur. Morborum vero dum quatuor sistit differentias, nempe morbos succorum, systematis partium solidarum, impedimentorumq; in animae atque corporis operationibus, pluribus se implicat difficultatibus, quam quibus explicandis expeditam inveniat viam. Nam in exponendis morbis succorum primo statim in limine impingit, dum paucos morbos ex succorum abundantia oriri statuit: Illud vero eorundem vitium admodum familiare, si non unicum, esse credit, quod succi nimis inspissati sint, aut aquosi, acres, celeres nimis vel tardi, non currenter, vel aliorsum, quam oporteat, euntes: Id quod peritae observationi practico-clinicae e diametro contrarium esse, omnes experti Practici uno ore fatebuntur. Similiter falsum est, in succis duplicem tantum acredinem esse, acidam aliam, aliam vero alcalinam; Sicuti & illud aperte falsum est, partes solidas ex alcali & aqua conflari, in quibus proinde vix acidi quicquam reperiatur: Unde sponte consequitur, falsum quoque esse: Omnes morbos, a succis acribus originem suam ducentes, acidum tanquam primariam causam agnoscere. Suis item dubiis.

dubiis atque difficultatibus haud caret, quando ulterius statuit, officinam principem, in qua ejusmodi morbosum acidum producat, esse in primis ventriculum cum intestinis crassis, quanquam secundum speculatoris nostri mentem in omni quoque angulo, ubi succi in quiete versantur, fermentatio contingere indeque acidum procreari possit; Adeo ut in omnibus quoque inflammationibus, abscessibus & ulcerationibus acidum reperiatur. Acredinis inopiam rarius contingere; Si vero contingat, ob succorum viscositatem eandem fieri, docet. Nec negandum esse monet, in sanguine aliisque succis non raro sal volatile fere deficere, atque hoc in casu acidum & viscidum dominium sibi arrogare: Digniores notatu esse tardum humorum cursum, sive totalem eorundem a motu cessationem, quod utrumque tamen ab alia causa provenire non possit, quam a sola viscositate, ex coagulatione vel ab acido, vel a frigore, vel ab impedito cursu in minimis canaliculis obturatis, nec non, quod istarum rerum consequens est, ob caloris, virium, motuumque defectum, vel quando earum rerum pressiones, quibus succi protruduntur, cessant.

§. CXCIX.

Dum vero ulterius morborum, solidas partes adficiendum, seriem recenset, suorum principiorum ne verbo quidem meminit, id quod tamen fieri oportebat, si novo chirurgiae aedificio extruendo inservire debebant. Sed hisce omnibus prolixius enarrandis non immoror, dummodo hoc unicum adjicere adhuc licuerit, phlogosin *Autori* nostro nihil aliud videri, nisi inflammationem quandam, corpus nostrum subito invadentem ac subito denuo cessantem & rubedinem in facie atque genis conjunctam habere, atque adeo adfectum esse partium solidarum &c. Quod licet forte tyrones artis sibilo dignum judicarent, decoro tamen repugnat, quia speculator noster suo tempore haud paucis admirationi & in celebri academia artis suae Professor fuit.

§. CC.

§. CC.

Converto me potius ad methodum, morbis sanandis proficuum, quam melius institui non posse adferit, quam succorum correctione, five, quod idem plane est, alteratione, quae tamen, quam parum divisioni morborum antea propositae respondeat, in aprico est. Absolvit autem universam curationem internam per remedia, quae ad classem temperantium, sudoriferorum, diureticorum, catartiorum, emeticorum & anodynorum reducit: Ad externam vero revocat anodyna, dissolventia, mundificantia, consolidantia & caustica; In qua universa medicamentorum classe nihil occurrit, quod humorum correctioni directe quadret, praeter temperantia & anodyna: Reliqua enim vel evacuandi vel partes solidas adficiendi scopo destinata sunt.

§. CCI.

Quod igitur temperantia haec eorundemq; efficaciam speciatim attinet, ea omnibus morbis, ex acido ortis, tanquam necessaria destinare non dubitat, cum secundum *Auctoris nostri* ratiocinium inter *alkali* & *acidum* sit actio & motus, ut unum alterius actionem, vim & energiam brevi temporis spatio destruat. Ex quo fundamento colligit, quatuor esse temperantium species, nempe I.) alcalia tam fixa quam volatilia. II.) oleosa & pingvia, quae tanquam hamis & ramis instructa, acidas particulas ita circumdant, ut aequae parum nocere amplius queant, quam ensis vaginae inclusus. III.) Aquosa, in quibus *acidum* & *alkali* facile lique scat, sicque minus pungens efficiatur. IV.) Omnia illa, in quibus *alkali* praedominium obtineat, magnetis instar sese habere, quo acidum evertatur. Cum vero facile suboluerit *Nostro*, eventum practicum praefigurationibus hisce theoreticis non aequae feliciter respondere: Hinc agnoscere nullus dubitavit, in hunc usque diem neminem adhuc ostendisse, vera dari temperantia, i. e. talia remedia, quae acida ita reipsa immutarent, ut acida esse desinerent, seu, quae omnem suam acredinem acidam eo

modo deponerent, quo acies cultri habetatur & obtusior redditur. Cum aquosa reipfa nihil aliud praestent, quam ut acidum & alcali intra sese abscondant, quae tamen illaesa ἐπὶ το πολυ extrahi denuo possint. De operatione vero alcalinorum in acida & acidorum in alcalina unicuique perspectum sit, contingere hic tantum quandam partium confusionem & mixtionem, & à nemine clare demonstrari posse, num alcali, num vero acidum suam mutaverit figuram, quorum alterum ab altero, saltem ἐπὶ το πλειστον, illaesium & immutatum separari queat. Denique, suis quoque incommodis haud carere pinguedines & olea, ultro fatetur.

§. CCII.

Inter anodyna solum fere opium extollit, quod quippe remediorum omnium Hercules quasi sit & domitor, quo nullum aliud suum munus celerius, promptius ac tutius exequatur, &, quod merito mireris, rariores esse casus, in quibus non conveniat opium; Meras enim calumnias esse & crassa nonnullorum praejudicia, qui narcosis quandam & vim stupefacientem ejusdem ubique criminarentur; Tanto vero minus veritati congruere, vires aegrotantium extingvi & mortem accelerari opiatorum usu. Optandum foret, haec omnia, uti narrantur, ita examussim sese habere! Ast prohdolor! Experientia clinica omnibus cerebrinis speculationibus multis parasangis praeferenda, contrarium mille casibus comprobavit & adhuc indies comprobat, quod opiata in plerisque ab *Auctore* citatis & allegatis casibus, nempe in doloribus arthriticis, ischiadicis, convulsionibus, tussi, asthmate, alvinis promiscue fluxibus, tenesmo, nephritide, in omnibus haemorrhagiis, in cunctis propemodum febribus, variolis, morbillis, morbis malignis, peste, vertigine, phrenitide, mania, epilepsia, phthisi, tabe, nimia fame, palpitatione ac tremore cordis &c. mirum quantum potius noceant quam prosint. Quibus tamen heteroclitis encomiis non obstantibus, invitus agnoscere cogitur, quod in valde imbecilibus, hydrope
confir-

confirmato, adpetitus defectu, morbis soporosis, alvo dura &c. vel nihil opii vel exigua saltem ejusdem dosi vel cum multo sale volatili permixtum exhibere oporteat.

§. CCIII.

Quod reliquum est, multum quidem etiam diaphoreticis atque sudorificis, diureticis atque catarticis tribuit; Ita tamen, ut, qua ratione acido supposito cicurando vel ejiciendo inservire debeant, nullibi adpareat, atque adeo necessarius nexus inter theoriam & praxin, inter principia & conclusiones ubique desideretur. Et cum denique circa usum horum remediorum moneat, medicum decere, veteres criticos non attendere, sed maturandum esse, ut sudor &c. acceleretur, unicuique in sensus incidat necesse est, *Auctorem* nostrum, cerebrinis suis speculationibus occaecatum, magnum sane in praxi Herculem non fuisse. Unde concludo, haec fundamenta ad tyronem artis potius confundendum, quam ullo modo juvandum conducere. Et sicuti lubrica sunt, ut vidimus, fundamenta, quibus palatium suum superinaedificare adlaboravit: ita idem praeceptum mox corruisse, non est mirandum. Pluribus eadem haec principia refutarunt *Johannes Bobnius & Fridericus Hoffmannus*, ille in *Dissertatione Epistolica ad D. Joëlem Langelottum, Ducis Holsatiae Archiatrum, de alcali & acidi insufficientia pro principiorum seu elementorum corporum naturalium munere gerendo: Hic vero in exercitatione Acroamatica de acidi & visceri pro stabiliendis omnium morborum causis & alcali fluidi pro iisdem debellandis insufficientia*, ad *Dn. Theodorum Christophorum Krug de Nidda, Potentissimi Prussorum Regis Friderici Archiatrum & Consiliarium Intimum* ante paucos annos, mortalium coetu, qui longiori vita dignus erat, ereptum.

§. CCIV.

Convertimus jam nos ad *Michaëlis Bernhardi Valentini, Med. D. ejusdemque ut & Philosophiae Naturalis in Academia*

demia Hassio-Gieffena P.P.Ord. Medicinam Nov-antiquam, seu cursum artis medicae, è fontibus *Hippocraticis* juxta principia naturæ mechanica mentemque modernorum erutum & perpetuis commentariis illustratum, in quo per formam *Institutionum* non tantum generalia medicinae fundamenta, sed & conspectus materiae medicae selectioris, methodus praescribendi formulas, monita practica cum potioribus & ex parte rarioribus artis chymicae, chirurgicae & obstetriciae enchiridibus traduntur. *Auctor* in universo hoc opere in eo est, ut pleraque modernorum novissima dogmata jam in monumentis *Hippocraticis* extare, *Lectori* persuadeat: Unde ipsius Philosophiae corpuscularis, imo, ut plus dicam, ipsius quoque Mechanismi, quem hodie in ore habent omnes, clarissima vestigia sese ibi reperisse adserere non veretur. Quod ut tanto probabilius reddat, verba *Hippocratis*, quae libro de his, quae uterum non gerunt pag. 251. editionis Foëssianae: Conare, ut te naturalem medicum exhibeas, ad hominis habitum & vires respiciendo; ita interpretranda esse vult, ut per habitum & vires nihil aliud intellexisse videatur senex, quam naturae mechanismum, in machina hominis hydraulico-pneumatica conspicuum, qui non tantum in fluidorum undulatione, sed & solidarum partium tono atque elatere, quem alii motum tonicum vocare solent, observetur. Cogitavit itaque *Auctor* Celeberrimus, operae pretium sese facturum, si recepta artis & naturae principia ex fontibus *Hippocraticis* derivaret, & non tantum ex libro *Aphorismorum*, sed & reliquis ejus scriptis, methodo jam à *Jacobo Sponio* haud infeliciter tentata, dogmata Philiatris scitu maxime necessaria erueret, & in artis formam redigeret, simul tamen etiam *Institutiones* non ratione tantum & experientia sed & auctoritate gravissimi hujus Senis ita communiret, ut, quemadmodum *JCti Institutiones Justinianae* habent; Ita quoque medici *Institutionibus Hippocratis* auctoritate munitis instructi essent, quae omnium instar essent, & quibus orthodoxiae gloriam aequo cum aliis jure adfectare possent, ne amplius
sine

sine regula ubique recepta oberrare cogerentur. Laudo equidem *Auctoris* institutum, atque certissime persuasus sum, non sine ingenti labore multa egregia dogmata ex fontibus *Hippocratis* eruta esse: An vero multi quoque textus non obtorto collo ad multa Neotericorum dogmata confirmanda trahantur, peritioribus dijudicandum relinquo; Nobis enim nunc omnia (loco potissimum alieno) adcurate excutiendi otium non suppetit. Illud solummodo brevibus hic indicamus, quod universum hoc artis medicae curriculum, systematice tractatum, octo partibus comprehendatur, duabus nempe principalibus, *hygieine* atq; *therapeutica*, & sex, minus principalibus, quae aut illas antecedunt, ut *physiologia*, *pathologia* & *semeiotica*, aut consequuntur, ut *diaetetica*, *pharmaceutica* & *chirurgica*.

§. CCV.

Idem cum *Valentino* propositum in animo habuit *Jochimus Targirus*, medicinarum Doctor, in medicina sua compendiaria, in qua, propositis veterum sententiis, novam, & ut loqui amat *Auctor*, verissimam artis medicinae formam ac rationem breviter ac dilucide explicare conatus est. Cum enim prudenter observasset, aetatem nostram in ipsam perturbationem disciplinae veteris improvide incidisse, nova nondum constituta aut saltem nequaquam confirmata; Jam vero tantum absit, ut veterum inventa omnino rejicienda sint, ut potius sine fideli horum observatione remediorum atque morborum nullam fuisse artem judicet; Interea tamen etiam, quae recentiorum industria notavit, alto promiscue supercilio contemni pariter non debeant: Hinc temperie quadam suo in compendio uti, i. e. nova cum antiquis conjungere aequum duxit *Auctor*; Unde merito invehitur in perversos modernorum mores, qui, relictis constitutis tritisq; praeceptis veterum, debiles tantum errantesque suas proponant sententias. Quid enim hodie familiarius, quam cernere volumina, nihil fere continentia, praeter jejunas repetitasq;

compilationes eorum, quae tractant hodie Physici! Nimirum istam philosophandi subtilitatem uti in cetera vivendi ratione, ita in ipsa potissimum medicina non tam utilem quam noxiam potius esse, in hunc usque diem satis experimur. Proinde nulla in re occupatus esse voluit *Noster*, nisi quae ad artem salutarem pertineret. Quare multa dejicienda, plurima convertenda, sed non pauca etiam, quae crudeliter ab aliis vexata & à medicina ejecta erant, quasi postliminio reducenda ac restituenda fuisse, è re sua fore credidit.

§. CCVI.

Univerſo in opere ita sese gessit, ut, quaecunque in descriptione artis ab antiquis peccata essent, detegeret & clarius explicata daret: Corporis vero oeconomiam continua serie in functionibus naturalibus pertractavit, & partem medicinae *physiologicam* ita purgatam expeditamq; proposuit, antiqua ut ejus partitio, nova vero & magis dilucida rerum explicatio videretur. *Pathologiae* quoque, quae de morbis agit, non mediocrem attulit opem, morbiq; naturam atque definitionem apud antiquos obscuram & ambiguam illustravit, rejecta putida eorum distributione, & substitutis iis morborum generibus, quae non à commentitia quadam temperie, sed ab iis rebus hauriuntur, ex quibus humanum corpus revera constitutum est. Causarum quoque & symptomatum naturam ita sibi exposuisse videtur, ut, quae à veteribus iis de rebus scripta sunt, nihil aliud, quam confusionem quandam & obscuritatem intellectus, docere videantur. Cumque signorum ratio & differentiae eorundem ab falsa Philosophia ita depravata essent, ut *Theseo* opus fuerit, qui tanto in labyrintho filum duceret: Noluit quoque suis hic deesse partibus. Atque hoc est schema totius operis, quod in Praefatione ad Lectorem ipsemet adumbrare voluit.

§. CCVII.

Videamus nunc, an & quatenus hisce suis promissis
satisfe-

satisfecerit! In *parte prima*, quae *Physiologiam* sistit, ordine agitur de medicina ejusque divisione, de elementis eorundemque mixtione, de temperamentis non totius tantum, sed & aetatum atque partium, de calido nativo, de triplici partis similis substantia & humoribus secundariis, de mutatione calidi nativi, de animae facultatibus in genere, speciatim vero de facultate animali; vitali ac naturali, de generatione animaeque functionibus. Ex quibus omnibus nunc paucula, *Auctori* nostro singularia, excerpemus. Vulgaris primum medicinae partitio in quinque partes eidem displicet, cum semeiotica, quam vulgo tertiam artis partem faciunt, physiologiae & pathologiae adhaereat, atque adeo quatuor partes sufficere queant; Quod jam alios advertisse, hinc inde monuimus. Quaestionem, an medicina sit ars, an scientia, merito tanquam inutilem nullo numero habet, cum intuitu *hygieines* & *therapevtices*, quae praecepta & remedia procurandae valetudinis causa suggerunt, sit ars, respectu vero *Physiologiae* atque *Pathologiae*, quae in cognoscendis corporis humani functionibus atque affectibus occupatae sunt, scientia potius dici mereatur. Ejusmodi scientiam in arte facienda medico ut summe necessariam ideo merito commendat; Quia medicinae exercitium non à solo instinctu motuque mechanico pendet, ut vulgaris fert persuasio, insuperque corpus humanum non aliorum corporum instar iners sit atque otiosum, sed agens in se, variis viribus & facultatibus instructum habeat, quod intentionem medici variis modis illudere ac frustrari possit, imo ipsa quoque instrumenta, quibus medicus utitur, non ita sua in potestate habeat, sicuti alii artificii lapidis vel ligni instar obsequuntur: Hinc doctrina atque scientia, ad abditas rerum naturas & causas peruestigandum, opus est, vera nempe & genuina scientia rerum humanarum, cum ipsa veritate consentiente, nullis figmentis falsae Philosophiae contaminata.

Praeterea recte confutat errorem veterum, quando solidis tantum partium nomen vindicarunt, sanguinem vero & reliquos humores horum ex numero removerunt, cum non solidis tantum agendi potestas sit concessa, sed ipsa quoque contenta seu fluida, non ratione imaginariae facultatis, illique adjunctae functionis inter partes recipi aut ab iis excludi debeant: Sed quod sociata inter se sint, quod à se mutuo dependeant, ac denique in commune commodum conspirent, atque eo ipso & nomen partis satis superque mereantur, & subiecta sanitatis morborumque statuantur. Neque sine ratione partitionem partium in *similares* ac *dissimilares* repudiavit; Quia, quas antiqui similes partes adpellarunt, manifesta dissimilitudine notantur, qualis compositio in cute, arteria, vena, nervo, musculo &c. admodum conspicua est. De elementis id quoque rectissime agnovit, non solummodo, quod doctrina veterum de illis admodum sit obscura & ex Philosophia temere in medicinam detrusa; Verum etiam, quod figmenta illa atque insomnia scholasticorum ad medicinam nihil prorsus faciant, ac proinde sat commode praeteriri possint. Disputationem de temperamentis & natam & educatam esse credit in Philosophia veterum, quae, cum lumini esse ingenio humano, nostram detegere ignorantiam & errores emendare deberet, densis potius tenebris omnia obduxit, justum scientiarum ordinem pervertit, verasque rerum naturas occultavit, mutavit, extinxit; Eam quoque doctrinam non à propria & intrinseca rerum forma, sed à sensibili qualitate denominatam esse, ut aliud calidum, aliud frigidum & aliud siccum dicatur: Jam vero sensum & tactum nostrum temperamentorum istorum valde iniquum constitui iudicem. Calidum nativum, spiritum & humidum primigenium vana & in medicina inepta vocat nomina. Contentiones de natura fervidiores, quam res postulabat, fuisse, merito dolet; Quanquam ob interpretationem antiquorum obscuram, nullam huiusce vocis in medicina

dicina usum esse, ideo putandum non sit. Supponit itaque in omni animalium & plantarum generatione intestinum aliquod in ipsa materia, seu corpore plantae & animalis, generationis & motionis activum principium, quod primum sit illius naturae, quam medici considerant, quaeque non male dicitur opifex & conservatrix corporis causa. Neque tamen naturam istam à vita nostra diversam esse contendit, ut mirari non debeamus, illam perfecto operi in omni vita insidere. Quo in significato vocis naturae nullum committi posse peccatum confidit, dummodo, quod alii credunt, ne propter finem agere fingatur.

§. CCIX.

Spirituum doctrinam à veteribus traditam reformaturus *noster*, supponit, praeter spiritus innatos, qui stabiles in unaquaque parte & fixi credebantur, tres influentes & vagos ab illis dictos esse; Naturalem, qui ex jecore per venas, vitalem, qui ex corde per arterias, & animalem, qui in cerebri ventriculis genitus per nervos in omne corpus diffunderetur: Quorum omnium productio ita fieri quondam putabatur, ut naturalis materia esset vitali, & vitalis iterum animali. De spiritu vero insito hoc singulare addebant antiqui, vinculum illum esse, quo anima cum corpore conjungeretur, perque illum & calidum nativum singularumque partium facultates conservarentur. Verum enim vero, quanquam ex singulis humani corporis partibus peculiarem elici posse spiritum concedat; Ejusmodi tamen spiritum ante separationem fixum, otiosum atque potentia tantum calidum esse & actuosum demum actuque calidum fermentatione evadere existimat, illumque revera unicum tantum esse ac simplicem, nempe animale, cujus materia partim ex elemento tertio, particulis scil. tenuibus, volatilibus ac potissimum oleagineis, ad quas tamen etiam particulae acres saliaque volatilia accedant, constituatur, partim vero ex elemento primo ab igne in corde accenso, partim denique ex elemento

mento secundo componatur, forma vero in motu illo, quem primum & secundum elementum ex se, tertium vero propter ista habet, ac inde in illa corpusculorum tertii elementi separatione, propter quam libere & seorsim moveri & quasi volare inter sese possunt, consistat. Si quis tamen ternario spirituum numero delectaretur, illi libertatem indulget, *naturalem* quaerendi in chylo, atque pro effectū primae coctionis habendi, alterum vitalem quidem adpellandi, qui tamen naturalis rectius diceretur, quod in perficiendis suis functionibus primum sit instrumentum, quique ex subitanea sanguinis incallescencia, quae singulis pulsibus fieret in corde, oriretur; Ac tertium denique, qui animalis audiret, quique in cerebro non tam gigneretur, quam ante genitus à reliquo consortio separaretur.

§. CCX.

Ad facultates animae explicandas devolutus, accusat iterum veteres, quod facultates istas, quae necessario ex humani corporis natura profiscerentur, ad animam tanquam causam principem retulerint; Cum nihil sit inanius dicere, quam corpus nostrum, ut ex elementis, temperamentis, calore & spiritu constitutum est, iners atque otiosum esse, neque aptius quam cadaver ad vitae munia atque functiones efficiendum: Cum potius sit automaton non tantum naturalium & vitalium per sanguinem, humores & organa naturalia, sed etiam animalium functionum per cerebrum, spiritus, nervos & organa animalia. Actū & per se vivere corpus nostrum, quia & ad agendum aptissimum est instrumentum & seipsum viribus assidue restaurat; Quae restauratio cum internam alimentis subactionem conjunctam habeat: Hinc spiritum produceret, ex quo motus & sensus atque adeo vita animalis oriretur. Quo circa actiones non cessare in corpore, nec hominem mori, infert, quod anima discederet, propterea illam abire, quia corpus aptum porro instrumentum non esset,

esset, organaque corrupta, ad functiones istas efficiendas non amplius accommodata. Unde consequitur, naturale, vitale & animale non esse unius animae in homine partes, sed sociata tantum & connexa dici posse, non vero in unius animae substantiam conspirare.

§. CCXI.

Relictis facultatibus ad functionum explicationem sese accinxit *Auctor*, easque in tria genera partitus est; Primam illarum ita solius corporis propriam esse putat, ut merito naturae instinctu perficiatur; Unde etiam *naturalem* optimo jure dici posse persuasus est, cum ad hasce functiones expediendum sola partium dispositio motusque corporeus concurrant. *Animales* vocat, in quas nullum imperium constitutio corporis aut illius motus obtinet, sed quae ab anima sola profiscuntur. Postremum genus adpellat *compositas*, quae ex animae cum corpore societate profiscuntur, quarum causae ortusque tam animae, quod juncta cum corpore, quam corpori, quod mente praeditum est, assignari possunt. Uti vero functiones naturales non solum in alimentis digerendis ac distribuendis sunt occupatae, sed & sangvificatio, circulatio sanguinis, nutritio, generatio opusque universum tam secretorium quam excretorium ad hanc classem pertinent: Ita ad functiones animales retulit sensus atque motus. Quae universa tractatio uti latissime sese diffundit: Ita non minus singulares multas *Auctoris* opiniones comprehendit, quas tamen prolixitatis nimiae vitandae gratia studio hic omitimus.

§. CCXII.

Pergimus potius ad *Pathologiam*, quam non minus, ut *Physiologiam* ab erroribus & figmentis veterum repurgavit *Targirius*. Et quemadmodum in primo statim *Theoriae Pathologicae* limine de natura morbi in genere agi consuevit: Ita non obscure ab *Ipsa* accusantur veteres, quod veram morbi indolem ejusdemque genuinum fundamentum

profunde ignoraverint. Equidem, quod ordinem in *Pathologica doctrina* ab Ipsis servatum attinet, quo primum de morbis, deinde de causis, porro de symptomatis tandemque de signis agunt, nihil magnopere desiderari posse videtur: At vero, dum morbum dicunt affectum contra naturam, qui naturae vim inferat ejusque actiones laedat, sicque ille solus tantum partes solidas cum similes tum organicas occupare credatur, atque adeo in contentis, sanguine nempe reliquisque humoribus causae, in ipsis vero functionibus, si quae vitia observentur, symptomata adpellentur, quia in partis substantia non inhaerescunt: Recte utique antiquos inculpasse videtur *Noster*, quod naturam morbi ejusque fundamentum ignoraverint: Quia morborum, causarum atque symptomatum non diversa maximeque contraria est natura, sicuti veteres voluerunt, sed saepe eadem & solo respectu diversa, imo causae & symptomata in se morbi esse solent, qui quandoque nullo modo, saepissime omnino à se invicem dependent. Accedit, ipsas quoque fluidas corporis humani partes ab insultibus morbofis tutas non esse, cum sublata humorum aequabili mixtura necessario conturbatus sequi debeat motus, & vitia sanguinis, quae in motu, sive nimium aucto sive imminuto consistunt, neminem latere possint.

§. CCXIII.

Eodem, ni fallor, jure condemnavit sententiam *Galenicorum*, qui, uti solis partibus solidis facultates inditas esse voluerunt, easque pro sanitatis domicilio solas habuerunt; Ita quoque illas solas in *Pathologia* morborum subjecta fecerunt: Quo ipso manifeste iterum prodiderunt, quod indolem sanguinis reliquorumque fluidorum non intellexerint, quae quippe praeter vitium in quantitate, pravam subinde diathesin induere, sicque morbum excitare possunt ac solent, etiamsi nulla pars solida simul laesa sit, quanquam interea id quoque diffitendum non sit, neque crebro neque diu fluidarum partium morbos per se consistere, quin statim functiones nonnullas, quae solidis partibus

partibus vulgo attribuuntur, laedere, impedire imo ipsam deinde solidarum substantiam afficere atque impedire soleant. Atque adeo triplex morbi subjectum constituit *Targirius*, & primum quidem, si contentum, deinde, si pars solida, tandemque si utrumque, quod frequentissimum est, laedatur.

§. CCXIV.

Examinata morbi natura, in genere veterum sententiam de variis morborum differentiis discutiendam sibi sumpsit. Cumque illi in *physiologicis* partes humani corporis in similes ac dissimiles seu organicas distinxissent; Opportunum ipsis visum est, ipsos quoque morbos in *similiares* atque *organicos* partiri, similes vocando, qui partis *similares* constitutionem perverterent, *organicos* vero, qui instrumenti symmetriam infringerent: Verum quos illi similes adpellant, *Noster* longe adcommodatius morbos materiae, sicut *organicos* rectius *structurae morbos* dici posse existimat, per morbum materiae indigitando omnem pravam vitiosamque constitutionem, quae ad materiam cujuscunque partis spectat, pro eo, quod opponitur structurae, quae cum diversis quoque modis vitiari possit imo soleat: Hinc diversi quoque structurae morbi exoriuntur, quos in catalogo morborum organicorum recensere solent Auctores, quique ad morbos *solutae unitatis* sat commode reduci valent: Cum enim morbi solutae unitatis, uti sunt fracturae, vulnera, ulcera, caries &c. structuram partis solidae semper adficient, & plerumque quoddam humorum vitium secum trahant: Non modo superfluum foret, morbis solutae unitatis novam constituere classem, sed & vel ad alterutrum praedictorum singulatim, vel ad utrumque simul referri posse, manifestum est.

§. CCXV.

Idem de morbis intemperiei, quos pro qualitatibus primarum numero earundemque varia conjunctione ad numerum octonarium reducunt antiqui & quatuor sim-

plices totidemque compositas agnoscunt, sentiendum esse existimat; Cum enim nulla sit intemperies, sive simplex sive composita, nulla qualitas sive prima sive secunda, quae non, quod affectiones corporis sint, vel ad materiae vel ad structurae dispositionem reduci valeant: Iterum supervacuum foret, tot morborum intemperiei differenti-
as ex lacunis veterum repetere. Cui observationi rectis-
sime addit, nullam intemperiem plane nudam, omnique materia & subjecto orbatam in rerum natura reperiri; Quod necesse est, ut accidentia, quasque qualitates vocant, alicui semper substantiae inhaereant. Conatus equidem fuit *Auctor*, hasce veterum inanes speculationes quomodo-
cunque excusare: Provide tamen simul monuit, caven-
dum esse, ne *Galenum* defendendo, minorem ipsius verita-
tis rationem habeamus: Quia, experientia teste, nimiae Philosophorum argutiae in curandis adfectibus non raro plus nocere, quam prodesse solent.

§. CCXVI.

Cum insuper ad adfectuum *similarium* classem ab An-
tiquis referantur morbi *totius substantiae*, eoque nomine in-
situm spiritum, calorem illius, facultates ipsamque for-
mam complecti soleant, ut morbi totius substantiae ab il-
lis vocentur, qui illa, primum & per se evertunt: Hinc
Auctor noster, qui id omne, quodcunque in morbo totius
substantiae contingit, non a vulgaribus qualitatibus, sed
ab intestina minimarum particularum forma, propria nem-
pe magnitudine, figura & motu, dependere putat, opera-
tiones illas, quae toti substantiae adscribi vulgo solent,
nihil aliud praeter certa fermentationis genera esse existi-
mat, atque adeo sanguini tantum atque spiritui, non ve-
ro solidis insidere partibus concludit: Qui tamen conce-
ptus, si verum fateri fas fuerit, aequè obscurus est ac il-
le veterum, quem de morbis totius substantiae sibi for-
marunt.

§. CCXVII.

Divisioni morborum in *idiopathicos* & *sympathicos* illud
addere

addere consultum duxit, *idiopathiam*, quam vocant morbum *per essentiam*, non male in *protopathiam* & *deuteropathiam* distinguui posse. *Protopathiam* dicit proficisci, non ab alio morbo in corpore latente, sed quocunque primum loco genita fuerit, ibi suam quoque causam, agnoscere, neque ullum alium illum antecessisse: *Deuteropathiam* vero concedit oriri quidem in illa, quam obsidet, parte, sed ab alio morbo, ante corpus exercente, procreari. Caeterum pleraque, quae de *idiopathia* vulgo differuntur, errorem *Galenicorum*, quo morbi solis partibus solidis insidere creduntur, arguere, non dissimulat.

§. CCXVIII.

Denique circa morbos, quos vulgo *malignos* adpellant, illud animadvertendum esse jubet, non ideo vocandos esse *malignos*, quod alia, quam natura eorum postulare videbatur, adjuncta sint symptomata, cum revera iis causis, a quibus producitur malignitas, respondeat, quaeque non minus, quam alias causae manifestae ad naturam morbi spectent, & vix possibile sit, morbum malignum ulla alia quam naturae suae convenientia comitari symptomata: Sed quod ignota, neque obvia sint symptomata, differantque ab iis, a quibus nomen morbis impositum est.

§. CCXIX.

Post morborum differentias de earundem causis agere consueverunt *Pathologi*, cui consuetudini *Noster* quoque litat, idque inprimis laude dignum judicat, à medicis causarum tantum efficientes considerari, omittique tot alia causarum genera, quae magis cum subtilitate quam cum fructu tractantur a *Logicis*. Neq; id reprehendendum existimat, humanum corpus subjectam causarum materiam constitui. Cum enim causa & morbus saepe eadem res sint, manifestum esse putat, non aliam causarum, quam morborum subjectam materiam poni posse. Contra vero id minus laudabile in vulgari medicina esse existimat, quod

in solis humoribus morborum causas radicare contendat: Cum enim una eademque res saepe causae & morbi nomen mereatur, erunt quoque causae in partibus solidis, quibus fluidae continentur, necessario quaerendae. Reliqua, quae de distributione causarum, inprimis efficientis in *procreantem & conservantem*, in externam & internam, de singulari cujusque morbi causa nec non de morborum organicorum causis &c. adferuntur, ideo, quia nimiam prolixitatem parerent, omittimus.

§. CCXX.

Transitum potius facimus ad postremum, quod in *doctrina pathologica* tractandum suscepit *Auctor*, nempe enarrationem symptomatum, quae eo ordine instituitur, ut primum symptomata facultatis naturalis exponantur, uti sunt atrophia, quae depravatum corporis nutritum denotat, deinde vitia adpetitus, qualia sunt anorexia seu appetitus dejectus, dysforexia seu appetitus imminutus, bulimos, appetentia canina, pica & malacia, cruditas ventriculi pituitosa, acida & nidorosa, singultus, nausea & vomitus, cholera, ructus, passio coeliaca & lienteria, diarrhoea, dysenteria, tenesmus, alvi adstrictio, ileus &c. Pertinent quoque ad eandem facultatem ischuria, dysuria, diabetes, gonorrhoea, menstruum suppressio, vel nimius fluxus, & menstrua seu fluor albus. Sequuntur deinde symptomata facultatis vitalis, quae sunt deliquium animi & respirationis vitia. Vitalibus vitia sensuum tam exteriorum quam interiorum, his symptomata facultatis moventis, & his deniq; symptomata, in quibus vel omnes vel pleraeq; actiones laeduntur, succedunt, & agmen claudunt symptomata qualitatuum corporis mutatarum, eaque, quae excretionis & retentionis symptomata medicis adpellari consueverunt. Quanquam autem negandum non sit, multa in hisce omnibus contineri singularia *Auctoris*, ea tamen hac vice ideo excerpti non licet, quia, ne lectori nimia prolixitate taedium creemus, jure metuendum nobis est.

§. CCXXI.

Restat itaque *Liber tertius medicinae compendiariae*, quae partem ejus *semeioticam* complectitur, in qua primum de signo ejusque discrimine, deinde de signis corporis salubris & declinantis in morbum, porro de urinis & pulsibus agitur, tandemque de crisi-
bus brevis tractatio adnectitur: Quam tamen ultimam doctrinam an intime inspexerit *Noster*, non una est dubitandi ratio. Quanquam enim crisin in febribus saepe fieri, negare non audeat; Non aequè tamen putat necesse esse, omnem subitaneam febrium solutionem per crisin fieri: Quia febris res esset praeternaturalis, & vel justo vehementior, ut in acutis & statu paroxysmorum, vel justo imbecillior, quemadmodum saepe in principio paroxysmorum, sanguinis fermentatio est; Quod utrumque tamen falsum. Interea frequentiores esse posse crises concedit duabus de causis, primum cum naturae opus non impeditur à medicamentis, quae materiam crisi subtrahere possunt; Deinde, si aeger vitam ducit in calida regione, robustamque naturam, quae impetu quodam noxios humores expellere solet, adeptus sit. Caeterum nihil aliud per crisin intelligit, quam extraordinariam humorum fermentationem, non dissentientem ab ea, in qua febris ipsa consistat, nisi quod conjunctam haberet hoc tempore notabilem humorum segregationem & expulsionem, quam cita morbi conversio consequeretur. Quod licet recte utique agnoscat, immerito tamen negat, istam humorum se-& excretionem numero dierum septenario alligatam adstrictamque esse: Namque de diebus criticis eorundemque efficacia id notari jubet, non esse apud nos eandem dierum in acutis rationem, ac fuit in Graecia, quam antiquissimi medicinae cultores incoluerunt: Idem tamen apud nos locum habere non posse existimat, cum propter regionum diversitatem, tum propter vitae genus medendique rationem, ab antiquorum moribus & consuetudine omnino dissidentem.

tem. Verum horum omnium contrarium solertior in acutis observatio facile unumquemque docebit.

§. CCXXII.

Haec interim in synopsi sunt, quae in *medicina sua compendiaria* discussit *Targirius*. Et sicuti id ipsius laudibus detrahi neque potest neque debet, quod veterem medicinam solide excusserit ejusque naevos clare ob oculos posuerit: Ita negari quoque non debet, quod subinde recentiorum speculationibus plus justo tribuerit, cujus rei ex doctrina symptomatum permulta allegari exempla facile possent, nisi brevitatis ratio esset habenda.

§. CCXXIII.

Ordo interim ad alium *Institutionum medicarum* Reformatorem, *Paulum Ammannum*, Professore *Lipsiensem* nos sensim deducit, qui quippe pariter consilium de *Institutionum medicarum* emendatione necessario suscipienda perscripsit. Recte enim Praefatione ad Studiosos Medicinae sic ratio-cinatur: Quod, prout artis alicujus principia sese habent: Ita quoque ars ipsa sese habeat, h. e. si firma fuerint eadem, nunquam vacillabit; Contra, si minus firma, variis mutationibus atque vicissitudinibus erit ars etiam obnoxia. Hinc tot controversiae in theoria, tot varietates in praxi medica occurrunt, patientibus non raro nocivae.

§. CCXXIV.

Quod vero speciatim Institutiones medicinae attinet, illas duplici vitio laborare existimat Ammannus, *incertitudine* nempe & *prolixitate*: Incertitudinem ex eo patere dicit, quod antiquissimae opiniones, quae tamen parum vel nihil veritatis in se continerent, fundamenti loco tyronibus haecenus fuerint propositae: Eodemque modo rem certam esse de prolixitate, cum nonnullorum, v. g. *Sennerti* institutiones in vasta plane volumina excreverint, quanquam praeter omnem non modo necessitatem, sed & solidam

solidam, quae redundare inde posset, utilitatem. *Galenismi*, ut sic loquar, infensissimus fuit hostis; Quare etiam ad hunc eradicandum & damnosas auctoritatum venerationes abolendum, hoc consilium de *institutionum* emendatione suscepisse videtur.

§. CCXXV.

Servata autem librorum & capitum serie, quae ab *Institutionum* scriptoribus observari vulgo solet, *primo* statim in *libro* pleraque, de quibus alii, verbi causa de originibus, natura, definitione ac divisione artis nec ne de variis medicorum sectis prolixè differere consueverunt, praetermittit & tanquam inutilia rejicit; Cum haec omnia non discenda, sed legenda tantum sint. De facultatibus animae, earundemque origine atque differentia enunciat, medicinae cultorem ea omnia operose & philosophice scrutari imò ne scire quidem debere: Cum facultates per se non laedantur, sed per accidens & laeso tantum organo. Displicet insuper *Nostro* distinctio antiquorum in spiritum *insitum* & *influentem*, cujus farinae ipsi quoque videtur distinctio inter *calorem insitum* & *influentem*: Interea tamen non modo existentiam spirituum agnoscit, sed etiam differentiam quandam inter vitales & animales admittit, quae tamen, num *specificæ* sit, id quod communiter volunt, ignorare se ingenue confitetur. Doctrinam *Galenicorum* de temperamentis seu complexionibus partim cognitu difficilem, partim falsam, certe in medendo minus utilem vel necessariam esse credit; Cum dogma illud *Galen* re ipsa nihil aliud sit, quam tantummodo tradux, quo figmenta de qualitatibus & mixtionibus elementorum propagentur; Quod idem *Helmontium* quoque sensisse novimus, cujus ille dogma adoptare non dubitat. Mitto alia complura census *Physiologici*, quae censurae suae submittere non veretur *Ammannus*.

§. CCXXVI

Neque paucioribus laborare naevis *pathologiam*, inde concludit *Noster*, quod *nosologia* seu doctrina de morbis pleraque



raque sua fundamenta hauriat ex *physiologia*, cujus cum vix millesimam partem exacte perspectam habeamus; Colligi hinc facile licet, tanto minus pathologiam cognitam esse posse: Quale namque est fundamentum, tale quoque aedificium superstructum sit oportet; Nempe si *illud* est lubricum atque incertum, hoc quoque alterius indolis vix esse poterit. Itaque concludit: *Pathologiam veram nostram in arte adhuc desiderari*. Plerasque morborum definitiones non juxta propriam atque intrinsecam morbi ideam vel naturam formatas esse; Quod inde, vult, patere *Noster*, quia alias morbi, praecipue interni, certius feliciorque cum successu curari possent; In qua tamen artis parte, nempe therapeutica summum adhuc defectum observari quotidie liceret.

§. CCXXVII.

Ideo ipsam quoque *semeioticen* incertitudinis postulare non dubitat; Cum impossibile sit, *signum* esse posse certum, cum de *signato* adhuc dum disputetur: Proinde iterum concludit: Totam *semeioticam* meris conjecturis & falsis hypothesibus niti, quas si examinaveris, aequae incerta erit doctrina de signis ac ipsa pathologia. Plura hic excerpere ideo consultum non est, quia inferius in tractatione ipsa haec talia monendi occasio recurret.

§. CCXXVIII.

Inter *mechanismi* adsertores & propugnatores strenuos suum nomen tuetur *Fridericus Hoffmannus*, Comes Palatinus Caesareus, Regisque Borussiae Consiliarius intimus nec non in *Academia Fridericiana* P.P. celeberrimus, qui jam anno 1695. fundamenta medicinae aphoristica forma ex principiis, ut ipse loqui amat, naturae mechanicis in usum Philiatorum proposita edidit, de quibus ipsemet *Praefatione ad Lectorem* praedicare non dubitat, quod sola mechanica, Anatomiae & Chymiae nupta, ab humili ad altum hactenus duxerit rerum medicarum scientiam; Quod, qui hac notitia rite instructus sit, rerum abstrusarum causas eruere, dubia

dubias medicorum controversias ac sententias dissolvere, remediaque valentia in deploratis plane morbis quam felicissime invenire possit; Quod ipsa haec fundamenta (quo potius, quam plebejo *Institutionum* nomine uti maluit) ab omni prolixitate controversiarum & quaestiuncularum maleferiatarum mole, nauseosa sententiarum compilatione sint aliena, nihilque omisum sit, quod in medicina necessarium judicari queat.

§. CCXXIX.

Conscripta interim sunt more plerisque *Institutionum* conditoribus hucusque; solemni, etiamsi inscriptionem talem prae se non ferant. Orditur enim Illustris *Auctor* a parte *Physiologica*, in qua primum agit de natura medicinae, deinde de principiis rerum physico-mechanicis, porro de sanitate, vita, temperie & natura, de partibus solidis ac fluidis humanae machinae, principaliter de sanguine, lymphâ, chylo, lacte, bile, semine & spiritibus animalibus, de motu machinae illius vitali ac sensu, de usu viscerum, secretionem animali ac nutritione, nec non de conceptione, generatione & partibus illi inservientibus.

§. CCXXX.

Hinc ad *Pathologiam* progressus tractat de morbis eorumque causis, de febribus & morbis malignis, de morbis, vel ex vitio ac motu lymphae ac feri enatis, vel ex circulatione sanguinis inaequali & impedita, vel ex vitio ac motu spirituum animalium, vel denique ex vitiis primarum viarum ortis.

§. CCXXXI.

In *Semeiotica* exhibet signa morborum a sanguine, urina, pulsu & saliva petenda, subjunctis signis & differentiis morborum essentialibus; Quibus praemissis, agit de- mum de cognoscendis morbis ex vitio lymphae & spirituum animalium ortis & totam hanc tractationem concludit historia prognosæ atque criseæ medicae.

§. CCXXXII.

Semeioticam excipit *Hygieine*, quae primum generales deinde speciales regulas diaeteticas proponit, nec non de vario sex rerum non naturalium usu & abusu differit.

§. CCXXXIII.

Colophonem addit *therapeutice*, quae, expositis regulis medendi generalibus & medicamentorum elementis, illorumque operandi modo, speciatim tractationem evacuantium, sudoriferorum, diureticorum, salivantium &c. eorundemque usum & abusum prosequitur; Ultimo loco alterantibus, quaeque motum humorum vel accelerant vel nimium sistunt, servato, cum variis cautelis practicis eo spectantibus.

§. CCXXXIV.

Verum, quae reliquis mechanicorum principiorum adsertoribus pollicem premunt, eadem quoque difficultates *Nostrum* urgere videntur. Sunt enim adsertiones, quae principiorum instar reliquae tractationi substernuntur, sic satis paradoxae multisque vexatis dubiis expositae, uti sunt: Naturam totam, & sic ipsam quoque medicinam, *debere esse* (absoluta quasi necessitate) mechanicam: Unde DEUM ipsum maximum & Ter Optimum Mechanicum vocat, qui statice & mechanice res omnes produxerit: Hinc ipsam quoque medicinam definit, per artem utendi principiis physico-mechanicis. Corpus nostrum esse *instar machinae* seu *automatis*, quod ex variis organis ratione figurae & magnitudinis certo ordine ac situ dispositis & constructis gaudeat, quae tamen moveri & animari debeant a partibus fluidis corporis nostri; Vitam perfici causis mere mechanicis, nec mentem quicquam facere ad corporis ipsius vitam, nec vitam spectare ad mentem, sed ad corpus. Primum motus principium in machina corporis nostri, omnium Philosophorum consensu, esse animam; Perinde autem esse, si quis animam istam nominare velit naturam, sive, spiritum potentiis mechanicis instructum
sive

five materiam aetheream subtilissimam, ordinate tamen ac specificè agentem. Naturam istam seu animam hominis facile *characterisari* specifico motu, quem deinde jugiter custodiat, unde deinde consuetudo naturae nascatur. Eandem illam Naturam mensurae, numeri, temporis ac ordinis esse observantissimam, ac proinde omnia ordinate tam in productione, quam in conservatione corporis morborumque curatione facere &c. Atque haec erat idea, secundum quam universum artis medicae systema sibi & aliis tunc temporis praefigurabat.

§. CCXXXV.

At vero successu temporis non pauca hoc in systemate emendanda esse ipse putavit. Hinc anno 1707. novam ideam fundamentalem universae medicinae, ex mechanismo sanguinis methodo facili, attamen demonstrativa, ut putat, adornatam condidit eamque D. *Andreae Gundelsheimero*, Consiliario Aulico eoque tempore Archiatro Regiae Majestatis Borussicae, inscripsit atque dedicavit. Conqueritur in *Praefatione ad Lectorem*, & id quidem optimo jure, artem pulcerrimam sub ingenti illa opinionum varietate & dissensionum copia plurimos connexionum hiatus & principia inter se pugnancia aluisse; Se itaque, monitore & consultore *Gundelsheimero*, hanc in se provinciam suscepisse ac tentasse, qua ratione nobilissimam artem in scientiae formam redigeret, & principium aliquod clarum, perspicuum, maxime vero unum & inconcussum statuminaret, ad quod omnes causae earumque classes facilissima connexionione restringi, & ex hoc unico fonte omnia, quae tam in sano quam aegroto hominis statu, morborumque curatione & medicamentorum virtute explicanda occurrunt, clarissime deduci possent, additque, se FORSAN PRIMUM (absit tamen invidia) hoc iter ingressum esse, ut artem in demonstrando certam, in curando vero fidam redderet. Et ne quis forte sibi temere persuaderet, tyronibus tantum hanc ideam scriptam esse, huic statim praeju-

praejudicio occurrit, & veteranis quoque & magistris artis nostrae eandem non parum profuturam haud vane pollicetur eoque nomine commendat. Ingenue tamen fatetur, fundamenta medicinae, de quibus his proximis §. egeram, & male typis exscripta & tam adcurata connexion, sicuti de hac idea, lectori persuadere conatur, concinnata non esse. Unicum autem fundamentum, quo in universa *Pathologia* nullum detur praestantius, cui tota medicina sit superstruenda, judicat esse motum vitalem, nempe circulationem sanguinis, qualis in corporibus organicis viget. Hunc sanguinis circulum egregie vitam tueri, excernendo corporis ambitu ea, quae corruptionem minari eidem queant. Ex eodem quoque fonte modum agendi remediorum profluere & fundamentum curationis omnium morborum imo egregiam quoque praeservationis methodum promanare, certissime sibi persuasum habet.

§. CCXXXVI.

Istud vero principium, quod in circulatione sanguinis reponit, physico-mechanicum esse, ex materia & motu petendum, ita demonstrare contendit: Motum nempe sanguinis circularem dependere a motu systoles atque diastoles fibrarum musculosarum & motricium, puta cordis, arteriarum aliarumque partium, nec non fluidorum temperie debitaque quantitate. Motum vero & impulsus solidorum non ens immateriale sed materiale subtilissimum proxime praestare, atque id nihil aliud esse, quam fluidum istud catholicum, aethereo-aëreo-elasticum, activissimum, quod veteres animam mundi sensitivam, animam ore haustam & spiritum, corporis nostri dominum vocarunt. Itaque ens illud immateriale seu animam rationalem ad motum hunc vitalem nihil conferre, sed sine ejusdem concursu solo corporeo motu & impulsu eundem absolvi, disertis verbis enunciat. Si autem quaeratur, quomodo, si pure corporei & mechanici sint hi motus, nihilominus tam ordinate, concinno nempe ordine, certa proportionem, cer-

certoque tempore, quae quippe circumstantiae omnes immateriales & ab altiori provenire principio videantur, succedat? Respondetur: Id artificiosae structurae, dispositioni ac proportioni partium solidarum ac fluidarum ad motum, unice tribuendum esse; Qua per causas externas & mechanicas mutata, motiones istae inordinatae reddantur, diaeta tamen ac medicamentis in ordinem redigendae.

§. CCXXXVII.

Interim ex hoc jam fundamento rationem vitae, sanitatis atque morborum deducere adlaborat; Et vita quidem in animantium corporibus nihil aliud ipsi denotat, quam perennem fluidorum per tubulos beneficio solidorum impulsus atque progressionem, qua corpus per se corruptibile a corruptione praeservetur, non excluso tamen etiam motu intestino *spirituascendit*; Ubi id tantum moneo, non motum sanguinis circularem vitae formalem rationem constituere, nec a corruptione corpus praeservare, sed esse tantum instrumentum vitae & vindicationem corporis a putredine procedere potius a jugi & continuo successu secretionum, sub isto sanguinis circuitu procedentium; Quibus demum una cum excretionibus fatiscentibus corruptio & mors ingruit. Sanitatem vero constituit in quodam quasi aequilibrio motus solidorum ac fluidorum; Quo praesente & anima recte ratiocinetur & sensuum adsit vigor & vitalium motuum robur & secretiones cum necessariis excretionibus per emunctoria rite se habeant, & somnus, & appetitus & digestio & nutritio recte procedant. At vero si hoc modo sanitatis notio accipiat, metuendum jure, ut ullus mortalium perfecte sanus dici mereatur: Quia impossibile est, ubique praecavere, ne a dicto isto aequilibrio plus minus recedatur. Statum denique morbosum reponit in circulo sanguinis immoderato vel impedito vel inaequali, idque propter laesum aequilibrium solidorum, pulsus atque toni, nec non fluidorum intemperiem & proportionem indecentem. Cum autem circulus iste sanguinis

S

& pos-

& possit & soleat utique variis modis mutari, nec tamen status corporis morbosus in sensu rigoroso & exquisito statim & inevitabiliter subsequatur: Hinc ista quoque qualicunque adumbratione statum morbosum non exhauriri, cuivis comprehendere facillimum est.

§. CCXXXVIII.

Ex hisce autem jam infert atque concludit: Omnes morbos ad hasce quatuor classes rectissime referri posse: Nempe vel ad intensiorem toni seu *spasmus*, vel ad *atoniam* seu ejusdem toni debilitatem vel totalem amissionem vel ad *febres* vel ad *convulsiones*. Atque hoc ordine & serie omnes jam morbos describit, ut primum de *spasmis* & *atonia*, deinde de *febris* & *convulsionibus* agat, ac postremo causas morbificas immateriales & virulentas, nec non plethoram atque cacochymiam, prout variorum morborum causae evadere possunt, exponat. Hinc progreditur ad causas morborum naturales, aëremque, alimenta, clima, diversumque vitae genus &c. tanquam causas morborum remotas considerat, quibus etiam morbos, aliorum morborum causas, uti & illos, qui ex imprudenti medicatione suborti sunt, una cum symptomatum generatione subjungit. Universa vero tractatio obsignatur descriptione medicamentorum varii generis variisque ex fontibus petitorum, cum adnexa methodo medendi & fundamentis omnis rationalis therapiae, quod in eodem illo motu seu circulo sanguinis & fluentibus inde se- & excretionibus reponit, quo quippe non modo corpus, corruptioni totum ex se obnoxium, ab eadem vindicatur vitaeque incolumis conservatur, sed & causae, vitae inimicae, propulsantur & adfectus morbofi averruncantur. Ad quod praestandum Natura tanquam instrumento utatur spasma, qui est motus in systemate fibroso auctus, quo humores stagnantes resolvantur, obstructa referentur & supervacua vitalique circulo contraria per congrua emunctoria expellantur.

§. CCXXXIX.

Eodem jure istam sibi laudem vindicare potest *Archibaldus*

balduſ Pittcarnius, quondam medicinae Profeſſor in *Academia Lugduno-Batava*, quod *methodo plane demonſtrativa*, id quod ante Ipſum NEMO auſus fuerat, *Inſtitutiones medicas* tradiderit. Ejus elementa phyſico-mathematica, in gratiam ſtudioſorum medicinae delineata, duobus libris comprehenduntur, quorum *prior* theoriam, *poſterior* vero praxin exhibet. Aequitas juſque fateri jubent, tanta cum *anpi-Beia*, ut plane demonſtrationum mathematicarum vim aemularetur, hanc artis medicae partem elementarem nunquam adhuc publicam adſpexiſſe lucem. Procedit enim per poſtulata, definitiones, propoſitiones & problemata, prorſus ſicuti Geometris in more poſitum eſſe ſolet. Ita enim decebat virum celeberrimum, medicinam ab omni philoſophorum ſecta liberam colere, atque prima ejusdem elementa Geometriae auxilio abſque omni conjectura philoſophica, abſque omni tandem partium favore aut praedjudicio nude ſimpliciterque tradere, ſicuti ipſimet horum elementorum editores in limine Praefationis loqui amant.

§. CCXL.

Ordo in illis adhibitus, quoad *theoriam*, reſpondet ordini *Inſtitutionum Sennertianarum*, ubi tamen breviter ſimul adnotatur, quid ille quidve alii *Inſtitutionum medicarum* ſcriptores peccaverint. In *praxi* vero ſequitur methodum a *Riverio* adprobatam; Ita tamen, ut ab omni errore plane liberum fuiſſe *Pittcarnium* nullibi pronunciare auſi fuerint, qui *elementa Pittcarniana* ediderunt, cum ille ipſe in re medica nec fallere nec falli ſtudu-erit, & artem ſuam non niſi per demonſtrationes & obſervationes perficiendam eſſe, voluerit, libertatem interim ſentiendi & ſeveram veri in-quiſitionem ubique amplexus. Proteſtantur interea ſolemniffime, ne quis *Noſtrum* vel tanquam novatorem vel plane haereticum rejiciendum exiſtimet, quia alias & *Democritus* & *Hippocrates* & *Serapion* & *Apollonius* & alii principes viri tanquam novatores eſſent condemnandi. Illud autem, quod in commendando hoc *Auctore* mirifice mihi placuit, id praecipue fuit, quod, cum inter medicos ipſos

non satis conveniat, dum latentes rerum causas scientia non comprehendunt, sed conjectura prosequuntur, quod, inquam, harum conjecturalium quaestionum investigationem supervacuam esse contenderit, quoniam incerta & incomprehensibilis ipsa plerumque natura sit, & nihil vel parum conjecturalem hanc disciplinam ad artem medicam facere professus, in usu & experimentis, per veras motus regulas demonstratis, eam posuerit.

§. CCXLI.

Prius vero, quam rem ipsam curatius perstringamus, ex ipso *Auctoris* praeloquio, quod est ipsa *inauguralis Oratio*, quam anno 1692. *Lugduni Batavorum* habuit, cum medicinam docendi munus ibidem adgrederetur, quaedam excerpere placet, quae jam dudum animadversione quadam digna nobis visa fuere. Observat itaque primum *Pittcarnius*, medendi peritiam studio philosophico fuisse paulo antiquiorem, cum medendi perpetuae, philosophandi autem fortuitae tantum causae fuerint. Et cum priscis temporibus Philosophi omnes unius tantum sectae fuerint, & medicina ante omnem Philosophiam nata, sequitur, nascentem medicinam nulli Philosophorum sectae alligatam fuisse. Cumque in medicina vel tradenda vel facienda non liceat id tanquam principium adsumere, de quo viri & mathematici docti & minimis praejudiciis irretiti disputant; Hinc iterum consequitur: Causarum physicarum investigationem, qualem Philosophi instituere solent, medicis neque utilem neque necessariam esse. Nec decere medicos, ulli philosophorum sectae sese adjungere, cum illud potissimum sit, quod artem medicam tot seculis incultam reddidit & impedivit, quo minus ad optatum perfectionis fastigium, quo hominibus & per homines licet, eniti & vita mortalium in tuto collocari queat. Neque oportere artem illam, quae mortalibus sanitatem pollicetur, disputantium conjecturis & somniis involvi: Quia prudentis non est, illi vitam suam concedere, cujus rationes

nes plerisque falsae, paucissimis probabiles videntur; Sed oportere potius medicos Astronomorum institutum sibi imitandum proponere, si de genere humano bene mereri cupiant; Observationes nempe, quae institutae sunt & ubique instituuntur, circa morbos morborumque auxilia conferre, & nulla habita ratione opinionum, quae sensu perceptis certitudine cedunt, ex eo, quod fieri solet, quod futurum sit ac faciendum, colligere. Porro vero in medicina tractanda nihil principii loco admittendum, quod non sit aequae certum, ac ea, quae in sensus incurrunt; Quia aequum non est, ut vitae humanae, quam curiositati, minus consulatur. Pertinet huc metus vacui, qualitates occultae, vis attractiva aliaque talia, quae majores nostri a secta mutuati in medicinam transtulerunt; Quanquam diffitendum quoque non sit, recentioribus, qui a detecto sanguinis circuitu nihil non sperare & poterant & debebant, nimium sectae amorem obstaculo fuisse, quo minus debita ex invento illo felicitate potirentur, imo, qui delicta majorum aliis vitanda tam solerter monstrare poterant, ipsimet monstrata vitare non potuerunt. Esto, feliciter ipsos proscriptisse qualitates occultas, pedibus conculcasse eosdem inanes vacui metus formarumque substantialium strepitus; Annon vero aequae abominanda idola in artem introduxerunt, qui occulta fermenta porosque dicto audientes intulerunt? Quo quaeso discrimine figurae particularum ignotae differunt a qualitatibus occultis veterum? Materiae subtilissimae, quam *Cartesius* primi elementi nomine insignivit, quid distat astrorum influxus? Utrum inhonestius, vasis liquores quosdam attrahendi vim concedere, an nobis ipsis potestatem facere, fluida vasorum orificiis apta, in scenam protrahendi? Quis, sympathia & antipathia veterum rejectis, homines de pugna & amicitia duplicis aetheris, intra canales corporum occurrentis, differere paratos ferat? Quis calido innato & adventitio aetherem consuetum & peregrinum paria facere, mutatisque solum verbis eandem narrari fabulam, non animadvertat?

Ex quibus tandem omnibus colligitur, diversitatem figurarum fermentorumque a medicis sectae inservientibus, invec̄tam, nullam in medicina sive facienda sive docenda adferre utilitatem. Ut nihil aliud superesse videatur, nisi ut medicinam, non hisce figmentis impositam, sed usu probatam excolamus, neque nos incauto sectae studio tantillum dimoveri a veritate, medicamve dignitatem vulgi arbitrio subjici patiamur, notamque incertitudinis, ex amore sectae nimio manantem, ab arte nostra amoliamur.

§. CCXLII.

Ecquis autem jam nostrum est, cui haec *Pittcarniana* non mirifice placeant? Quis non ex praemissis hisce expectabit fundamenta solida & inconcussa, cui sine ruinae metu ars nostra superstrui queat? Et quis denique certam & infallibilem morborum curationem inde sibi non pollicebitur? Ast eheu! Quam fallaces, quam deceptrices sunt spes humanae? Qui enim definitionibus & axiomatibus *Pittcarnii* parem cum *Euclideanis* certitudinem inesse credit, is fallit & fallitur. Transeant utcunque *Pittcarnii* nostri postulata; Non eandem sane fortunam habebunt ejusdem definitiones. Sic, ut paucis tantum exemplis res illustretur, vita a *Pittcarnio* definitur: Quod sit circulatio sanguinis a corde pulsī per arterias & per venas reducti: Ubi meminisse eundem oportebat, aliam esse *instrumentalem*, aliam vero *formalem* vitae rationem. *Priori* modo si intelligendam esse cupiat definitionem vitae, concedo; *posteriori* vero, nego. Corpus animatum definitur, quod sit compositum ex canalibus diversi generis, liquores diversi generis vehentibus; Quae definitio ita comparata est, ut etiam machinae hydraulicae, quae tamen a nemine, quod sciam, inter corpora animata unquam relata fuit, adplicari possit: Deficit enim principium corporis animati, quod est anima, non certe compages diversorum canalium, diversos liquores ferentium. Facultas porro animalis definitur: Quod sit vis illa, quae e sanguine intra cerebrum circu-

circulante exercetur, per secretionem liquoris cujusdam in nervos derivabilis, quem deinde describit, esse liquorem illum a cerebro in nervos derivatum. Sed quis unquam facultatem animalem hoc modo descriptam vel legit vel audivit? Nisi forte, qui studio sectae, a quo tamen alienissimum cupit medicum, fuerit addictus? Unanimis potius consensus est, facultatem animalem consistere in exercitio sensuum atque motuum? Taceo, non entis nullas praedicari posse affectiones. Quis, dari spiritus animales, idoneis argumentis unquam demonstravit aut demonstrandum adhuc in se suscipiet? Provocamus omnes, qui fabula ista universo orbi medico tot seculis hucusque illuserunt, ut unicam saltem stringentem rationem pro horum spirituum abusive sic dictorum, existentia adferant. Reliqua brevitatis gratia non attingo.

§. CCXLIII.

Quoad propositiones, constat similiter, non omnes ita comparatas esse, ut sine censura dimitti queant. Ita temperamenta dicuntur morbi nativi; Unde sequeretur, quod, cum nemo sine temperamento nascatur, neminem quoque sine morbo nativo in hunc mundum prodire, contingat, id quod experientiae & summae illi aegrotandi infrequentiae contrarium est. Temperamenta ipsa describuntur, quod non sint, nisi diversa cacochymiae genera; Ubi manifestum est, temperamentum confundi cum intemperie. Quis diceret, hominem v. g. sanguineo-plethoricum laborare aliqua cacochymiae specie? Etsi interea non negetur, hoc temperamentum nonnunquam, non tamen semper, vitium in qualitate pedisequum habere posse. Ejusdem indolis est propositio: Tria tantum generalia temperamenta dari. Si enim phlegmatici a cholericis & hi a melancholicis universo corporis habitu & actibus tum vitalibus tum animalibus & rationalibus differunt: A reliquis omnibus discrepabunt etiam sanguinei, quorum quippe habitus corporis & omnes in universum actus omnino

mnino sunt diverſi. Cetera, quae ſane plurima ſunt, attingere, brevitās propoſita haud permittit.

§. CCXLIV.

Unicum reſtat problema, ſed quod omnium medicorum attentionem merito ad ſe vocet, nempe hoc: *Dato quovis morbo, remedium ipſi proportionatum invenire. Sive: In omni morbo ex indicante indicatum invenire, & inventum adhibere.* Hic Rhodus, hic ſalta. Id ſane, ſi methodo *Pittcarniana* praefari liceret, omni auro cedroque longiſſimis paraſangis praeferenda foret. Sed ſubjungitur ſtatim, deſideratum, ſcilicet, medicamentum, quod ſtatim tollat rareſcentiam (orgaſmum) & motum imminuat, nullo fere ſymptomate ſubſequentē, NON DARI; Quod vi eorum, quae Libro II. Cap. I. §. 35. docentur, addo.

§. CCXLV.

At vero veniamus nunc ad examen eorum, quae primis XI. Capitibus Libri I. partis theoreticae elementorum medicinae *Pittcarnianorum* docentur. Primo igitur ſtatim capite agitur de elementis, longe tamen alio modo, quam ab *Inſtitutionum* ſcriptoribus hucusque fieri conſuevit. Quae proinde res jam aliquoties nos commovit, libere enunciandi, doctrinam hanc in medicina fatuam, otioſam & ſuperfluam eſſe. Hic ſane nihil praefatur aliud, quam ut demonſtretur: *Nullam dari materiam aetheream ſeu ſubtilem.* Ut hinc tanto melius coargui queat *Waldſchmidius* cum ſuis aſſertis, qui ſane huic materiae ſubtili non parum efficaciae in multis effectibus excitandis tribuiſſe videtur. In ſanitatis noſtione, quam capite ſecundo tradere laborat, aeq; perplexos adfert conceptus, ac in ipſa definitione vitae. Nihilominus ex hiſce praemiſſis reprehendit reliquos *Inſtitutionum* ſcriptores, praecipue *Sennertum*, quod male medicinam definiverint; Quod ſanitatē explicare conati ſint, non explicata prius natura vitae; Quod male itidem partes corporis diſtinxerint in *ſimilares* & *diſſimilares*, quae quippe

quippe partitio plane fit inutilis, cum quaelibet pars actionem edat perfectam, & fibra eodem modo sese contrahat, ac musculus. Pessime quoque quosdam medicinae Proceres fecisse arguit, quod partes corporis in *continentes, contentas & impetum facientes* distinxerint, quas quippe postremas inter contentas, mea autem sententia longe rectius inter non entia referre debuissent. Denique redarguit quoque vulgarem medicinae divisionem in physiologiam, pathologiam, &c. Sed iterum citra fonticam rationem; Distincta enim est cognitio corporis humani sani a notitia corporis morborum: Unde qui distinctis in partibus distinctum corporis humani statum considerat, nullius peccati reum sese facit.

§. CCXLVI.

De temperamentis *capite tertio* acturus, duos maxime palpabiles committit errores, alterum, quod temperamentum nihil aliud esse credat, quam veram intemperiem seu morbum nascentem; Alterum vero, quod, expuncto temperamento sanguineo, tria tantum agnoscat, biliosum nempe, melancholicum & pituitosum seu phlegmaticum, cum sanguineum, secundum *Auctoris* nostris sententiam, nihil sit aliud, quam plethora seu omnium liquorum, sanguinem constituentium copia vulgari insignior: Cujus tamen sententiae falsitas inde statim perspicitur, quod non omne temperamentum sanguineum semper cum plethora sit conjunctum, nec reliqua temperamenta plethorae semper expertia sint, sicuti in variis eorundem mixturis quotidie observari licet. Recte interim negavit temperamenta partium solidarum, in quibus vulgo quidem operosi, sed tanto certius vani & praeter necessitatem negotiosi sunt *Institutionum* scriptores. *Capite quinto* multum sibi negotii facessit *Auctor*, ut obscuris veterum terminis, calido innato & humido radicali clariorem lucem & explicationem adfundat, & quid per illas voces designare antiqui debuerint, non quid actu designaverint, in apri-

T

cum

cum producat. Atque adeo per calidum innatum designari debuisse, existimat, illam attritionem partium sanguinis, quae ab ipsius motu circulari, praesertim in arteriis, producit. Cum vero humidum radicale sit sanguinis, erit calidum innatum in humido radicali fundatum nihil aliud, quam sanguis circulans seu ipsa vita animalis. Ast mallet ego obscuros istos veterum terminos penitus e Physiologia explosos, ut ab omni ambiguitate ars simul ac semel liberaretur. Ita enim variis obscurarum vocum explicationibus & interpolationibus sese frustra fatigandi, adempta esset occasio, & *Pittcarnius* labore isto superfedere quoque potuisset, *Waldschmidium* carpendi, qui per calidum innatum intellexit reliquias sanguinis in corde rarefacti, vel recentiorum quorundam, inprimis *Willisi* sententiam perstringendi, qui calorem innatum fermentationis sanguinis a materia subtili inductae & ab actione ipsius perpetua conservatae, effectum esse voluerunt: Cum nulla talis fermentatio, sensu *Willisi* eorumque, qui fermentationem cum motu intestino confundunt, in sanguine detur.

§. CCXLVII.

Capite quinto sistitur brevis, sed elegans oeconomiae animalis delineatio, facto initio a ciborum comminutione mediantibus dentibus in ore peracta, quam sequitur eorundem per oesophagum in ventriculum detrusio, in quo ope perpetui motus a musculosa stomachi tunica peracti & diaphragmatis beneficio partes ciborum ita conquassentur & atterantur, ut in chylum tandem convertantur, qui deinde contractione ventriculi alterna & musculorum adfitorum ope ad intestina expellatur, saliva sive quocunque alio sero ex glandulis ventriculi exsudante & ad concoctionem ciborum nihil aliud conferente, quam ut mollescant & sic facilius comminui queant. Ex chylo deinde elaboratur sanguis, quem haematoseos modum tanto clarius explicaturus *Noster*, varia circa sanguinem experimenta

rimenta instituit, ut certior inde reddatur, quaenam eadem coagulando aut liquefaciendo aut in naturali fluxilitate conservando comparata sint? Quibus ita praemissis concludit, sanguificationem nihil esse aliud, quam comminutionem chyli per motum cordis & arteriarum, per quem fit, ut partes chyli purae & aeque lubricae ac partes sanguinis evadant, & in liquidum (ad sensum) homogeneous intra canales faceant. Unde sponte consequitur, ad sanguificationem nullo in corde aliisque partibus fermento opus esse. Pergit interea ad actum nutritionis, quem pro partium diversitate modo sanguine, modo sero, modo gypsea quadam materia peragi contendit. Nutritionem sequitur negotium respirationis & secretionis variorum liquorum variis in partibus atque visceribus.

§. CCXLVIII.

Atque haec, quae hactenus recensita sunt, *Physiologiam Pittcarnianam* concernunt. *Pathologia* ejusdem est tanto brevior; Siquidem unico tantum capite natura morbi in genere cum divisione eorum generali ita proponitur, ut natura morbi consistere dicatur in circulatione sanguinis insolita, hoc est, aucta vel imminuta, idque aut per totum corpus aut per aliquam saltem ejus partem. Vereor autem, ne haec morbi definitio suo definito longe strictior sit: Quia multi dantur morbi, qui cum circulatione sanguinis, sive aucta sive imminuta nihil alunt commercii. Circa morborum divisionem in organicos, similium partium & solutae unitatis, reprehendit inutiles labores *Sennerti*, *Zypei* & *Waldschmidii*, quibus posterioribus adhuc imputare non veretur, quod *Sennerti* scrinia compila-verint. At vero cum hae morborum distinctiones jam dudum ante *Sennerti* aetatem fuerint in usu, exiguum sane operae pretium fecisse putandi forent praedicti *Auctores*, si nihil aliud ex *Sennerto*, quam putidas istas distinctiones mutuati essent. Majoris usus esse existimat divisionem morborum in *simplices* & *compositos*, ubi per morbum simpli-

eem id intelligendum esse putat, quod ab *Institutionum* scriptoribus symptoma adpellatur, per morbum vero compositum complexionem symptomatum indigitat: Qua quippe ratione ex *Institutionibus* magna removeretur confusio, quae a plerisque circa descriptionem morbi & symptomatis committeretur. Unde simul inutilia judicat signa morborum a signis symptomatum distincta, inutiles enumerationes morborum causarum, distinctarum a causis symptomatum, inutilem denique indicationem, quae ab urgente symptomate desumeretur, quasi nempe distincta foret a caeteris indicationibus. Laudat interim *Wedelium*, quod ille divisionem omnium morborum, i. e. eorum genera per tabulas optime exhibuerit, licet in febribus erraverit.

§. CCXLIX.

In causis morborum determinandis iterum alienus est: tam a placitis veterum quam recentiorum, ut sententia ejus haec sit, omnes morborum causas longe rectius dividi posse in actiones corporum aliorum nostrum in corpus, aut actiones corporis nostri in seipsum, quas tamen omnes tum demum morbificas fieri credit, si vel augeant vel impendant sanguinis circulationem: Quanquam in meras tandem tricas id omne resolvatur, quicquid de energia morbifica quarundam rerum externarum non naturalium vulgo dictarum differitur. De causis morborum internis, quorsum inprimis a scriptoribus *Institutionum* plethora & cacochymia refertur, sibi persuadet *Auctor*, quod sint morbi ipsi ac proinde ab illis non distincti. Ita v. g. de plethora *ad vasa*, a qua illam *ad vires* vix distingvit, enunciat, quod sit morbus ipse; Id quod tamen aliter sese habere, innumeri plethorici suis exemplis confirmare poterunt, qui plethoram suam, nisi commota vel in orgasmum alicunde concitata fuerit, sat commode ferunt. De temperamentis vero jam superius animadvertimus, quod perversum istum sibi conceptum formaverit, nihil esse illa aliud, quam diversa cacochymiae primo nascentis genera,

nera, imo potius morbos quosdam nativos, id quod tamen jam antea confutatum est.

§. CCL.

In tradenda *signorum doctrina* ideo prolixus esse noluit *Auctor*, quod ea, quae de hisce rebus communiter docentur, ab omnibus eodem fere modo descripta leguntur. Nihil-
ofecius tamen ut aliquid fecisse videatur, signa tempera-
mentorum, quaeque ab urina ac pulsu petuntur, breviter
exposuit. Capite interim, quod sequitur, septimo crises
cum diebus criticis descripturus, Lectores ad *Sennertum*, *Zy-
peum*, *Waldschmidium* aliosque *Institutionum* scriptores mavult
ablegare, ut ex illis sententia veterum de crisis earun-
demque causis intelligatur. Ipse interim suam, quam et-
iam veram simul declarat, opinionem paucis sic exponit:
Cum coctio materiae morbificae & humoris excernendi,
secundum *Auctoris* nostri mentem, nihil sit aliud, quam ejus-
dem commutatio in magnitudinem vel parvitatem debi-
tam, ut possit vi circulantis sanguinis abripi per canales &
excerni per vasa, alicui excretioni dicata; Hae autem ex-
cretiones sint crises ipsae; Inde consequitur, crises fieri
posse per quascunque glandulas subcutaneas, intestinales,
renales, salivales. At si non possit materia morbifica in e-
am magnitudinem aut parvitatem mutari, quae orificiis
illius vasis excretorii respondeat, tum aut abscessum, aut
haemorrhagiam, quae tamen utraque crisis minus proprie
censenda sit, oboriri: Attamen, si quantitas materiae sit
notabilis, opus quoque esse notabili tempore, ut materia
morbifica ad debitam magnitudinem aut parvitatem mo-
tumque optatum deducatur. Cumque multae eaeque
constantes sint causae, quae efficiunt, ut sanguis & hu-
mores ejus peccantes in regionibus *Graeciae* ac *Syriae* di-
versae sint fluiditatis, partibusque constent alterius co-
haesionis & molis, quam sanguis *Germanorum* ac *Britanno-
rum*: Hinc fieri non posse putat, quin diversa temporis
spatia requirantur ad coctionem in illis & his partibus effi-
ciendam,

ciendam, nec utrisque eadem tempora plerumque sufficiant. Unde concludit: Non nisi perraro & quasi per miraculum fieri posse, ut iidem apud nos dies critici sint, qui *Hippocrati* & *Galeno* fuerunt. Atque hinc ulterius infert: Quod, si crisin solum vocare debeamus eam excretionem, quae tertio vel septimo die aut tempore ex diebus ternis septenariisque composito contingat, tum in Britannia nullam unquam crisin eventuram, existimandum sit. Imo, si qui medici in *Scotia* crises sensu *Hippocratico* observasse videri voluerint, eos aut in *Gallia* aut in *Italia* institutos, ibique praejudiciis veterum inbutos esse, certum ratumque haberi debeat. Sed de hisce omnibus, si ad verae solidaeque experientiae trutinam examinentur, admodum vereor, ne nuditatem suam statim prodant.

§. CCLI.

Duobus proxime sequentibus capitibus, *octavo* nempe ac *nono* castigantur errores *Sennerti*, *Zypei* & *Waldschmidii*, quos circa medendi methodum commisisse dicuntur, & quorum proinde peccata ita redarguit *Pittcarnius*: Male scilicet quatuor indicationes adnumerari quatuor indicantibus, causae nempe morbi *praeservatoriam*, morbo ipsi *curatoriam*, virium conservationi *vitalem* & symptomati urgenti *innominatam*: Cum & causae internae morbo adeo sint conjunctae, ut, illis sublatis, hic necessario tollatur, & nulla quoque indicatio a viribus medico suppeditetur & symptoma urgens nullam quoque indicationem a morbo distinctam subministret. Unde id tandem conficit: Unum tantum indicans esse, nempe morbum, & unam tantum indicationem, nempe *curatoriam*. Q. E. D.

§. CCLII.

Similiter falsitatis *Auctor* redarguit ea, quae ab *Institutionum* scriptoribus de multiplici differentia indicatorum, scil. causam morbi tollentium, vitam conservantium, symptomata mitigantium & morbum ipsum remonentium disferuntur. Ex ipsa enim medendi methodo demonstrare conten-

contendit, vitam fervari, tollendo morbos & symptomata; Atque adeo nullum esse indicatum vitale: Symptomata esse morbos ipsos, & symptomata urgentia esse morbos urgentes, i. e. cito interimentes, adeoque iis respondere indicatum curatorium: Causas vero morborum universales, nempe plethoram & cacochymiam esse pariter morbos; Atque sic omnem istam differentiam indicatorum esse supervacuam concludit. Quibus omnibus brevissimum subiungitur caput de secretionibus, quatenus illae per medicamenta, cuilibet illarum dicata, sunt promovendae, una cum brevissima methodo, medicamenta ista, ex *Wil- liso* & *Königio* petenda, in *formulas* congerendi, quarum aliquot *capite ultimo* partis theoreticae recensentur.

§. CCLIII.

Quibus ita ordine enarratis, nunc ad alteram elementorum *Pittcarnianorum* partem, nempe practicam transitum facimus, ubi *primo* statim *capite* de febribus agitur, & hac voce velocitas circulationis uniformiter, i. e. per aequalia temporis intervalla aequaliter aucta intelligitur, quae rarefactionem sanguinis sive tanquam causam sive tanquam effectum semper comitem habeat. Ex quo deinde fundamento omnia febricitantium seu legitima febriconfictantium phaenomena deducuntur, uti sunt pulsus frequentior, & propter motum uniformiter auctum, aequalis, calor solito major, dolor in capite, dorso ac lumbis, vigiliae insolitae, respirandi difficultas, siccitas linguae ac sitis, aversio alimentorum vel appetitus cessatio, urina parciore quidem, attamen saturatior &c. in quibus omnibus *causaliter* explicandis mira fictionum & gratuitarum suppositionum efficacia conspicitur. Quare vero febris legitima, h. e. nulli alii morbo complicata, absque sensu frigoris seu rigore invadere dicatur, nisi forte frigus externum febrim excitet, ejus rei, praeterquam quod historiae morbi repugnet, nullam aliam comprehendo rationem, quam quod cum supposita sanguinis rarefactione, omni febris

febri, ipso *Auctore* fatente, conjuncta conciliari non poterit. Interim mira ille fabulatur de aucta sanguinis mole & aucta inde spirituum animalium secretionem, unde validiores cordis contractiones exsurgant, atque singulis contractionibus longius expellatur sanguis; Atque adeo citius etiam ad quamvis arteriae sectionem sive intra sive extra cerebrum perveniat, unde citius diffuere cogentur spiritus in cor, & sic major erit sanguinis celeritas & per consequens rigoris seu frigoris absentia. Unde concludit, *nullam dari febrim algidam*, aut, si detur, eam debere etiam constare *motu sanguinis aucto*; Alioquin nullum haberet, unde cognosci posset, febris indicium.

§. CCLIV.

Quod theoriam intermittentium specialem (loquitur autem de intermittente regulari) attinet, in illis praeter symptomota motus aucti & rarefactionis, quae in paroxysmo intermittentium augmenti partem & statum componant, notabile est circa accessionem pondus corporis, quod videtur auctum, & inertia, deinde frigus incipiens ab extremitatibus & pulsus parvus, postea calor a cordis vicinia incipiens & postremo accedens ad artus, tum pulsus major ac denique sudor paroxysmum solvens. Istam vero inertiam & gravitatem corporis derivat vel a paucitate spirituum animalium, vel ab obstructione partis, intra quam spiritus & sanguis admitti non possunt: Paucitatem vero spirituum vel a defectu sanguinis vel ab ejusdem crassitie deducit, quorum unum aeque verosimile est ac alterum; Unde gratuitam & multis modis coactam adsertionem *Auctor* ipse prodit, quando subjungit: *Nunc enim non supponimus sanguinem in cerebro nimis rarum & ea ratione prementem, uti cum loquimur de insultu frigoris.* Unde manifestum est, *Auctorem supponere*, i. e. fingere sanguinem, modo rarum, modo densum, prout hoc vel illud phaenomenon, obtorto licet collo, explicare necessitas expostulat. Caeterum curationem febris legitimae nulliq; alii morbo cohae-

cohaerentis facillimam pollicetur, quanquam Practici artis experti difficulter id crediderint, sola nempe VSione & remediis, rareficientiam sanguinis contemperantibus, qualia sunt saccharum saturni, nitrum purificatum, spiritus sulphuris, succus limonum, acetum destillatum, emulsiones ex quatuor seminibus frigidis majoribus, ac praecipue vesicatoria ex pulvere cantharidum parata, quae quippe partem feri maxime rareficientis egregie vacuent. Notat interim de venaesectione, minus illam fore necessariam, si cui aliquod nosse contigerit medicamentum, quod statim tollat sanguinis rareficientiam & motum ejus imminuat, nullo tamen fero symptomate subsequente. Donec vero illud inventum fuerit, venaesectionem utique celebrandam esse. Interim diligenter advertere jubet, nulla in feбри legitima temere exhibenda esse sudorifera, eo quod motus & rareficientiae augmentum, non cito desitutum, efficiant.

§. CCLV.

Quoad curationem febrium intermittentium, iterum commendat venaesectionem, nisi aetas senilis & effoeta impediatur; Quia credit, missionem sanguinis imminuere seu corrigere crassitiem; Id quod verum esse, praxis me ipsum saepius edocuit. Deinde ad lentorem e primis viis derivandum, quem purgantia vix post seculum educerent, vomitorium adeo mature, ut ante paroxysmi reditum operatio ejus absolvi possit, suadet, idemque, aliquando saepius exhibendum injungit, modo aeger sanguinem vel exspuere vel evomere non sit assuetus. Post exhibitum emeticum, quoties opus est, statim a paroxysmo finito, dari jubet febrifugum, sive potius attenuans & aperiens, morbo nempe a lentore producto & febrim comitante vel excitante, oppositum, quale credit esse ex amaris parandum, quodque & diuresin & diaphoresin & alias itidem secretiones promoveat, uno verbo, corticem peruvianum seu chinam chinae, in pulvere intervallo duorum paroxysmorum, ultima vero dosi sex horis, si fieri potest, ante sequentis periodi accessionem, exhibendam; Quanquam

alii non sine veritatis consensu crediderint, tantum abesse, ut cortex peruvianus se & excretionem promoveat, ut eas potius sistat & multa periculosa symptomata habeat pedissequa. Superveniente forte & quidem importunius alvi fluxu vel vomitu, quae tamen utraque evacuatio indolem criticam prae se ferre videtur, tunc jubet praedicto febrifugo admiscere laudanum; Citius enim & perfectius morbum debellatum iri credit, si laudanum febrifugo admixtum fuerit, quod nisi multis experimentis comprobatum fuerit, difficulter credent practici. Ex his interim deducit *Auctor noster*: I.) sal corticis peruviani aut ipsius spiritum, salia lixivialia aut spiritus quosvis parum prodesse adversus febres intermittentes; Quod, licet de spiritibus verum sit, ad salia tamen lixiviosa extendi nequit, quorum quippe beneficio plus millies febres intermittentes feliciter fugatae sunt. II.) Purgantia non debere propinari post exhibitum corticem, cum purgantia, si fortia sint, solummodo educant partes sanguinis aqueas, ut sic reliquiae magis crassescant; Si vero fortia non sint, nec febrim tollere possint.

§. CCLVI.

Curatio febris continuae illustratur exemplo Juvenis robusti, in quo post venaesectionem exhibitum est vomitorium, post vomitum vero clyster injectus. Datum deinde fuit Julapium mane, ex aqua carduibenedicti, calendulae & theriacali, lapidibus cancrorum & spiritu salis vel nitri dulcis nec non syrupo limonum: Hora vero somni sumpsit emulsionem ex seminibus quatuor frigidis majoribus & papavere albo in aqua pura cum syrupo papaveris albi, & sic tandem convaluit, an bonitate methodi, an vero beneficio vegetae Naturae, jam non disquirimus. Atque haec, quae de curatione febrium adlata sunt, speciminis loco sufficere possunt, ut inde dijudicare quilibet possit, quid ex *praxi Pittcarniana* polliceri nobis debeamus.

§. CCLVII.

§. CCLVII.

Nostro pariter aevo *institutiones medicas* evulgavit *Hermannus Boerhaave*, in Academia Lugduno-Batava Professor medicinae dignissimus. Uti nemini meritas suas laudes detrahere consuevimus: Ita fatendum utique nobis est, celebrem Virum hic magnam ingenii sui vim adhibuisse, ut secundum ea, quae sequitur, principia mechanica, novum Institutionibus medicinae lumen accenderet. Proinde aliis perite dijudicandum relinquo, annon plerisque aliis *Institutionum medicarum* scriptoribus, ista mechanice negotium tractandi methodo, palmam vel praeripuerit vel dubiam saltem fecerit? Scopum, quem in scribendo praefixum sibi habuit, nemo facile taxabit, nisi omnia sinistre vel capiendi vel interpretandi pertinax animo infideat opinio. Ita enim profecto rem sese habere, concedent facile omnes: *Sua quemque optime intelligere, & sua cuique praeceteris placere, unde & clarior doctrina & animata plerumque sequitur oratio; Quumque suo quisque sensu abundet, multa refutanda frequenter inveniet, unde gravem frustra laborem aggravat, minusque incitata dictione utitur.* Id quod centies toto illo plurimum annorum tractu, quo formandis Philiatorum animis incubui, mea experientia verum esse deprehendi. Quicquid vero horum omnium sit, qui ad functiones corporis humani dextre explicandas purum *mechanismum* non sufficere (id quod tamen Mechanicorum omnium *πρωτον ψευδος* est) sed praeter *mechanicum* principium aliud adhuc, nempe *organicum* requiri existimat, multa & id jure quidem desiderabunt, quae tamen prolixius hac vice discutere, non est hujus loci.

§. CCLVIII.

Partitionem hucusque receptam quod attinet, nihil in ea innovavit; Retinuit namque vulgatam *Institutionum* in quinque partes divisionem, ita quidem, ut in *Physiologia* partes & fabricam corporis humani, vitam & sanitatem, quaeque ex his consequuntur, effecta explicata daret;

In *Pathologia* sisteret morbos, eorum differentias, causas & effecta: In *Semeiotica* signa, quibus tam in sano quam aegro corpore, quis, qualis sit, fuerit, futurus sit gradus, ordo, effectus vel remedia eorundemque usus, quibus & vita & sanitas conservari queant, declararet, & in *therapeutica* denique materiam medicam, medicamenta, eorum preparationem utendique variam rationem proponeret. Quae vero in *prolegomenis* de origine, progressu, fatis, nobilitate, utilitate & necessitate artis medicae, nec non de ejusdem definitione & objecto more *Institutionistarum* differuit, ea, utut citra reliquae tractationis praejudicium abesse potuissent, attamen, cum sua se brevitate commendent, tolerari utcunq; valent.

§. CCLXIX.

Ast vero de principiis demonstrandi altior erit inspectio; In quibus quippe admittendis, si quis paulo morosiores sese gerat, id vitio eidem vertendum non erit. Principia ista clara, distincta, potissimum vero certa esse oportere, generale est axioma, quod sua statim luce radiat. Similiter; Incipiendum esse a simplicissimis, cognitu facilissimis atque certissimis, & ab his deinde ad ea semper pergendum, quae proximo gradu harum conditionum praegressa attingant; Atque ita accurate ad composita, obscura, difficilia progrediendum esse, id omni pariter dubio vacat. Illa vero, quae distincta, clara atque certa esse oportet, sola in iis, quae pure corporea in homine, mechanica esse, nemo aequae facili brachio concedet. Et cum Clariss. Auctor ipsemet agnoscat, reperiri quoque in homine alia, quae per dicta illa principia intelligi nequeant, atque adeo per eadem ne quidem demonstrando explicari possint; Hinc alia quidem ratione circa haec utendum esse, provide monet: Perpetuo tamen dubium relinquitur, an illa etiam, quae ille pure corporea in homine esse existimat, mediantibus ejusmodi principiis pure mechanicis declarari ac demonstrari possint? Quibus interea nihil obstantibus, libere fateor, inter omnes recentiores

tiores scriptores neminem *Boerhaavio* adcuratius & concinniore connexione functiones oeconomiae animalis secundum principia hygrostatico-hydraulico-mechanica explicuisse; Quam etiam ob rationem omnibus, qui nostrae sese informationi credunt, commendamus, suademus & auctores sumus, ut hasce sibi *Institutiones* familiares reddant, vel, si proprio marte tantum onus humeris suis impar suscipere renuant, nostra vel alia manu ductione prius utantur, ut deinde *mechanismum* cum *organismo* recte conjungere discant.

§. CCLX.

Cum etiam nonnulli in votis habuerint, ut quis *Eclecticae Medicinae* Patronus hac etiam forma ac methodo *Institutiones medicas* concinnaret: Illorum quoque desideriiis adsurrexit *Johannes Helfricus Juncken*, Med. Lic. & *Physicus Francofurtensis ad Moenum*, qui fundamenta medicinae modernae *eclecticae*, praemisso tamen *Physices* compendio, ad *Cartesii* mentem potissimum conscripto, ex celeberrimis medicis neotericis per omnes ac singulas artis partes tradit, de quibus sperat, quod universa medicina per varia opinionum & sententiarum discrimina haecenus volutata, iisdem nunc firmitus inniti queat. Vereor autem, ne iisdem, quae haecenus *Philosophiae Eclecticae* obiectata sunt, incommodis prematur *medicina eclectica*: Non enim defuerunt, qui eandem pallio pannoso comparare ausi sunt, quod eadem, uti illa, opinionum diversicolorum & lacerae vestis instar male cohaerentium varietate & farragine laborare videatur: Quod tamen iudicium certas ob rationes hac vice meum non faciam.

§. CCLXI.

Quod *Physicam*, non *eclecticam*, sed *Cartesianam* & citra exceptionem *sectariam* medicinae praemiserit, dubium statim non nemini parere & argumentandi ansam subministrare posset, an etiam *Philosophia sectaria medicinae eclecticae* facem sit accensura? Imo, annon potius iudicium, sectariis

principiis imbutum & corruptum ad medicinam sit adlaturus, qui ex *Physica sectaria* in *medicinam eclecticam* aliquid luminis sibi foeneratur? Neque quicquam est, quod *Auctorem* nostrum tueri potest, quod a vulgari scholarum methodo recesserit, & physica principia medicis praemiserit, quam vulgare illud *Brocardicum*: *Oportere medicum ibi incipere, ubi physicus desierit*; Quod, an unquam de physica tali *sectaria*, quae in generalissimis tantum speculationibus occupata est, intellectum fuerit, aut etiamnum intelligi possit, haud injuria dubitamus. Nos quidem variarum opinionum farraginem, de qua sua in Praefatione jure conqueritur *Auctor*, ejusmodi physicam parere posse, non dubitamus: Minimum vero lucis tyronibus artis, ad eam vel commodius discendam vel felicius exercendam, accendere, audacter negamus.

§. CCLXII.

Missis ergo, quae de physicis principiis, tanquam pro meliori fundamentorum medicinae complemento, praefatus est *Auctor*, ad rem ipsam propius nos convertamus. Postquam itaque in *prolegomenis* more solito tractavit de primis medicinae initiis, objecto atque fine, subjungit divisionem in tres principales partes, nempe *physiologiam*, quae in fabricam & actiones humani corporis inquit, in *pathologiam*, cui tanquam ministram jungit *Semeioticam*, & in *therapeuticam*, cui tamen *pharmacia* & *chirurgia* ancilletur, sicuti *Hygieinen* ad artem prope culinariam relegare non veretur. Interea fane rationes, quare medicina a multis retro seculis tam steriles multisque dubiis & incertis traditionibus implicata manserit, non contemnendas attulit, quae huc fere redeunt: Quod crebrior medicinae mutato contigrit; Quod superiorum seculorum medici saltem occupati fuerint in *Graecorum* & *Arabum* medicorum versione & falsa explicatione; Quod methodus *Hippocratis*, per observationes tradita, fuerit neglecta; Quod *Aristotelis* Philosophia pessimo consilio a *Galeno* in medicorum scholas

scholas fuerit introducta, quanquam certissimum sit, Philosophiam *Cartesianam* parem cladem attulisse; Et quod *Chymia*, primum medicinae experimentalis subsidium, fuerit neglecta &c.

§. CCLXIII.

Verum enim vero, si nunc in primam *fundamentorum Junckenianorum* partem, nempe *physiologiam* oculos convertere placeat, primo statim obtutu *πρῶτον* illud *Ψευδος* occurret, quod & aliorum Neotericorum oculis glaucoma induxisse, jam saepius hinc inde animadversum est. Consistit illud in eo, quo secundum *Auctoris* nostri adfertionem, corpus humanum vivum nihil sit aliud, quam statua humana vivens, quae, sicuti horologium, ex variis partibus constructum est, quarum vi operationes suas edit: Ita illa aequae per dispositionem partium singularem hominibus convenientem certos motus & actiones exerceat ac machina quaevis alia, cujus principium fuit artifex: Cui adferro contrarium esse videtur, quod sub initium primi capituli *Physiologici* idem humanum corpus horologio vel simili machinae tantummodo comparandum esse dicatur, quod sane non potest esse unum idemque, nisi quis *τὸ εἶναι* & *simile εἶναι*, unum idemque significare, absurde contendat. Sicuti autem praeter corpus organicum, varia ratione extensum, in homine adhuc aliud, nempe cogitans, reperitur principium: Ita ulterius inde infert: Duplex in homine residere principium actionum, aliud nempe *cogitans*, aliud vero *extensum*, a quo utroque etiam diversi generis operationes promanent, quarum aliae soli menti, aliae soli corpori, aliae vero ambabus substantiis conjunctim competere. Ad actiones à sola corporis ejusdemque partium legitima seu proportionata dispositione provenientes, reducit conceptionem & generationem ipsiusque foetus in utero nutritionem, respirationem, ventriculi adpetitum & alimentorum adsumptionem & subsequentem eorundem in ventriculo & duodeno chylicationem, ipsius chyli depurationem & motum

motum per intestina, ingressum & progressum per vasa lactea, sanguinis elaborationem & circulationem, nutritionem, se & excretionem urinae, insensibilem transpirationem & sudores, menstruam excretionem mulierum, bilificationem in hepatae, nec non spirituum ita dictorum animalium generationem ac distributionem una cum adjunctis corporis animalis, uti sunt temperamentum &c. quarum omnium functionum principium vitale sit mere materiale & mechanicum, nempe spiritus animalis, quem ratione summae suae subtilitatis, mobilitatis ac virtutis elasticae cum spiritu subtilissimo, arte chymica parato vel plane cum radiis luminis comparare non dubitat.

§. CCLXIV.

Relicta *Physiologia*, ad *Pathologiam* transitum facit *Auctor* noster, quam theoriae medicae partem in *generalem* ac *specialem* distingvit. In *illa* de morbis in genere, in *hac* vero de illis speciatim, nec non de eorundem causis tam externis quam internis uti & effectibus agit. Ad causas externas, praeter sex res non naturales, etiam casum & contagium refert; Caeterum omnes morbi sunt vel fluidarum vel solidarum partium: Ad primam classem pertinent praeternaturalis humorum abundantia vel contrarius defectus, ita tamen, ut illa hoc longe frequentior sit; Deinde vitiosa humorum qualitas seu cacochymia, cujus varias adferit species, nempe visciditatem & crassitiem, tenuitatem nimiam, aciditatem, austeritatem humorum, acrimoniam eorundem falsam, alcalinam &c. Huc etiam, secundum *Au-
thoris* mentem, spectat praeternaturalis humorum circulantium motus, qui quippe perverti & vitiosus reddi potest ac solet, dum vel nimium augetur vel imminuitur vel alia ratione depravatur. Vel ipsa plane humorum substantia vitiatur, quando vel in flatus resolvuntur, vel in calculos concrescunt, vel in pus, mellaginem, pultaceam vel adiposam materiam convertuntur, unde deinde in ventriculo & intestinis flatus generentur, hic calculi ex-
crescant,

crescant, alibi vermes excludantur, vel melicerides, atheromata ac steatomata alibi producantur. Suos porro morbos vindicat spiritibus animalibus seu impetum facientibus partibus, quatenus vel eorundem substantia a maligna quadam aura, veneno animali vel exhalatione venenosa infecta in varias tendentias cieatur, unde epilepsias & convulsiones originem suam derivare existimat: Vel quatenus quantitate debita deficiunt, vel in motu suo varia ratione depravantur, cum in statu hominis regulari & ordinario hunc spirituum motum regularem quoque & ordinatum esse oporteat, & in continua quasi & aequali undulatione constitutum. Postremum in historia morborum locum concedit vitiis laesionis partium solidarum, quorsum pertinent morbi magnitudinis auctae, uti sunt varii tumores, vel imminutae, uti atrophia est: Ad quem ordinem etiam morbi in numero sive aucto sive imminuto, morbi conformationis vel figurae vel situs vel solutae unitatis pertinent.

§. CCLXV.

Pathologiae ideo subjungit *Semeioticam Auctor*, qua, quo quis promptior est atque peritior in morbo cognoscendo, eo quoque felicius erit in eodem curando. Sunt autem, quod in laudem *Auctoris* hic reticendum non fuit, in universum, quae in hac parte occurrunt, & lectu jucunda & scitu absolute necessaria. Constituit autem *Junckerus* noster duplex *Semeiologiae* membrum, quorum alterum *dignotionem*, alterum *prognosin* patefacit. Circa prius ita sese gerit, ut primum signa salubria & insalubria, deinde vero signa actionum sive integrarum sive laesarum nobis exponat. Ita ex actionibus vitalibus signa nobis praebent functiones ventriculi, respiratio, pulsus, nutritio, urinae aliorumque excrementorum excretio, uti sunt dejectiones alvi, sudores, sputum, lacrymae, menses & haemorrhoides in adfuetis, vomitus & haemorrhagiae narium: Ex animalibus vero signa desumuntur tam a sensibus externis quam internis, a motibus voluntariis, somno atque vigiliis & certo quoque

quoque respectu a dolore. Neque minus signorum fontes praebent modi quidam tam generales quam speciales corporis, uti sunt ex priorum genere calor & frigus, nec non habitus totius corporis & oculorum certa dispositio; Ex posteriorum vero classe lingua ejusque mutationes, non exclusa quoque corporis dispositione ratione temperamenti, virium, sexus, aetatis, vitae generis atque consuetudinis, imo & ipsius haereditariae dispositionis ratione habita.

§. CCLXVI.

In altero *Semeiologiae* membro, quod de prognosi agit, exhibet primum signa reconvalescentiae & non-reconvalescentiae, deinde ad signa temporis & eventus, crudelitatis item & coctionis progreditur, quibus deinde subjungit signa criseos, quatenus vel per haemorrhagiam narium vel eruptionem mensium atque haemorrhoidum, vel per sudores, vel vomitum, vel alvi fluxum vel urinam contingit. Cum vero subinde etiam per metastasin seu transpositionem materiae crises succedere soleant: Hinc illud cognoscendum esse judicat, vel ex morbi natura, vel ex virium robore, vel ex hujus illiusve partis imbecillitate, dolore varioque humoris motu. Tandem vero signa crisis consequentia suppeditat, quae vel ex euphoria vel cacophoria dignoscuntur atque petuntur vel ex laudabiliore vel illaudabiliore vultu, ex diversis pulsus conditionibus, remissione vel perseverantia febris, appetitus aliquali restitutione vel fastidio continuato, alvi apertione vel adstrictione, tranquillitate vel perturbatione mentis, somno atque vigiliis, urinae alvinorumque excrementorum varia conditione & symptomatum quorumcunque remissione vel pertinacia.

§. CCLXVII.

Ad *Therapeuticam*, Auctoris nostri ductum sequuti, devenientes notamus, tradi hac in parte methodum medendi tanquam medicationis artificialis fundamentum, eoque nomine

nomine venire artem, quae per indicationes auxilia invenit, ut illis labefactata corporis machina restituatur. Prius vero, quam curationi sese accingat medicus, duo in genere requirit *Auctor*, primo, an curationem suscipere debeat? deinde, quid & quomodo agere debeat? Quibus ita praemissis singulas remediorum classes percurrit breviter, & eo quidem ordine, ut primum purgantia, quibus etiam digestiva & laxantia cum clysteribus subordinat, exponat, deinde vero ad emetica progrediatur & hinc demum de minuenda humorum quantitate per venae sectionem agat. Missis evacuantibus tractat de praeternaturali humorum circulantium qualitate corrigenda simulque eliminanda, ubi occurrunt diaphoretica ac sudorifera, diuretica, resolventia cum evacuantibus particularibus, uti sunt apoplegmatizantia, masticatoria, salivantia, thoracica, cephalica &c. singularia quoque medicamina destinans acido podagrico, acido februm intermittentium, acido scorbutico &c. idque tanta cum fiducia, ac si res jam plane confecta esset inter Practicos, omnibus hisce in morbis & affectibus acidum peccare. His tandem subjungit indicata & curationem morborum spirituum ut & solidas partes concernentium.

§. CCLXVIII.

Postrema fundamentorum *Junckenianorum* parte *Pharmacia* sistitur, quam prorsus necessariam medico esse existimat *Auctor*. In hac ita sese gerit, ut operationes *generiores* & quasi ministras praemittat, deinde vero ad *specialiores* progrediatur. Ad *illas* refert solutionem, ita tamen, ut pulverisationem, triturationem & laevigationem simul includat, ultimae tamen iterum ancilletur sectio, concisio & contusio, rasio, limatio atque tritura, cui inprimis famulatur cribratio atque lotio: Ad *speciales* vero revocat deliquium, digestionem, nec non solutionem juvantes operationes, ut sunt expressio, decantatio, colatio, filtratio, despumatio, clarificatio, extractio, liquefactio &c; Omnium nobilissimam operationem dicit esse destillationem,

nem, quam tamen, pro meliori successu, praecedere debere injungit macerationem & subinde fermentationem vel putrefactionem, quae ultima multum juvetur contusione, humido, calido, sale ac digestionem. Destillationem excipit sublimatio, quae quippe prioris tantum species est, uti & rectificatio, cohobatio & circulatio: Quibus absolutis agit de calcinatione, fusionem, detonationem, fulminationem, vitrificationem, amalgamationem, caementationem & reverberationem, quas omnes ordine excipit fixatio. Nunc vero demum instrumenta pharmaceutica exponere incipit, quorum ignem, aërem, aquam, furnos variaque vasa refert. Producta inde emergentia sunt aquae destillatae, balsama, calces, condita, confecta, conservae, croci, elixiria, essentiae, extracta, farinae, feculae, flores atque sublimata, lapides, lixivium, magisteria, olea, reguli, resinae, rob, salia, syrapi, succi, spiritus vel vinosi vel acidi vel urinosi, sulphura, tincturae &c. Agmen denique claudit compositio medicamentorum, cujus regulis generalibus traditis, circa pondus & dosim tam absolutam quam respectivam, agitur de compositione medicamentorum in specie, quae in externa & interna dispescuntur: Ad illa pertinent apozemata seu decocta, boli, electuaria, emulsionem, infusa, looch, morsuli ac rotulae, pilulae, potiones & pulveres: Ad externa vero reducit cataplasmata, collyria, cucuphas & sacculos cum emplastris, epithematis, gargarismatis, linimentis & unguentis.

§. CCLXIX.

Nostro quoque tempore tentamen & examen medicum *Institutionisticum* per quaestiones & responsiones juxta mentem veterum pariter atque recentiorum orbi eruditorum, barbaro tamen stylo, aures moleste adficiente, exposuit *Petrus Linfing*, Phil. ac Med. D. S. Caesareae Majestatis Personae medicus & Institutionum in Alma Catholica Caesareo-Archiducali Universitate Oenipontana Professor Ordinarius. Quod deinde tentamen in gratiam Philiatorum
Pragen.

Pragensium plurimis quaestionibus adnutu & consensu praefati *Authoris* adauctum & illustratum denuo edidit *Jobannes Franciscus Löw*, S. R. J. & Caesarearum provinciarum haereditariarum eques, Med. D. & in celeberrima & antiquissima *Carolo-Ferdinanda* Universitate *Pragensi* medicinae practicae P. P. Hi, praemissis quaestionibus prolegomenalibus, ut *Auctores* loqui amant, de medicae artis existentia, essentia, origine, sectis, objecto, fine ac divisione ejusdem in *physiologiam* & *hygieinen*, *pathologiam*, *semeioticam* ac *therapeuticam* ita agunt, ut haec ultima tamen *chirurgiam*, *pharmaciam* atque *diaetam* sub sese comprehendat. Ubi circa conjunctionem physiologiae cum hygieine idem fecisse videtur, quod jam superius *Oligerum Jacobaeum* & *Fridericum Hoffmannum* pariter fecisse & adprobasse animadvertimus.

§. CCLXX.

Verum descendamus ad specialia & consideremus ante omnia, cujus momenti sint quaestiones physiologicae? Equidem si rem ex aequo ponderare vellemus, dicere possemus, quod ad Physiologiam vere medicam eminus saltem respiciat: Cum pleraque, excepta doctrina temperamentorum, quae de elementis, humoribus, spiritibus &c. adferuntur, a scopo medico admodum sint aliena, atque adeo, siue discantur siue ignorentur, indifferens: Nihilominus tamen quaedam naturae phaenomena, methodo mechanicorum, haud infeliciter explicat; Quae etiam ratio nos movit credendi, *Auctores* hosce inter omnes medicinae sectas ab ea, quae dogmatico-mechanica adpellari amat, non valde alienos esse, etiam si in totum eandem non amplectantur. Unde ad quaestionem: Quid sit instinctus Naturae? Respondetur: Esse motum localem, uti totius, ita & partium exiguarum, certa magnitudine & figura praeditarum, secundum quas res naturales distinguantur & varias denominationes operationesq; fortiantur. Imo eandem quoque ob rationem sententia *Cartesi* de principis dogmatico-mechanica, & quidem per excellentiam declaratur,

claratur, quia ille rerum omnium principia plane mechanica statuit, quae per omnia phaenomena tum in corporum compositione tum resolutione occurrentia evidentissime & ad captum seu intellectum facillime explicari possunt. Attamen provide additur: Principia haec mechanica satis quidem commode adhiberi posse ad multos naturae effectus explicandos, sed ea tamen non sufficere in omnibus, praesertim cum animalium vires & functiones explicandae sint. Id quod sufficit, ut inde cognoscamus, non puros putos esse mechanicos *institutionum* harum *Auctores*, de quibus inpraesentiarum loquimur, sed ex antiquis pariter atque recentioribus in suos usus id collegisse, quod congruum ipsis videbatur, sive quadret, sive minus. Πυξ η̄ λαξ.

§. CCLXXI.

Historia partium solidarum maximam partem ex Anatomia petita est, quae tamen praesupponenda, non de novo hic docenda vel inculcanda erat. Humoribus quoque adnumerantur spiritus seu impetum facientes partes, uti vulgo vocantur, quorum existentiam partim talibus argumentis probant, quae in meras tandem principii petitiones resolvuntur, partim vero *Hippocratis* auctoritate suffulcire & corroborare nituntur: Qualibus argumentorum generibus non multum roboris ad demonstrandum inesse, jam aliunde satis notum est.

§. CCLXXII.

Physiologiae satis commode sociatur *Hygieine*, quae est sanitatis tutrix, diaeta seu ratio vivendi; Estque secundum *Nostros* triplex, nempe *prophylactica*, quae morbos futuros pariter ac imminentes avertit, deinde *synteretica*, quae praesentem sanitatem tuetur, & *analeptica*, qua valetudinarii reficiuntur. Diaeta in genere aureis hisce regulis circumscribitur: Quae juvant & prosunt, servanda; Quae nocent, fugienda esse; Sanis nonnunquam pro medicina esse, medicina non uti; Sanum esse, qui bene digerit & bene egerit: Quibus a *C. Celso* additur alia, qua forte
nulla

nulla datur melior, nempe haec: *Sanus homo* (inquit *Celsus*) *& qui bene valet & suae spontis est, nullis obligare se legibus debet, atque nec medico nec alicui egere: Hunc oportet varium habere vitae genus, modo ruri esse, modo in urbe, saepiusque in agro, navigare, venari &c.* Speciatim deinde differitur de usu & abusu rerum non naturalium sive necessariarum, v. g. de aeris, plagae seu regionis coeli & loci seu situs salubritate, deinde de alimentis tam esculentis quam potulentis, porro de motu, quiete & exercitiis, somno & vigiliis, excernendis animique pathematibus: Ad res non necessarias seu fortuito contingentes referuntur equitatio, cursus, vociferatio, ambulatio, saltus, lusus, balnea, acidulae, lotiones pedum, manuum, capitis, vestes, lectus & lectisternia &c.

§. CCLXXIII.

In *Pathologia* agitur primum de morbis eorundemque differentiis tam essentialibus quam accidentalibus, post haec de causis morborum in genere & speciatim de externis, cui tandem tractationi symptomatum historia subjungitur.

§. CCLXXIV.

In *Semeiologia* excerpenda ideo prolixus esse nolo, quia fontes, ex quibus doctrina signorum petitur, iidem propemodum sunt, ex quibus alii etiam hanc scientiam, morbos tam cognoscendi ac dignoscendi, quam varios eorundem eventus divinandi ac dijudicandi, depromere solent. Placuit tamen, quod signa insalubria tam adcurate distincta fuerint in pathognomonica seu inseparabilia, quae morbum semper comitantur, & epigenomena, quae per causae propagationem superveniunt, atque adeo semper & ubique morbum non comitantur. Haec enim ab omnibus ea, quae requirebatur, ἀκριβεία distincta non sunt.

§. CCLXXV.

In ultima harum *Institutionum* parte sistitur *Therapeutica*, cui multae utilissimae regulae practicae in genere praemittuntur,

tuntur, priusquam ad specialia fiat transitus, uti sunt: Medicum, ut ministrum Naturae ad ejus molimina attendere debere; Non sermone tantum, sed ipso opere vere medicum haberi; Visitationes crebras patientium esse celebrandas, & in illis sedulo vultum, vires, victum & mutationes morbi examinandas ac perdiscendas; Nihil movendum, neque immutandum, neque alimentis neque medicamentis, si natura bene agit per se, quod debet; Remedia saepe mutanda non esse, quae ab initio bona sunt visa, licet non succedant; Non pudeat quenquam medicum, in arduis casibus tempestive alios medicos in consilium vocare; In consiliis cavendam esse contentionem & disputationem, quae quippe medicos dedecet & aegros non juvat, sed afflictis addit afflictionem; Semper urgentiori & periculofiori quantocyus succurrendum, etiam remediis temerariis, si opus sit, ne, his omissis, aegrum certo mortis periculo exponat medicus; Morbum parvum non esse attollendum nec magnum parvi faciendum: Id enim medicos turpis lucri & ignorantiae ergo facere; Morbo non cognito, ad magna remedia nunquam progrediendum, ne errorem vel periculum committat & pulmonem curet, ubi ventriculus patitur; In formulis remediorum praescribendis accuratum esse oporteret medicum; In aegris considerandam esse aetatem, sexum, consuetudinem, morbum, vitae genus, regionem, vires & ipsum denique medicamentum; Opiatorum & narcoticorum abusum esse fugiendum, nec ea porrigenda exhaustis & viribus prostratis, cum iis sint viaticum ad aeternitatem; Idem intelligendum esse de abusu purgantium vomitoriorumque; Medicamenta incognita, male praeparata, obsoleta & destructa nunquam esse ordinanda: Et quae sunt alia ejusmodi monita plura, quae, si a Practicis ea, qua par est, solertia in facienda praxi observarentur, certissimum est, multis aegrotantium querelis supersedere posse Practicos.

§. CCLXXVI.

Quod ipsi ab *anonymo* quodam exprobratur vitium, quasi nempe aphorismos *Hippocratis* a *Wedelio* in porismata resolutos ad verbum transcripserit, ejus mentione non facta; Id silentio praetermitto: Dicat ipse, si adhuc in vivis fuerit, suam causam, seque contra tam gravem *plagii* imputationem ipse defendat.

§. CCLXXVII.

Ex Gallis Dn. *le Francois*, Facultatis Parisiensis Doctor medicus, idem fovisse videtur propositum, quod *Paulum Ammannum*, Professore olim Lipsiensem, commovit, ut ad *institutionum medicarum* emendationem, necessario suscipiendam animum adplicaret, ea tantum differentia inter utrumque intercedente, quod *ille* magis *consilium de universa medicina emendanda* subministrare cordi habuerit. Uti vero nullum dubium est, quin consilia talia Reipublicae medicae admodum salutaria, utilia imo & necessaria sint: Ita tamen eo potissimum collineare deberent, ut justa primum & futuris usibus practico-clinicis recte inservitura theoria consideretur, cui dein ceu solido fundamento tota praxis clinica superstrui posset. Quae eadem *Auctoris* nostri animo insedis- se videtur opinio, dum non sine ratione conqueritur, praecepta scholarum systematibus; praxi medicae contrariis, inniti, parum a docentibus de justa remediorum adplicatione moneri, atque hinc parum vel nihil utilitatis in discipulis redundare inde posse. Accedit, tyrones artis nescire verum sibi eligere Doctorem, qui, si ipse praxin clinicam nunquam exercuerit, atque adeo observationum utilium suppellectilem colligendi occasione destitutus ipse fuerit, sanorum & praxi adplicabilium praeceptorum loco, inanes ac saepius cerebrinas suppeditabit speculationes, quibus, si dein praxin suam superstruat, falli eum multis modis oportet. Semper mihi visum est, promiscuam talem in studio medico, quod sanitatem & vitam hominum pro objecto habet, informationem studiosae juventuti nocentissimam esse.

Y

§. CCLXXVIII.

§. CCLXXVIII.

Atque, hisce ordine sic praemissis, non solum de obstaculis, medicinae incrementa impredientibus removen-
dis, sed & de justis atque legitimis mediis, quibus ad
statum meliorem ac feliciorem evehi possit ars medica, so-
lide differit.

§. CCLXXIX.

Anno 1731. *institutiones medicinae theoreticae*, physiologi-
am & pathologiam comprehendentes, publicae luci expo-
suit *Antonius Deidier*, Regis Consiliarius ac medicus, nec non
in alma Monspeliensium Academia chymiae P. P. ordinis
S. Michaëlis Eques & Societatis Regiae Londinensis focus,
nec non Galliae triremium Archiater. Quid in illis prae-
stiterit Clar. Auctor, ideo prolixius exponere mihi haud
licet, quod in hunc usque diem meas in manus nondum
pervenerunt.

§. CCLXXX.

Ex *Anglis* vero hoc nostro seculo *manuductionem physico-
medicam* communicavit *Petrus Paxton*, qua Academicae ju-
ventuti methodum & adminicula suppeditavit, ad artis
medicae cognitionem facili negotio perveniendi. Funda-
mentum nempe, cui hanc suam promissionem superstit, tam
a vera partium, quibus C. H. componitur, structura,
quam etiam a continuo fluxu & mutatione earundem pe-
tit atque morborum myriades, in Europaeis regionibus
homines infestantium, non tam a naturae humanae fragili-
tate, quam potius a luxuria & male sano vivendi ordine
dependere demonstrat.

§. CCLXXXI.

Ex eadem nobilissima *Anglorum* natione in publicum
quoque produxit ac delineavit medicinae ac morborum
statum *Johannes Woodwardus*, M. D. inque Collegio *Gersba-
mensi* ejusdem Prof. P. nec non medicorum Collegii & societa-
tis regiae membrum, aliis jam scriptis in Actis eruditorum
Lipsiensibus hinc inde recensitis satis notus. Relictis o-
tiosis & sterilibus theoriae vulgaris figmentis, quibus per-
multi

multi hac nostra aetate animos suos pascunt, secuturum se potius naturae ipsius atque observationum ductum spondet, nec tamen ratiocinia se omnino neglecturum, fidem simul facit. Quod scriptum ut fructuosius legeretur, commendat praeliminariter evolvi alium a se editum librum sub rubro: *Idea naturae humanae morborumq; , quibus est exposita, cum metodo iisdem medendi.*

§. CCLXXXII.

Cum vero tractatui huic non pauca immiscuisset, quae aliorum Doctorum Londinensium placitis erant contraria, tritamque hactenus & consuetam medendi methodum dereliquisset, inprimis autem DD. *Freindium* atque DD. *Meaden* acerbius paullo tractasset, crabrones hoc ipso scripto tantopere irritavit, ut permulti adversarii certatim quasi, ceu fieri adsolet, in ipsum conspiraverint; Unde non defuerunt, qui per satyras, dramata musica, quae operas vocant, imo libellos famosos ludibrio publico *Woodwardum* exponere sategerunt, imo DD. *Mead irae*, quae furor brevis est, fraena eousq; laxare haud erubuit, ut *Woodwardo* in platea publica obviam factus, gladium stringere & hostiliter ipsum invadere haud fuerit veritus. Ad quem temeritatis & audaciae gradum cum multis ob legum civilium rigorem pervenire non liceat: Convitiis saltem & inhonestorum verborum farragine obruere conantur illos, qui dogmata male sana, in ipsorum tamen animis altius radicata, imo communi quasi consensu adprobata, philiatrorum animis evellere sanioraque praecepta instillare moluntur.

§. CCLXXXIII.

Valet nimirum hunc usque in diem tritum illud: VERITAS ODIUM PARIT. Fata, quae hucusque expertus sum ipse, *Woodwardianis* haud plane dissimilia sunt. Quamvis enim ad eum usque insolentiae & furoris gradum nondum pervenerint adversarii mei, ut gladium publice, id quod *Woodwardo* contigit, in me stringerent: Non cessant

runt tamen, injuriosis merasque calumnias spirantibus scriptis me impetere, existimationem ac famam meam aliis suspectam reddere, retia clanculum tendere idque omne moliri, quod fortunae meae quaecunque detrimentum adferret: Verum cuncta haec consilia in irritum hucusque recidisse, in sinu gaudeo, taliumque emissariorum, alienis passionibus inservientium, oblocutiones non pluris, quam catellorum latratus aestimavi, quos proinde ne dignos quidem judicavi, quibus vel verbulum amplius reponeretur. Tantos interim tumultus excitavit adammatorum *spirituum animalium*, quorum systema verum ignorantiae asylum est, relegatio! Tantopere crabrones irritavit corticis *peruviani*, imposturarum plenissimi, insimulatio!

§. CCLXXXIV.

Facilem quoque in medicinam introductionem, fundamenta & necessaria praeliminaria ad praxin continentem, concinnavit J. Pechey, Collegii medici Londinensis membrum. Non videtur vero Auctor proprias meditationes una continua & naturali serie isto in libro proposuisse, sed ex celebrioribus tantum scriptoribus congestisse. In institutionibus, quae primam ejus partem constituunt, physiologiam, hygieinen, pathologiam, semeioticam ac therapeutikam; In secunda materiam medicam succincte exposuit, quae tamen una cum reliquis, quae pertractavit, momentis rerum, non sunt hujus loci.

§. CCLXXXV.

Anno 1712. in theatro scriptorum artis medicae elementarium comparuit J. von Gaukes, Med. D. pariter Angelus, qui Dissertationem edidit *de medicina, ad certitudinem Mathematicam evehenda, continentem certa artis hujus principia, & quomodo ex iis omnia mechanice & methodo Mathematica demonstrari possint*. Optandum equidem omni modo foret, ad certitudinem Mathematicam artem in omnibus ac singulis suis partibus evehi posse: Longe vero alia quaestio est,

an hoc ab Auctore nostro praestitum sit? Illa certe principia, five physica, five chymica, five mechanica, five hydraulica fuerint, quae tamen pro certis & indubitatis venditantur, talia non esse, ipsa illorum indoles satis evincit; Per physica enim intelligit materiam, motum & formam, necnon tria *Cartesii* elementa, quae nemo alius facile aliter consideraverit, quam ut hypothetica. Per *chymica* denotat particulas & moleculas, quas machinarum invisibilium nomine indigitat. Per *mechanica* designat potentias mechanicas vulgares & per *hydraulica* machinas & instrumenta hydraulica. Verum qui demonstrationum Mathematicarum genium rite callent, facili opera comprehendent, Auctoris nostri putatitias demonstrationes cum Mathematicis nil nisi nomen commune habere. In quo concedendo non difficilis erit, qui propositiones adlatas cum demonstrationibus ipsis conferre non dubitaverit.

§. CCLXXXVI.

Ante aliquot annos edidit quoque institutiones medicas *Johannes Browne*, Med. D. quas quidem variis ex Auctoribus collectas, mechanismo nihilominus structuraeque partium solidarum ac fluidarum, ex quibus quippe corpus humanum componitur, superstruere conatus est. Quatuor itidem constant partibus, *Physiologia* nempe, *pathologia*, *semeiologia* ac *therapeutica*, quae, qua ratione systematice inter se mutuo cohaereant, ex Praefatione patere potest: Ex qua proinde paucula excerpere nobis liceat.

§. CCLXXXVII.

Principia, quae fundamenta demonstrationum esse debent, requirit mechanica, a materia nempe & motu seu dispositione corporum ad motum petenda. Sanguinis motum a systole & diastole fibrarum muscularium motriciumque, quinimo a temperie & quantitate fluidorum vult esse derivandum; Motionem vero & impulsus solidarum

partium non immateriale vel ideale quid esse, sed materiale, subtilissimum tamen, catholicum nempe illud fluidum, propter elasticitatem summe activum, sub respiratione ad nos accedens, quod a veteribus anima mundi appellatum est: Hoc subtili elastico aëre exhalante, cum vita nostra vult actum esse. Hanc vitam describit esse constantem motum fluidorum, per certos canales vel vasa solidorum impulsu adjutum & corruptibile corpus ab interitu vindicantem: Motu hoc bene succedente, partem vel totum corpus vivere & a corruptione praeservari, interrupto vero illo nec restituto, mortuum esse pronuntiandum: Mortem vero a deficiente sanguinis motu dependere & cum dispositione ad putrefactionem esse conjunctam. Sanitatem non simpliciter in motu sanguinis circulari consistere, sed in certo motus hujus ordine, in moderato liberoque progressu sanguinis, cordis pulsu fibrarum tono adjuto, fundatam esse, seu ab aequalitate motus solidarum pariter ac fluidarum partium dependere. Ad continuandum hunc motum partium moderatum & aequalem partium solidarum impulsu, partim humorum debitam & diversae vasorum amplitudini diversoque fibrarum vigore respondentem quantitatem, partim legitimam elementorum proportionem pro fluidis, massam sanguineam constituentibus temperandis, partim vasa libera & aperta, per quae sanguis absque obstaculo pertransire valeat, requiri. Prae reliquis tamen pulsum & tonum partium utramque facere paginam ad sanitatem conservandam; Pulsum cor & vasa respicere, quae a centro ad circumferentiam humores pellunt: Tonum vero fibris deberi ac membranaceis musculosisque partibus, quibus contra a circumferentia ad centrum urgentur: Utraque motus specie recte vigente, secretiones bene succedere & hominem perfecta frui sanitate. Ad *pathologiam & therapeutica*, prolixitatis nimiae vitandae causa, non progredior.

§. CCLXXXVIII.

Pedem potius promoveo ad *Johannem Mariam Lancisium*,
summi

summi Pontificis Romani CLEMENTIS XI. archiatrum, qui Romae dissertationem *de recta studiorum medicorum ratione instituenda* publice recitavit, quae cum adplausu excepta fuit.

§. CCLXXXIX.

Neque dubitamus eximium quendam inter scriptores *Institutionum medicarum* locum concedere *Johanni Baptistae Morgagno*, in Gymnasio Patavino olim Theoretices Profefori longe celeberrimo, nunc vero Anatomico illius Primario. Quamquam enim in hunc usque diem ignorem, an, quas meditatus est, novas Institutiones; lucem jam adspexerint: Earundem tamen ideam inaugurali Oratione, qua Professionem Theoretices in Universitate Patavina auspicabatur, praeliminariter delineavit. Optamus animitus, ut, si dictis *Institutionibus* ultimam manum nondum admo- verit, propediem id faciat, eoque ipso votis atque deside- riis discipulorum aequae ac docentium satisfaciat. Sperare enim integrum est, solidi quippiam atque consummati ab hoc Celebri Viro profecturum, qui in peritia secandi tot haecenus egregia specimina edidit: Siquidem certis- simum est, Anatomiam longe solidiora elargiri posse fun- damenta, ad certitudinem mathematicae aemulam medi- cinam evehendi, quam ex physica, chymica, hydraulica mechanica &c. expectare unquam licet.

§. CCXC.

In hunc finem, ut nempe principia artis faciliora red- derentur Philiatris, conspiravit sociamque operam contu- lit *Hermannus Fridericus Teichmeierus*, M. D. ejusdemque in Academia *Jenensi* P. P. Oed. *anthropologiae* elementa seu theo- riam C. H. edendo, in qua omnium partium actiones ex recentis- simis inventis anatomicis, & rationibus tum physicis tum chymicis, tum denique mechanicis, in usum Auditorii sui declarantur. Uti e- nim mechanicis principiis addictus est: Ita & ad mentem Mechanicorum ratiocinatur; Atque adeo corpus hominis habet & agnoscit, pro machina, in quo quippe multifaria reperi- an-

reperiantur machinarum minorum, inimitabili artificio ab omnipotente numinis manu coagmentatarum genera, puta vectes, trochleae, funiculi, pendula, antliae cum suis embolis, cylindris, valvulis ac tubulis, exemplo oculi, auris aliarumque ejusmodi machinularum. Imo ulterius ille progreditur, atque, inter C. H. & laboratorium chymicum maximam intercedere analogiam, adferere nullus dubitat; Adeo ut, secundum ejus sententiam, in illo aequae *coagulationes, solutiones, digestiones, filtrationes* &c. ac in laboratorio quodam chymico contingant. Quae causa ipsum quoque permovit, ut in explicanda officiorum, quibus viscera perfunguntur, ratione, ad principia nunc mechanica, nunc chymica, nunc utraque recurrere consultum judicaverit.

§. CCXCI.

Circa finem praecedentis seculi *fundamenta medicinae reformatae, physico-anatomica*, quae A. 1693. Bruxellis recusa sunt, edidit *Franciscus Zypaeus*; Et licet inficias eundum non sit, multa lectu digna in *Zypaeanis* hisce medicinae fundamentis occurrere: Non pauca tamen, reformatione hac non obstante, emendatione nova indigere, ex elementis *Pitt-carnii* jam superius allegavimus.

§. CCXCII.

Alia plane via incescit *Johannes Bartholomeus Adamus Beringerus*, qui veteres cum recentioribus conciliare conatus est; Quem in finem *connubium Galenico - Hippocraticum* seu *ideam institutionum medicinae rationalium* secundum veterum & recentiorum sententias compendiose contractarum in lucem protraxit, quae *Herbipoli* A. 1708. prodiit. Retinuit is quidem divisionem *institutionum* in quinque partes, aliis solemnem, *physiologiam* nempe, *pathologiam* *semeiologiam*, *hygienam* & *therapevticen*, sed in omnibus brevissime sese gessit, paucisque thesibus singulas complexus est; Ut scopus ejus fuisse tantum videatur, veterum aequae ac recentiorum principia & offerre & inter se mutuo conferre; Ut saltem
quandam

quandam cynosuram ac regulam exhiberent, ad medicinam noviter adspirantibus, qua ducti, si non portum attingere, saltem perspicere, & in vasto scientiae medicae oceano sententiarum periculosarum syrtes ac scopulos caute declinare discerent.

§. CCXCIII.

An vero ad finem hunc feliciter sint perventuri philatri nostri, ex speciminibus paucis, quae hic excerpta sistemus, nullo negotio cognoscere ipsis dabitur. Sanitas ipsi dicitur corporis humani ejusque partium constitutio naturalis, ad actiones ejus integre & naturaliter edendas apta & destinata. Hanc constitutionem, putat, consistere in spirituum harmonia, horum debita temperie, & partium solidarum legitima conformatione & continuitate decenti. Divisionem partium in continentes, contentas & impetum facientes calculo suo probat. In elementorum numero eligendo placuit ipsi imitari Cartesium, atque adeo cum ipso particulas primi, secundi ac tertii elementi, seu materiam subtilissimam, subtilem seu aetheream & crassiorem seu terrestrem adoptat; statim tamen subjungit, hanc hypothesein, si non caeteris veriore, ad captum tamen & dilucidationem studii medici, & singulorum in eodem abstrusorum explanationem faciliorem magis adcommodatam esse. In describendis temperamentis SEXCENTA HIPPOCRATIS fundamenti loco substernit: Unde statim patet, inter *temperamentum* & *temperiem* (quam confusionem plures admiserunt) non rite ipsum distinxisse. In tradenda spirituum doctrina a fabulosis traditionibus hucusque in scholis receptis ne latum quidem unguem recedit. Habet illos pro *substantia tenuissima, subtilissima & volatilissima*, ad totum complendum, & *functiones C. H.* rite obeundas destinata. Defendit quoque cum veteribus spiritum insitum, eumque vere existere, non tantum ex morbis haereditariis, certae cuidam parti implantatis, sed & a particularibus a parentibus communicatis *idiosyncrasiis* & *curationibus magneticis* probat. Functiones animam suo in corpore median-
tibus spiritibus peragere existimat; Hoc tamen solvendum
Z propo-

proponit problema: Annon cum Clar. *Stablio*, medicinae Prof. Hallensi celeberr. *rejeſtis ſpiritibus*, certae functiones *per animam vitaliter in corpore agentem* clarius explicentur? Plura ejusmodi ſpecimina allegare ſuperſedeo.

§. CCXCIV.

Ante 24. propemodum annos *ſynopſis inſtitutionum medicinae*, auctore *Theodoro Zwingero*, Profefſore Medicinae Baſileenſi, tribus capitibus comprehenſa, lucem adſpexit publicam. In *primo* phyſiologia ſiſtitur, in qua de principiis rerum naturalium, de C. H. principio vitali, nec non de nutritione, chyliſicatione, reſpiratione, ſecretione, ſenſu, motu ac partu egit Auctor. In *ſecundo* pathologiam exhibuit, quae de natura, cauſis, differentiis & ſignis morborum tractat. In *tertio* hygieinen ac therapeuſin breviter adumbravit, methodumque medendi una cum remediis pharmaceuticis ſuccincte adumbravit; Cunctas vero haſce partes recentiorum obſervationibus & experimentis eximie illuſtravit.

§. CCXCV.

Eundem propemodum cum *Beringero* finem propoſitum ſibi habuit *Jobannes Andreas Fiſcherus*; Is enim *iliada in nuce*, ſeu medicinam ſynopticam, conciliatrici medicinae ſubſecuturae praemiſſam, publicam in lucem emiſit; Unde hanc ejus intentionem haud obſcure colligi licet.

§. CCXCVI.

Paucos ante annos eandem hanc elementarem artis medicae partem in ſtudioſae juventutis gratiam & uſum illuſtrare ſuſcepit *Chriſtianus Vaterus*, Pathol. P. P. Ord. in Acad. Vitebergenſi, nec non phyſicus provinc. Saxon. ut & conſiliarius & archiater Principis Serveſta-Anhaltini. Univerſum nempe *inſtitutionum medicarum* ambitum ſuccinctis aphoriſmis tradere & exhibere, experimentisque hodiernis phyſicis, mechanicis, anatomicis & chymicis confirmare adlaboravit. Duas eſſentiales earum partes, nempe
phyſiolo-

physiologiam atque pathologiam admodum compendiose tra-
stavit, in semeiotica vero medica tradenda prolixior fuit,
cujus etiam prognosticae parti prae caeteris hanc merito praero-
gativam vindicat, quod medicus hac ipsa fidem auctoritatemq;
apud aegros sibi conciliet: Requirit tamen simul, ut in pro-
gnosi formanda caute se gerat, ne temerario judicio sibi aliisque no-
ceat, & artem, alias satis certam, cavillationi aliorum exponat.

§. CCXCVII.

Methodus, qua usus est *Vaterus* in tradendis hisce
institutionibus, disputatoria fuit; Nulla enim, mea senten-
 tia, melior, nulla adcommodatior est hac ipsa, ad doctri-
 nas juvenum animis instillandas, ut judicium non modo
 acuatur, sed & memoriae tenacius firmitusque impriman-
 tur, quae legendo & explicando in collegiis antea pro-
 posita fuerant. Quae eadem me quoque movit ratio, ut
 hasce institutiones meas methodo primum disputatoria,
 deinde vero etiam explicatoria traderem.

§. CCXCVIII.

Systematicam universae medicinae adumbrationem,
 pro studiosorum adminiculo, tradidit *Johannes Stephanus Stro-*
belbergerus, e *Ratisbona* ad thermas *Carolinas* medicus *Cae-*
sareus. Scopus ejus, ut ipsemet mentem suam declarat,
 neutiquam fuit, ut medicinam per compendium traderet, id
 quod ne possibile quidem esse existimat, sed id potius
 voluit, ut plerosque medicinae titulos ordine quodam systematico
 proponeret, ut ceu loci communes in studiosorum medicinae usum ve-
 nirent, ad quos, quicquid alibi apud probatos auctores notabile oc-
 curreret, referrent, & si quid declarandum sese offerret, ex istis sta-
 tim peterent.

§. CCXCIX.

Huic instituto convenienter, praemissis artis medi-
 cae praecognitis, de objecto ac fine ejusdem, nec non
 de ejus necessitate, privilegiis, nobilitate vel contem-
 tu, receptam ejus divisionem in *theoricam* ac *praeticam* par-

tem proponit, in quarum *illa* corporis humani principia & affectiones, in *hac* vero circa affectiones istas exercitatio, usus & praxis explicantur. Principia partim ex *physica*, partim ex *anatomie* petenda esse existimat; Ad *physica* refert res naturales, nempe 1.) elementa 2.) temperamenta. 3.) humores. 4.) membra. 5. facultates. 6.) operationes, 7.) spiritus, & quae his annexa, ut sunt sexus, aetas & recta beneque vivendi ratio.

§. CCC.

Uti vero sanitatem describit, esse habitum C. H., ortum ex bona temperie calidi, humidi, frigidi ac sicci, ac dein ex recta conformatione & continuitate partium corporis ad actiones (*vitales, animales & naturales*) recte obeundas: Ita *morbum* nihil aliud esse opinatur, quam *privatorem sanitatis*, seu defectum dictarum operationum, ortum ex intemperie calidi, humidi, frigidi, sicci; Vel ex partium solidarum in corpore mala conformatione vel discontinuatione. Ex quo breviter sic adumbrato schemate intelligi haud difficile potest, quid pro suis usibus tyrones artis colligere inde possint vel debeant?

§. CCCI.

Iustus Vesti, in Acad. *Erfurtensi* Pathologiae Prof. Publ. fundamenta medica, olim luci publicae exposita, denuo revisa, multisque locis aucta, sub titulo *institutionum medicarum reformatarum* circa finem praecedentis seculi denuo edidit publicique juris fecit. Firmiter equidem is, ut in *praefatione ad Lectorem* ipsemet monet, apud animum suum proposuerat, nullo amplius scripto publico se in lucem proditurum, atque iudicio hominum sese expositurum, eo quod medicae artis facies Prothei instar sese quotidie fere mutet, ut, quod hodie indubitatae veritatis adsertum esse videtur, acriterque defenditur, cras iterum rejiciatur atque Clariss. Virorum scripta laudentur ab his, culpentur ab illis, si sub aequorum vel iniquorum iudicium censuram

ram cadant; Nihilofecius tamen, cum is, qui proximo ac publico inservire istudet, aequo animo utramque ferre debeat fortunam; Metus censurae istius iniquae in animo ejus ita tandem evanuit, ut hasce *institutiones*, easq; *reformatas* publicam in lucem prodire passus fuerit.

§. CCCII.

At vero, si hac nostra aetate viveret clariss. Author, sine dubio miraturus esset scriptorum satyricorum copiam, quibus nihil fere aliud agunt eorundem opifices, quam ut aliorum labores perstringant, & quod in proverbio dicitur, ex musca faciant elephantum. Pauci effluxerunt anni, ex quo in societatem quandam rigidi quidam censores coiverant, qui alto supercilio comminabantur, se *semieruditorum* opellas examussim examinatu- ros, & acri sa- le satyrico conspersuros esse omnes illos, quos ex *semie- ruditorum* ordine acri hac censura dignos essent reperturi; Qui tamen ambitiosi conatus, cum permultis viris erudi- tis, aequis aliorum iudiciis, magnopere displicuerint, mox sua sponte evanuerunt.

§. CCCIII.

Caeterum *institutiones* suas aliorum more in 5. partes dispescit, ut in *prima physiologiam*, in *altera pathologiam*, in *ter- tia semeiologiam*, in *quarta hygieinem* atque *therapevticam* & in *quinta* denique *diaeticam*, *pharmaciam* atque *chirurgiam* ex- hibeat. Neque vero negandum est, multa pro genio tem- porum, quibus vivebat, adcuratius tradidisse nostrum, multa etiam veterum dogmata recte explosisse, ut *institutiones* suas *reformatarum* titulo exornare jure potuerit: Neuti- quam tamen dubitamus, quin, si hac nostra tempestate viveret, multa adhuc emendanda ipsi restarent.

§. CCCIV.

Eodem propemodum tempore *Johannis Francisci Vicarii*, Doctoris Medicinae ac Profess. publ. & in perantiqua Frib.
Z 3 Constant.

Constant. Universitate Prof. Publici, *basis universae medicinae* lucem adspexit, quae in quinque *institutionum* libros pro veteri more divisa ac juxta neotericos in principiis mathematicis, mechanicis & anatomicis fundata Auctori dicitur, & in qua tyronibus facilem ad sacram medicinam aditum pollicetur, imo ipsis quoque Practicis in abstrusissimis casibus faciem accendere laborat. Existimat is, antiquitati non omnem, quam meruit, laudem esse denegandam, saltem in consignandis historiis morborum observationibusque condendis laudabilem praestitisse operam: At vero in his non adquiescendum, sed neotericorum inventa illis esse jungenda; Et hoc modo sperandum, aliam faciem esse adquisituram artem medicam, haud abs re sibi persuadet. Ingenue quoque confitetur, ex quibus, in *institutionibus* hisce adornandis, profecerit, quos inter laudat *Blancardum, Francum, Junckenium, Wedelium, Hoffmannum* & imprimis *Ettmüllerum*. Magnam quoque convenientiam esse inter *catechesin medicam* per modum dialogi a *Buxbaumio* editam, & hoc suum opusculum, sponte fatetur: Ita ut, si inter se mutuo comparentur, in quam plurimis, sese mutuo excerptisse, observaturus vel plane juraturus sit Lector; Quod, quomodocunque sese habeat, nos suo loco lubentes relinquimus.

§. CCCV.

Sistemus potius pauca quaedam specimina ex primarum *institutionum* parte, nempe *physiologia*, unde ad *pathologiam, methodum medendi ac therapiam* ipsam concludi facile potest. De elementis seu principiis corporum sic statuit: Quatuor illa vulgaria, ignem, aërem &c. non dari, &, si darentur, doceri tamen in medicina non debere. Vera corporum naturalium principia esse mechanico-physica; Corpora animalium esse machinas hydraulico-pneumaticas, quae per sanguinis & spirituum contentorum motum varias actiones edant; Ipsum hominem talem esse machinam, quae tamen duo habeat agendi principia, quorum

quorum alterum sit substantia cogitans, alterum vero extensum, certa ratione modificatum, a quo dependeat chylificatio, sanguificatio, humorum circulatio &c. Vitam humanam *formaliter* in unione animae cum materia plus minus organica, *fundamentaliter* vero in fluidis, maxime in sanguine consistere, & sic, ratione hujus fundamenti vitam corporis versari in perenni ac decenti partium fluidarum (quarum principales esse spiritus seu impetum facientes existimat) quae solidas impellant, motione. Naturam definit, esse rationem artis divinae, rebus naturalibus insertam, qua ducantur ad suos fines &c.

§. CCCVI.

Diximus paullo ante, *Vicarium* nostrum suos inter praeceptores, si non vivos, saltem mutos connumerasse *Georgium Francum*, celebrem quondam in *Heidelbergensi* Universitate *Professorem* medicinae publicum. Is enim pariter, in Auditorum suorum gratiam *institutionum medicarum* synopsis edidit, cui methodus medicinam discendi est adnexa.

§. CCCVII.

Jungimus huic *Bernhardum Matthiam Franckium*, *Professorem* ac medicum in alma *Holsatorum Christian-Albertina* publicum, qui, cum dicta in Academia extraordinariam medicinae professionem auspicaretur, de *summa theoriae*, quam vocant, *medicae ad morborum curationem recte instituendam, necessitate* vere non minus quam eleganter diseruit. Discutienda in primis sibi sumpsit duo quasi brocardica, quae omnium ore circumferuntur, quorum primum est: *Bonum theoreticum esse malum practicum*; Et contra: *Malum theoreticum plerumque bonum esse practicum*. Alterum illorum est: *Qui suffecerit ad cognoscendum, sufficere quoque ad curandum*. Quid utrique huic effato veri vel falsi subsit, pluribus is dicta oratione examinandum in se suscepit.

§. CCCVIII.

§. CCCVIII.

Melius scopo nostro inservit *Bartholomaei de Moor* oratio de methodo docendi medicinam generatim, & speciatim de modo institutiones medicas tradendi, habita Groningae, cum, finitis feriis hyemalibus, ad Lectiones ordinarias A. 1707. reverteretur. Huic themati ut rite satisfaciat, fundamenti loco supponit, universam medicinam, quanta est, practicam esse; Est enim ars, quae a fine incipit, quae conservat sanitatem, morbos curat & vitam prorogat. Inde concludit: Male medicinam hucusque in *theoreticam* & *practicam* fuisse divisam, cum in medicina nihil tradi debeat, nisi quod ad finem istum consequendum sit adcommodatum; Et contra; Ea omnia, quae huic fini minime inserviunt, praetermittenda veniant.

§. CCCIX.

His praemissis, prudenter monet, in limine statim cessitasse medicos, quando de elementis sibi disputandum esse in Institutionibus putarunt. Si enim, uti paulo ante monuerat *Noster*, ea, quae fini medici non inserviunt, sunt praetermittenda, si institutiones practice sunt explicandae, frustra utique in medicina disputatur de elementis, utpote quae tractatio Physicis in solidum est relinquenda, quorum est, hisce de rebus differere. Neque enim, existimat is, quemquam ab omni iudicio usque adeo vacuum esse, qui non intelligat, nec quatuor elementa Peripateticorum, nec tria Cartesianorum, ad constitutionem hominis quicquam facere. Praeterea vanos condemnat conceptus, quos de statu sanitatis formare sibi solent medici, num scilicet consistat in potentia quadam actiones exercendi? Vel an sanitas a parte rei sit substantia? Tales enim, qui hisce vel similibus innutrantur conceptibus, non magis sapere posse credit, quam bene olere, qui in culina habitent.

§. CCCX.

Unde colligit Auctor noster, Sanitatem esse adjunctum

Etum vitae, vitam vero actuositatem ex interno principio. Nemini id obscurum posse esse putat, qui consideraverit, vivere esse agere, movere & moveri, cum sine motu corpus sit pondus iners. Itaque motum illum ex interno principio procedere debere. Pariter moveri quidem horologium, at non vivere. Horologium artificialem, humanum vero corpus naturalem esse machinam; Artificem rotulas scite praeparare, apte inter sese conjungere, & conveniens pondus appendere nosse, vitam tribuere non nosse. Solum DEUM vitam, respirationem & omnia hominibus largiri; Vitam solius omnipotentiae divinae stupendum esse monumentum. Verum, quodnam tandem est, sepositis rhetorum artificiis, principium illud internum, e quo, tanquam fonte perenni, omnes actiones scaturiunt, cujusque sanitas est adjunctum. Auctor noster rotunde enunciat: Non esse mentem, cujus natura in cogitatione consistat; Quasi vero cogitatio, tanquam res immaterialis, nullum cum materiali habeat commercium. Nec esse animam, cujus obscurus admodum sit conceptus; Quasi iterum duobus hisce vocabulis non promiscue & indifferenter uterentur medici. Quid ergo? Et quodnam tandem est principium istud internum, quod recte agnovit noster? Respondet: Nullum aliud, quam sanguinis continuum motum, circulationem, pressionem; Quasi non alia iterum causa requireretur, a qua motus sanguinis circularis & pressio procederet; Quo modo si quis cum Auctore nostro ratiocinaretur, aut in causarum determinatione in infinitum sine dubio progrediendum, aut agnoscendum foret in corpore humano aliud internum, illo prius, principium, nempe ipsa *Anima Rationalis*.

§. CCCXI.

Verum, regeret Noster, tali progressu causarum in infinitum non esse opus; Cor enim, secundum *Aristotelis* effatum, primum esse vivens & ultimum moriens; In ovo incubato post colliquamentum candidum, punctum emi-

care saliens; Cordis illud & circulationis rudimentum esse; Hinc idem dici partem principalem, quia ab ejus contractione vita, sanitas, omnes actiones dependent; Motum esse unicum vitae auctorem; Motum sanguinis omnes partes ad agendum habiles reddere; Idem illud, quod pondus appensum in horologiis, id quod aqua vel ventus in molendinis, idem illud motum sanguinis in corpore humano efficere. Sanguinis motum vivificare omnes partes, easque ad agendum disponere; Sanguinis motum in dormientibus non minus quam vigilantibus obtinere. Quid? Quod absque sanguinis motu & versus cerebrum distributione, ne somnus quidem intelligi possit. Verum his similibusque phrasibus communiter utuntur, qui principiis ita dictis mechanicis sese manciparunt, quas tamen diluamus suo tempore.

§. CCCXII.

Quibus interim sic expositis, varias animae facultates, a Galeno temere effectas, ex *Institutionibus* vult esse remotas, & merito quidem; Quia ex legitima partium viscerumque conformatione mutuaque ad se invicem habitudine actiones corporis humani variae. ab altiori principio actuatae, longe felicius certiusque deduci possunt.

§. CCCXIII.

Progressus hinc ad alteram medicinae theoreticae partem, nempe *pathologiam*, in qua de morbis, eorundemque causis & symptomatibus agitur, provide iterum monet, praestice haec omnia ob oculos ponenda; Proindeque frivola intemperiei cum & sine materia explanationi cum antiquis non esse inhaerendum, cum omnis intemperies, juxta illorum mentem, a quibus etiam *δυσκρασίας* vocabulum ad nos derivatum est, significet aliquid stabile partibus veluti inhaerens, cum temperies partium solidarum a sanguine ejusque motu dependeat. De motu vero qui meminerint, paucos esse, aut, si meminerint, pauciores esse,

esse, qui summum ejus usum explicando lectoribus demonstraverint. Proinde repetit denuoque inculcat: Vitam esse actuositatem ex interno principio; Illud vero principium nullum esse aliud, quam pressionem sanguinis; Unde infert: Plerosque morbos, imprimis universales, a sanguine dependere. Neque vero simpliciter motum tantum considerat, sed & humorem movendum; Considerat, inquam, motum sanguinis, talis scil. liquoris, cujus fibrosa est & esse debet consistentia, nec non vasa, in quae praecipue vires suas exerit, nempe arterias conicas; Considerat insuper, longitudinem pariter atque angulos horum tubulorum non esse ubique eosdem, sed uno in loco minus, in alio magis acutos; Considerat tandem motus hujus sequelas; Unde manifestum evadere putat, dictas qualitates hinc pendere, nec opus esse ad malignitatem & ignorantiae latibula confugere, ubicunque insoliti quippiam adparet in morbis. Considerando ergo hoc modo liquorem sanguineum ejusque consistentiam & vasa, & motum intestinum & progressivum & expansionem & horum omnium habitudinem atque relationem ad sese mutuo: Pollicetur, multo distinctiores conceptus inde orituros, conceptus inquam, quorum usus per universam praxin latissime sese sit diffusurus.

§. CCCXIV.

In signorum doctrina, quae, pariter in *Institutionibus* tradi consuevit, *Auctor* non est admodum prolixus, quandoquidem signa sese sensibus, & id, cujus signa sunt, intellectui offerunt. Vult autem, signa convenire cum morborum causis & symptomatibus, differre tantum considerandi modo. Conveniunt, inquit; Quandoquidem oportet, ut necessarius sit nexus inter signum & rem signatam: Talia autem necessaria affinitate cum morbo invicem conjunguntur. Inter reliqua autem signa pulsui non postremum concedit locum; Quare? Quia motus sanguinis medico imprimis considerandus est.

Uti vero motus sanguinis aequalis ad vitae & sanitatis conservationem necessarius est: Ita immutatus morborum causa est, magnitudinis morbi signum, & eventus felicitis vel infelicitis argumentum existit. Plures pulsuum differentias, quae tactu explorari non possunt, enumerare recusat, cum aliud sit in museo aliquid fingere, aliud per accuratam observationem & attentam experientiam addiscere. Proinde nullas describere cupit pulsuum differentias, quam quae sensibus sunt manifestae; Tales autem tres tantum vel quatuor ad summum dari existimat, alium nempe, a robore, *validum* vel *debilem* vocandum, alium a magnitudine, *magnum* vel *parvum*, a citius vel tardius repetitis ictibus, *frequentem* vel *rarum*, aliumq;, ab arteriae constitutione *durum* vel *mollem*. Unde praejudiciis eum excoecatū esse existimat qui credat, sese pulsū *celerem* *contradistincte* a *frequenti* manifeste percipere posse: Cum de celeri sanguinis motu ex frequentibus & citissime sese excipientibus ictibus judicemus. Verum aliud est judicare, aliud simpliciter percipere.

§. CCCXV.

Methodum medendi, praecipuam artis partem ita vult proponendam esse, ut discipuli ex indicantium, coincidentium, prohibentium, correpugnantium & permittentium labyrintho sese explicare possint. Id vero facile esse putat, si essentia morborum, si differentiae eorundem debita evidentia ob oculos ipsis positae fuerint. Notum est, inquit *Noster*, remedium morbo debere esse contrarium vel subcontrarium: Qui ergo de morbi ingenio non recte judicat, neque poterit is legitimas elicere indicationes. Quomodo autem ille de morbi essentia recte judicabit, qui de motu humorum minime, de intemperie stabili & quiescente omnino sollicitus est? Quomodo ille methodi medendi gnarus haberi poterit, qui in sanguine plethoram, quam putat non posse esse nimiam, & cacochymiam considerat, motum, dilatationem & aestum negligit?

§. CCCXVI.

§. CCCXVI.

Denique nec ipsorum medicinae instrumentorum obliviscitur *Noster*, sed tria nobis commendat, nempe *diætam*, *chirurgiam* & *pharmaciam*, ad quam etiam *Chymia* referri potest; In quibus quippe omnibus exercitatum esse oporteat medicum, si officio suo digne perfungi cupiat.

§. CCCXVII.

Cum A. 1687. *Sebastianus Christianus de Zeidlern*, Med. D. & P. P. primarius in *Academia Carolo-Ferdinandea Pragensi*, Institutiones medicas ederet, spem amplam concipere licuisset, in provectioni, qua tum constitutus erat Auctor, aetate perfecti & consummati quippiam ab eo profecturum; At vero spes nos fefellit; Nihil enim profecto egit aliud, quam quod veterum crambem jam satis coctam ac decoctam denuo recoxerit; Id quod ne absque sufficientibus rationibus dixisse videar, pauca tantum specimina in medium proferam. Illud itaq;, quod Naturam adpellant omnes, cum calido innato veterum absolute convertit; Hoc enim esse, cui insita sit vis atque potestas, per quam sumus & operamur. Mixta omnia ex quatuor Peripateticorum elementis constare opinatur. Doctrinam antiquorum de qualitatibus occultis, de temperamentis, ex quatuor primarum qualitatibus, caliditatis, frigiditatis, humiditatis & siccitatis praedominio oriundis, de quatuor sanguinis humoribus, bile flava & atra, pituita & sero tanquam excrementis utilibus, de hepate, parte principe & sanguificationis organo & officina, de liene acidum alliciente aliaque ejus farinae, de quibus ex recentiorum theoria melius informatus esse potuisset, citra omnem necessitatem & utilitatem postliminio revocavit. Ut alia taceam.

§. CCCXVIII.

Institutiones ipsae more consueto in V. libros sunt distributae, in quorum *primo* de etymologia, quidditate & divisione medicinae, de officio medici, de elementis

eorundemque qualitatibus & inde resultante vario temperamento, de humoribus, de partibus H. C. de spiritibus, facultatibus & actionibus tractatur: Quae res cunctae partim ab aliis millies inculcatae, partim vero supervacuae proindeque a theoria medica vera rescindendae sunt.

§. CCCXIX.

Cumque duplicem operationis medicae finem sibi habeat praefixum, nimirum ut non modo sanitas humani corporis praesens conservetur, sed & amissa restitatur: Hinc *libro secundo* agit de usu sex rerum non naturalium, & quidem iterum juxta veterum placita, quia fortassis religioni sibi duxit, ab eorum dogmatibus vel latum unguem recedere. Sic v. g. rationem redditurus, cur supinus in dorso decubitus usque adeo nocivus sit, hunc in modum ratiocinatur: Quod nimirum tali in situ corporis sanguis in vena cava incalescat, unde multi ad cerebrum vapores eleventur, in quo concreti apoplexiae, paralyfis, convulsionum, incubi atque defluxionum causae prodeant. In *tertio vero Libro* non modo naturam morborum eorundemque differentias tum essentiales tum accidentales, sed & tempora, causas atque symptomata evolvit.

§. CCCXX.

In *quarto* per signa statum hominis sani & aegri quemque; neutrum vocat, conjectare, quaeque; indicia aegrotantibus salutem vel mortem portendant, edocet: Inde ad crisia die-rumque; criticorum, nec non urinarum atque pulsuum considerationem progreditur. In *postremo* vero libro generalem medendi methodum proponit, ostensa varia ratione venae sectionis aliarumque evacuationum per alvum, urinam, sudores &c.

§. CCCXXI.

Anno 1710. Lugduni prodiit epitome totius medicinae, institutiones, pyrotechniam, commentarium pharmaceuticum & praxin medicam succincte complectens, cui
in

in calce addita est *Theodori Zwingeri*, Anatomiae & Botanices Professoris Basiliensis dissertatio medica de vitae longae-
vitate acquirenda. Manifestum vero est, quod haec epi-
tome ex *Michaëlis Ettmülleri*, Professoris quondam Lipsien-
sis scriptis medicis sit compilata; Unde celebris hujus me-
dici opera in compendium redacta, A. 1701. Londini im-
pressa hac inscriptione lucem publicam adspexerunt: *Micha-
elis Ettmülleri, in Academia Lipsiensi quondam Professoris celeberrimi,
opera omnia in compendium redacta*: Qui liber si cum hoc no-
stro comparetur, eundem plane esse liquide constabit.

§. CCCXXII.

Quod igitur primam istius compendii partem, nem-
pe *institutiones*, quae hac vice nostrae tantum considera-
tioni subjacent, attinet, in quatuor illas partes digestas
esse videmus, nempe in *Physiologiam*, quae de principiis
corporum naturalium, de principio corporis humani vi-
tali, nutritione, chylicatione, respiratione, secretionem,
sensu, motu & partu tractat; Deinde in *pathologiam*, qua
natura, causae, differentiae & signa morborum exponun-
tur: Tandemque in *hygieinam ac therapeutin*, quibus duabus
partibus de methodo medendi remediisque pharmaceuti-
cis agitur.

§. CCCXXIII.

Qui secundum principia Illustr. STAHLII, quae ta-
men naturae ipsi conformia sunt, prima artis medicae fun-
damenta stabiliverit, praeter *Georgium Philippum Neuterum*,
medicum & practicum *Argentinensem*, qui & medicinam in
eadem Universitate docendi facultatem nactus erat, pauci
innotuere. Edidit is A. M. DCCXIV. theoriam tam homi-
nis *sani* quam *aegroti*; In illa *physiologiam*, in hac vero *patbo-
logiam* nempe *medicam*, ita tractandam suscepit, ut, quod
in votis potissimum cordatiorum quidam habebant, expun-
dis in *physiologia* minime necessariis, superfluis ac curiosis, quae
vera artis medicae fundamenta magis evertere, quam confirmare
solent, ea tantum, quae ad medicum ejusque scopum praecipue spe-
ctant,

stant, traduntur, & ex veris naturae. in corpore humano agentis, principis solide demonstrantur; Praemissa in gratiam tyrōnum introductio de requisitis boni medici. In altera vero theoriae medicae parte, quae pathologiam explicat, remotis pariter inutilibus, ea tantum, quae ad praxin vere medicam necessaria sunt, tradere admissus est, cui similiter praemissa est introductio de navis pathologia moderna & activo in morbis.

§. CCCXXIV.

Est autem theoria haec *Nenteriana* eo dignior, quae accuratius examinetur, quo pauciores sunt, qui eandem hac methodo exhibuerunt. Candoris & sinceritatis, quae ex omnibus ferme paginis scripti hujus clarissime elucet, primum statim documentum occurrit in epistola dedicata ad per-illustre *quindecim Virorum Collegium Argentinenſe*, in qua sincere is edisseruit; Se varias quidem medicorum theorias accurate examinasse: Aft post multos labores & summum (quod praecipue dolendum) temporis dispendium, multas earum multa quidem curiosa & maxime subtilia, ad praxin vero medicam (ad quam tamen omnia in medicina dirigenda) minime necessaria contineri, seprehendisse. Quare, sepositis iis, in quibus alii inutiliter occupantur, & de mechanica partium structura & effectibus, per necessitatem quandam exinde fluentibus, nihil tamen utilitatis praxi foenerantibus, supervacane ab ipsis differuntur, maluit *noster* naturam ipsam, quae vera morborum medicatrix & medicorum magistra est, consulere, ejusque non solum motus ordinarios in statu sano, sed & extraordinarios in omnis generis morbis accuratius examinare: Quo ipso scrutinio feliciter ipsi innotuit, theoriam vulgarem non tantum multa superflua & minime necessaria, sed & falsa veramque praxin evertentia continere; Unde tanto magis isto suo in proposito confirmatus fuit, reformatione quadam eandem indigere.

§. CCCXXV.

§. CCCXXV.

Naevi vero, quos in *theoria physiologica* deprehendit, hi sunt: I.) Quod pleraq; phaenomena, in C. H. vivo obvia, materiae potius ejusque variis qualitatibus, quam motui, ad certos fines, praecipue vero ad conservationem corporis directo, vindicentur. II.) Quod multa *ἀνορπία* in medicinam ex aliis disciplinis, v. g. physica corpusculari, botanica, chymia, anatome &c. sint introducta, quae theoriae medicae verae potius obsunt, quam profunt: Unde haud immerito quaerit noster: *Cur saepius Anatomici optimi, Botanici, & Chymici in praxi sint infelicissimi?* Unde ortum sit illud tritissimum: *Optimos theoreticos pessimos esse practicos?* *Cur inter theoriam vulgarem & praxin nullus sit nexus &c.* Contra omni jure contendit idem: Theoriam medicam unice occupatam esse debere in inquisitione vitae ac sanitatis, quantum nempe scopo medico inservit: Cui tamen considerationi variorum quoque motuum in statu p. n. occurrentium, ad conservationem tamen corporis tendentium, tractatio addi debeat, ut appareat, quomodo etiam in statu p. n. praesentibus licet causis morbificis, nihilominus corpus, ad corruptionem intimam, nempe putredinosam pronissimum, in vita conservetur: Unde hanc vitae definitionem elicit: *Esse corporis mixti, ad corruptionem admodum proni, ope motus sanguinis circulatorii, ut & secretionum, in integritate conservationem.*

§. CCCXXVI.

Elicit hinc evidentissimum hoc conspectarium: Quod, quamdiu heterogenea varia sanguini reliquisque humoribus immixta nec quantitate nec qualitate excedunt, tamdiu quoque omnes motus, nempe tam progressivus sanguinis quam tonicus fibrosarum partium placide & absq; ulla molestia procedat, omniaque heterogenea tranquille corpore excernantur: Quamprimum vero sordes quantitate pariter ac qualitate excedere incipiant, utrumque istum vitalem motum augeri necesse sit, ut hoc tandem

modo heterogena, ad excretionem recte disposita atque praeparata per emunctoria convenientia proscribantur. Etiam si itaque extraordinarii tales motus non sine molestia contingant, pro praeternaturalibus tamen mereque morbofis propterea haberi nec possunt nec debent, sed potius, respectu finis salutare, ad excretionem materiae, corpori sive molestae sive noxae tendentes, sunt iudicandi. Et ad motus tales extraordinarios, vitae conservationem unice respicientes, merito refert haemorrhagias spontaneas, sudores criticos, coryzam, diarrhoeam criticam &c. Imo quid vetat, quo minus etiam febres ad eandem hanc classem referamus? Cum ex his, chinchina intempestive suppressis, eadem imo saepe pejora mala sequantur, quae, teste experientia, ex praedictis salutaribus naturae motibus, perversa cura cohibitis, consequuntur.

§. CCCXXVII.

Monstratis hoc modo *physiologiae vulgaris* naevis, & ostensis contra veris ejus fundamentis, nunc defectibus *pathologiae* recensendis in *introductione* eidem praemissa se pariter adcingit *Nenterus*, cui quippe persuasissimum est, in dicta *pathologia vulgari* non pauca inutilia, ad praxin minime necessaria, imo vera *praxeos* fundamenta haud raro evertentia & felicem curationem una cum ipsa medici fama pessumdantia inveniri.

§. CCCXXVIII.

Id quod ut solide probatum eat, ceu insignem statim defectum notat, quod pathologorum plerique *morbum* ceu mere passivum quid praefigurare sibi videantur: Cum noster potius credat, in quam plurimis (si non in omnibus) morbis esse aliquid activum, utile & ad conservationem vitae necessarium, quod ideo minime supprimi, sed potius, non obstantibus summis molestiis, tolerari, imo (pro circumstantiarum ratione) promoveri debeat. Id quod antea adlatis exemplis febrium, coryzae, diarrhoeae, haemorrhagiarum spontanearum &c. sat luculenter patet.

§. CCCXXIX.

§. CCCXXIX.

Ad eandem hancce classē defectuum, quibus *pathologia* moderna laborat, refert quoque *pathologiam falsam*, quam *Tachenius* aliique praecedenti saeculo in scholas medentium non sine ingenti noxa introduxerunt. Cui *pathologiam obstructionum* jungit, a quibus non paucos morbos derivarunt alii, etiamsi in C. H. admodum raras esse veras obstructions, Practicis satis constet.

§. CCCXXX.

Etiam si autem ex hisce omnibus, ceu totidem specimenibus cognosci facile possit, genuinum *Stablii* filium esse *Nenterum*; Sunt tamen, ii praecipue, qui ridicule admodum quosdam inter *genuinos*, quosdam vero (si, quod sentiunt, dicere audent) ad *spuriōs* vel *notōs* referunt, qui hanc laudem illi disputant, loca quaedam ex utraq; hac theoria allegantes, ex quibus probare id contendunt. His vero consulendum est, ut ejusdem hujus *Nenteri* fundamenta medicinae theoretica, in forma tabularum conscripta, attentius perlegant atque perlustrent: Ita enim, meras esse, quas proponit, doctrinas *Stablianas* satis superque convincentur, nisi forte, quae de fluido nervorum Cap. III. p. 80. & 81. *physiologiae* differit, scrupulum injiciant.

§. CCCXXXI.

Exequitur id modo, *institutionum* scriptoribus solemni, & hucusque in scholis medicorum recepto: Praemissis nempe medicinae praecognitis, ad *physiologiam* atque *pathologiam* ordine progreditur, quibus deinde *semeioticam*, *medendi methodum*, *diaeticam*, & *therapiam* tam *generalem* quam *specialem* subjungit, atque adeo ea omnia praestat, quae suis in institutionibus alii tractare ac praestare consueverunt, quae tamen prolixè hic recensere supersedeo.

§. CCCXXXII.

Eandem *Stablii* theoriam mira brevitate parique perspicuitate

spicuitate complexus est in *specimine theoriae medicae*, ad usum practicum adcommodatae *Johannes Simon Bauermüller*, Phil. ac Med. D. ejusdemque in Julia Ducali Würtzburgensium Universitate P. P. militiaeque praefidarius. Is, licet auditor *Stablii*, quantum mihi quidem constat, nunquam fuit, ejus tamen dogmata, tam *physiologiam* & *pathologiam*, quam ipsam quoque *therapiam* concernentia, tam exquisitè comprehendit, ut adcuratius compendium videre haetenus non licuerit. Omnia vero sua *Stablio* ejusque scriptis, quae diurna nocturnaue manu volvit, se debere in *Praefatione* sponte fatetur, simulque graviter conqueritur, *theoriam* hucusque *usitatam*, *classicis* nempe *famosis speculationibus* *superstructam* cum *praxi* adeo male cohaerere, ut potius, si quis ad normam illius mederi cupiat, possit facite imo debeat necessario fere optato & felici successu frustrari. *Speculationibus mechanicorum* (mechanismi legibus plerumque minime conformibus,) ut ut pulcris & plausibilibus nunquam plus justo fidendum; Ad discursum potius eas esse, & rationem de rebus docte (saepius tamen futiliter) reddendam, quam ad praxin, juxta ductum illius, prospere exercendam; Idque se usu ac repetito ausu satis didicisse, serio adfirmat. Nullibi vero de scriptorum *Stabliano- rum*, quod alii frivole praetenderunt, ut Philiatros ab illorum lectione abarceant, & ut sua tantum admirentur, efficiant, obscuritate conqueritur; Plana ac perspicua ei sunt omnia, ut plerisque aliis.

§. CCCXXXIII.

Si quis vero, ad hancce theoriam melius comprehendendam ac veluti imbibendam. fontem ipsum consulere malit, tanto minus a vero scopo aberrabit. Edidit nempe Celeb. Vir, *Johannes Ernestus STAHLIUS* theoriam medicam veram, *physiologiam* & *pathologiam*, tanquam doctrinae medicae partes vere contemplativas, e naturae & artis veris fundamentis intaminata ratione & inconcussa experientia sistentem. At bis terve legenda est haec *Stablii* theoria, ut in succum tandem ac sanguinem convertatur. Sic facto ipso deprehendet, inter praecepta
ejus

ejus theoretica & ipsam praxin longe adcuratorem esse nexum & harmoniam, quam in ullo eorum, qui *mechanismum* ubique crepant, reperiri liceat.

§. CCCXXXIV.

Inter genuinos ejus discipulos referent sine dubio qui ab aliquo usque tempore eos ita distingvere consueverunt, *Georgium Danielem Coschwitzium*, in Fridericiana Hallensi olim Professore medicinae publicum, qui, etiam si integrum cursum medicum ad principia illustris STAHLII meditatus videtur, morte tamen praeventus, solam *physiologiam* una cum *hygieine* absolvit. Titulus plenus hic est: *Organismus & mechanismus in homine vivo obvius & stabilitus*, seu, hominis vivi consideratio physiologica, ex veris naturae principiis eruta, ad *mechanismi* & *organismi* leges ordine concinno deducta, *methodo plana ac demonstrativa* exposita, in usum auditorii sui praecipue edita, & reliquis medicinae tam theoreticae quam practicae partibus, fundamenti loco, praemissa.

§. CCCXXXV.

Nihil vero prolixè hac inscriptione pollicetur est author, quod non re ipsa praestiterit: In omnibus enim ac singulis fidem suam plenissime liberavit, nisi quod hucusque persuadere mihi non potuerim, aphorismum quendam, scholio qualitercunque illustratum vere *demonstrativam* methodum exhibere. Qui vel primis tantum labris mathematicam degustarunt methodum, vel prima tantum *Euclidis* elementa eolverunt, illis, quid ad methodum vere *demonstrativam* requiratur, non potest esse ignotum.

§. CCCXXXVI.

His interim missis, quae rei tractatae dignitati nihil derogant, recte sustinet *nos*, praecipuum medentis negotium in indaganda vera naturae indole verti debere, ut nempe illius ordinem, leges & quasi mores per-

spectos sibi reddat, eaque ratione aptitudinem sibi compareret, ut ministerium cum successu praestare eidem valeat: Id quod in eorum gratiam salutariter monet, qui quasi dominatum quendam in eandem adfectant, legesque ipsi domesticas, quotidianas & usitatissimas oppugnant violentque, atque adeo loco ministerii, quod naturae praestare deberent, vim eidem potius faciunt eamque maxime turbant. O quam recte sibi aliisque consulerent intempestivi *corticis peruviani* laudatores, (in quos quippe monitum hocce adposite quadrat) si & rite illud perpenderent & in praxin quoque deducerent! Sic enim querelis numerosorum aegrotantium, qui ex incongrua tali febrium curatione dispendium sanitatis suae saepius irreparabile passi fuere, supersedere possent. Nec sine son- tica ratione addit noster: Permultos quidem esse, qui, naturae se ministerium praestare, adfectant, eam tamen profundissime ignorant: Aliàs enim possibile vix foret, eos *ignorantiae asylis* naturam hoc modo descriptam adnum- rare posse.

§. CCCXXXVII.

Qui vero naturae hujus, nempe humanae, verum genium perspectum sibi reddere cupit, eum, secundum *Auctoris* consilium, non modo de textura & structura par- tium variarum C. H. mechanica sollicitum esse oportet, sed & de variis motibus in eo obviis, eorundemque vero principio seu causa efficiente meditationem instituere de- bet; Ut ita naturam *hominis vivi* rite sciat atque intelligat: Unde evidenter fluit, *mechanismum* ubique cum *organismo* & *hunc* cum illo jungendum esse.

§. CCCXXXVIII.

Specialior tractatio duabus comprehensa est *sectioni- bus*, quarum *prima* novem, *altera* vero tribus absolvitur ca- pitibus. In primo sectionis primae capite agitur de homine & quidem *vivo*, prout duabus essentialibus partibus constat, corpore nempe, mechanice & artificiose exstructo, tan- quam

quam principio passivo, & anima rationali, tanquam principio activo, corpori organico vitam largiente, omnesque motus in illo perpetrante, constat. In *secundo* de structura corporis variarumque ejus partium usu; in *tertio* de elementis & mixtione corporis, in *quarto* de natura, seu principio agente in C. H. vivo, in *quinto* de vita, motibus vitalibus eorundemque effectibus, in *sexto* de nutritione, in *septimo* de generatione, in *octavo* de sensatione & in *nono* de temperamentis differitur. Rationem vero, quare hoc potissimum, non alio ordine, universam *physiologiam* suscepit tractandam, in praefatione Author satis superque exposuit.

§. CCCXXXIX.

In *altera* sectione, quae *hygieinen* seu conservationem status naturalis H. C. exponit, *primo* iterum capite de sanitate ejusque conservatione in genere, in *secundo* de rebus non naturalibus & in *tertio* denique de *dieta* breviter quidem, adcurate tamen ac nervose agitur.

§. CCCXL.

Atque hic pedem figo, officio meo satisfecisse ratus, quod plerosque, qui ad notitiam meam pervenerunt, *institutionum* scriptores recensuerim. Quod si pollicitus essem omnes, promissum caderet in debitum. At vero promisi plerosque tantum: Et hanc me fidem plene liberasse, fatebuntur ingenui omnes *introductionis* hujus judices; Reliquos, qui theonino tantum dente aliorum labores rodere consueverunt, non curo, paucis, sed ingenuis placuisse contentus.



(O)



J. Austen.

Pt. 8. 2. 6.

2. 10. 11. 12.
1. 2. 3. 4.

